

另造文冊二本各註緊關畧節及原立程限一本送
科註銷一本送 內閣查考該科照冊內前件逐一
附簿候查下月陸續完銷通行註簿每於上下半年
繳本類查簿內事件有無遲限未銷如有停閣稽遲
卽開列具題候 旨下各衙門詰問責令對狀次年
春夏季終繳本仍通查上年未完如有規避重情指
實叅奏秋冬二季亦照此行又明年仍復挨查必俟
完銷乃已若各該撫按官奏行事理有稽遲延閣者
該部舉之各部院註銷文冊有容隱欺蔽者科臣舉
之六科繳本具奏有容隱欺蔽者臣等舉之如此
有考歲有稽不惟使聲必中實事可責成而參驗綜
覈之法嚴卽建言立法者亦將慮其終之罔效而不
敢不慎其始矣致理之要無踰于此伏惟 聖明裁
斷施行臣等不勝大願奉 聖旨卿等說的是事不
考成何由底績這所奏都依議行其節年未完事件
係緊要的着該部院另立期限責令完報若不係錢
糧緊要及年遠難完的明白奏請開除毋費文移煩
擾

考滿謝 賚銀幣疏

臣以六年考滿伏蒙 聖恩頒賜銀五十兩紵絲四

表裡原封鈔五千貫茶飯卓五卓羊三隻酒三十甌
又特奉 聖諭先生啓沃朕心平治天下功已在
社稷茲當六年考滿特於例外加賜銀一百兩蟒衣
斗牛各一襲少示優眷不必辭欽此該文書房官劉
東恭捧到臣私寓臣謹焚香叩頭祇領訖伏念臣猥
以庸流膺茲鉅畀致身紫閣荏苒已踰乎七朞竊祿
清朝循省蔑聞乎寸補茲者恭遇我 皇上生知作
聖神授當天臣旣慶曠世之奇逢復荷 先皇之重
託每欲敷陳仁義奉 明主於三代之隆振肅紀綱
布 皇風於八區之外而學慚啓沃才匪平章心雖

切於葵傾力實慳於蠶負茲當再考曾蒙 一長方
汰黜之必加豈意 恩私之橫及楮頌 內帑饌出
天厨上尊養羊絡繹在道白金綵幣炫爛充庭又履
聖藻之親裁 特降宸綸而音獎隆以不名之禮加
之異數之恩倬彼 靈章重寶真逾于朋百斯皇命
服申錫奚啻于至三臣有何德能冒此榮寵分涯已
過懼顛隕以非遙覆載難名將報酬之奚以惟當益
堅精白矢竭衷丹放踵摩顛苟利 國家而奚惜銘
心鏤骨惟安 社稷以爲圖臣無任激切感激之至

考滿辭

加恩疏

准吏部咨奉 聖旨元輔居正社稷重臣忠勳茂著
茲六年考績朕心嘉悅着支正一品俸進中極殿大
學士廕一子中書舍人給與應得誥命欽此臣聞
命自天措躬無地伏念臣本以凡庸躡司鼎輔自
先朝受任以來誤承 優眷及 皇上嗣服之始更
受 特知而臣上不能以皇王之道啓沃 聖心下
不能紆紆遠之猷平章 國政敝風因循而未振實
效踈濶而罔臻是臣莫副 倚毗之專而適叢衆曠
之咎也茲當課績方俟黜幽豈意 聖慈更加 隆

施昨者 宸章賜獎已蒙踰例之 恩今者 綸音

傳溫更荷非常之 寵跼踏自省夢寐若驚夫無其

而厚壙則圯傾立至器小而受鉅則覆滿隨因豈惟

輿議之所共譏實亦天道之所必忌故往歲 大賚

加恩臣屢疏辭免幸蒙 俞允乃少卽安今敢不避

宸嚴再陳愚悃伏望 皇上察臣素抱朴忠絕無矯

飾特收 成命俾圖後功庶 國恩不爲濫施而羣

工亦克用勸矣臣無任懇切祈望之至 奉

聖旨考績加恩朝廷彝典於勳德未足爲酬宜承眷

命不必再辭吏部知道

進講章疏

臣等一歲之間日侍 皇上講讀伏見 聖修益懋
聖志彌堅盛暑隆寒緝熙罔間臣等備員輔導不勝
慶幸但惟義理必時習而後能悅學問必溫故而後
知新况今 皇上睿明日開若將平日講過經書再
加尋繹則其融會悟入又必有出乎舊聞之外者臣
等謹將今歲所進講章重復校閱或有訓解未瑩者
增改數語支蔓不切者卽行刪除編成大學一本虞
書一本通鑑四本裝潢進 呈伏望 皇上萬幾有
暇 時加溫習庶舊聞不至遺忘新知日益闡明
於 聖躬實爲有補以後仍容臣等接續編輯
御覽仍乞 勅下司禮監鏤板印行用垂永久雖
句淺近之言不足以仰窺 聖學精微之奧然行遠
升高或亦一助云爾

請定面獎廉能儀注疏

昨該吏部都察院欽奉 聖諭開具各在外廉能官
員請照舊例宴賞該臣等於 文華殿 面奏伏蒙
皇上親發玉音將各官別來朕面加獎諭欽此隨奉
聖旨這廉能官着吏部都察院堂上官并吏科都給
事中掌河南道御史引來會極門朕面加獎賞欽此

臣等竊惟致理之道莫急於安民生安民之要惟在於覈吏治前代令主欲興道致治未有不加意於此者如臣等前所進 帝鑑圖說中褒獎守令召試縣令諸事載之史冊以爲美譚我 太祖高皇帝每遇各地方官來京奏事常召見賜食訪問民間疾苦雖縣丞典史有廉能愛民者亦特差行人賞 勅獎勵或封 內醪金幣以賚之迨宣順弘治之間亦間舉宴賞之典故二百餘年重熙累洽興致太平實由於此恭遇 皇上天縱聖明勵精圖治茲當考察之初大明黜陟之典又特蒙 天語諭臣等欲引見

官負破格獎賞仰 聖心益以深納臣等圖說所陳而遠追我 聖祖綜覈吏治之軌也 宗社生靈曷勝慶幸但此係 特典久未舉行且遠方外吏從來未覩 朝廷之禮若不先示以儀節使之演習恐一旦震怖 天威倉皇失措又非所以昭 德意光盛舉也伏乞 欽定行禮日期 勅下禮部略倣 祖宗時御 會極門午朝之儀定擬簡便儀注上 請 聖裁明示各衙門遵行庶臨期不致差誤且曠典肇舉 懿範昭垂貽之萬世永有烈光矣 奉

聖旨着於十八日行禮部便具儀來看

謝

御筆大書疏

昨者伏蒙 皇上召臣等於 文華殿恭視 御書

大字 賜臣居正宅揆保衡大書一幅臣調陽同心

夾輔大書一幅六部都察院通政司大理寺堂上堂

印官九員各正已率屬大書一幅日講官五員各書

難陳善大書一副正字官各敬畏大書一副臣等今

日 早朝後謹率同諸臣恭詣 會極門該司禮監

太監曹憲恭捧 頒給俱叩 頭 跪 謝 伏 乞 聖 鑒

睿哲大成 英明神授不惟 聖修之學已造於精

深雖於翰墨之微亦臻夫佳妙臣等前此雖日侍

左右恭視倣寫然未嘗見 御筆大書如是之妙筆

意飛動若驚鴻矯鳳之飛翻體格莊嚴儼周鼎商彝

之陳列且二十餘紙八十餘字咄嗟之間搃筆立就

初若不經意而鋒穎所落奇秀天成臣等恭視仰觀

心悚神駭祇深欽忤莫罄揄揚今日 頒給九卿諸

臣亦莫不相顧驚嘆歡呼頌仰誠曠世之奇逢間代

之鴻寶也謹當與諸臣慶戴 殊恩對揚 休命共

竭駑鈍仰佐 熙明臣等無任欣喜踴躍之至

臣等無任欣喜踴躍之至

謝

恩賚父母疏

欽蒙 聖諭朕聞先生父母俱存年各古稀康健榮
享朕心嘉悅特賜大紅蟒衣一襲銀錢二十兩又玉
花墜七件彩衣紗六疋乃奉 聖母恩賜咸欽承着
家僮往賚之外銀錢二十兩是先生的欽此該文書
官劉東恭捧到 閣臣謹叩頭祇領訖伏以 綸綍
疏榮疊荷 尚方之特賜庭闈錫類載分 長樂之
餘歡 恩出非常感同罔極竊念臣猥從寒薄躡致
台司自惟一介之侗愚寔本二親之訓育晨昏久曠

寧忘不寐之懷雲日長瞻適獲俱存之幸稀齡並屆
封誥重膺謂已藉 君父之厚榮足以慰人乎之至
願豈意 宸衷之軫念載承 聖母之推恩敷 天
語以丁寧觀 奎章而燦爛金錢錯落重頒百鎰之
珍綺毅方空兼備六珈之飾忽從 天上遙落人間
慈光借貫于桑榆 湛露下霑于草莽考之前史惟
唐元振宋王溥登輔相在雙親偕老之年稽諸 本
朝惟原吉母李賢父蒙存問於二子得 君之日然
未有 寵榮烜赫 賚予駢蕃如臣遭際之極盛至
隆者也此蓋伏遇 皇上 神聖宅中 寬仁逮下

歛 五位康寧之福錫厥庶民推 兩宮尊養之心
刑于四海遂令微陋荐被 恩施以及怙恃之私並
沐 生成之造士而知已許身尚不爲難臣之受
恩捐軀豈足云報謹當欽承 聖貺戒僮僕以星馳
歸奉親歡傳子孫爲世寶仰 天顏之咫尺守庭訓
以周旋身體髮膚苟利 國家而何惜股肱元首庶
希喜起以交孚

謝

宸翰疏

昨該臣等以翰林院所產白燕及 內閣嘉蓮進

獻隨奉

手諭白燕蓮花俱進獻

聖母甚是嘉

悅却獨產翰林院中先開於密勿之地 上天正假

此以見先生爲 社稷祥瑞花中君子朕賴先生啓

沃固不敢顛縱何德之有欽此恭惟 聖母德配坤

元含萬彙而發育 皇上道隆乾運躋四海於昇平

協氣薰蒸 休禎駢集乃猶 氓鴻工於不宰遜大

美而弗居 特渙溫綸謬申 眷獎此誠 聖不自

聖謙而又謙之心也顧臣猥以庸虛叨司鼎鉉燮調

靡效敢貪 天功以自私歌頌難名真忘 帝力於

何有捧誦 綸音不勝感戴愧悚之至

進實錄辭免

加恩疏

准吏部咨節奉 手勅 皇考實錄修完朕心嘉悅總裁輔臣張居正着兼支尚書俸廩一子做中書舍人如勅奉行欽此備咨到臣臣聞 命自天措躬無地仰惟 皇考穆宗莊皇帝駿德鴻功增光 列祖睿謨懿行垂範百王臣祇奉 明綸總司紀綠徒慙淺陋莫罄揄揚不加譴訶已爲榮幸豈敢復萌希覬之想以重竦素之尤夫祿以奠食必有兼人之能而後可以食兼官之祿廩以酬勞必有超世之功而後

可以蒙延世之賞臣謬以淺薄得效編摩載筆操觚乃詞臣之常職耳有何勤勞可當懋賞且頃者屢奉溫旨宴賚駢蕃 恩禮優渥藉曰酬勞不啻厚矣况本無勞何可踰冒故昨者欽奉 聖諭令臣等擬勅加恩監修總裁官臣再三退避不敢自擬仰蒙天語諄諄復差文書官傳 諭同官大學士呂調陽另擬必欲令臣同霑 恩命而其所擬乃又越分超等反出諸臣之上將使臣益跼踖惶汗而不能自寧也伏望 皇上鑒臣悃誠素無矯飾收回 成渙特賜允俞俾臣得少效犬馬之微勤不至速濟顛之

重咎則 皇上遂臣之志保臣之終九遷百朋不足以喻其榮重矣 奉

聖旨 皇考功德紀述詳實卿總裁首臣勤勞爲多加恩已有成命宜卽勉承不必固辭吏部知道

再辭

恩命疏

頃以纂修 穆宗莊皇帝實錄告成荷蒙 聖恩曲

軫微勞 勅加封廕隨該臣具本辭免奉 聖旨

皇考功德紀述詳實總裁首臣勤勞爲多加恩已有成命宜卽勉承不必固辭吏部知道欽此

莫回冰兢愈至竊以有勞必錄者 明主厚下之仁

敬事後食者人臣奉公之節夫臣之於君事無大小孰非所當盡心畢力以爲之者爲之而有功分義當然勞於何有爲之而無功譴責是虞矧敢他觀故人臣進不敢以其能要利于上退不敢以其事尸功於已此事使之大分古今之通義也臣以草茅孤介荷先帝顧託之重蒙 皇上眷遇之隆夙夜皇皇慮無以報藉使臣有奇勲異能銘之太常勒之鐘鼎其於臣子分義固未能有加秋毫之末也况纂修之役不過從事於楮墨觚翰之間又非有執殳荷戈之勞重

鉅艱危之任也而遂以此施勞於已徼寵於上其
毋乃非人臣自處之義乎且履盛處盈古人所戒臣
叨忝已極涯分已踰若冒竊不止必致殃咎故在諸
臣可受而臣獨不可受也伏望 皇上察臣之愚
曲賜俞允因以明君臣分義于天下使爲人臣者皆
知盡心所事而不敢萌希覬之心則臣節純而主
道立矣臣屢冒 天威不勝戰悚隕越之至

奉

聖旨卿每事有功不居屢辭恩命茲又惓惓以君臣
分義爲言具見忠貞大節特准辭廕以成卿美

可勉承之稍存舊典吏部知道

遼東大捷辭

恩疏

昨該兵部覈叙遼東功次濫及臣等請加 恩賚已
卽具揭辭免茲奉 聖諭遼東大捷非常皆卿等運
籌之功例宜陞廕還擬勅來行欽此 恩綸寵被敢
不遵承但臣等竊惟慶賞之典激勸攸關必當其功
乃可服衆茲者遼左之捷實仰賴我 皇上聖武昭
布 神威震疊一時文武將吏遵奉 廟筭同心戮
力之所致然論其力戰之功尚當以將士爲首故臣

等昨者擬票 加恩該鎮諸臣首叙總兵 賜賚獨厚雖總督巡撫身在地地方親理戎務者亦視之有差誠以摧鋒陷堅躬冒矢石本諸將士之力固非坐而指畫者所可同也况如臣等身不出乎 禁闥足不履乎戎行雖曾借劬效畫演 綸授事不過奉 英王之睿謨效閣臣之常職耳乃欲緣此遂攘以爲功同叨 恩寵則九邊之士聞之必將曰我輩披堅執銳千辛萬苦乃得一級之賞而彼乃掠而有之武夫力而獲諸原書生坐而享其利不惟以功蒙賞者知所勸而旁觀迷聽之人亦將憤惋而不平矣

以昭大公明激勸也矧昨者 皇上以大捷告自引冲年涼德而以成功歸之 祖宗列聖夫以皇上之明聖猶不肯自以爲能必歸之 烈祖臣等何知乃敢貪天之功以爲己力乎且閣臣以邊功受賞亦自近時有之非我 祖宗朝盛德事也臣等反覆思惟 加恩一節斷不敢當伏望 皇上俯鑒臣等愚悃絕無一毫矯飾竟寢其事免令臣等撰 勅因以明 朝廷大公之典作九邊將士之氣其於聖政亦爲有補所有原奉 聖諭一道謹收藏 閣中以彰 天眷臣等不勝感戴悚慄之至

奉

聖旨卿等所奏誠意懇切准辭免各賜銀一百兩綵段四表裏大紅紵絲蟒衣一襲稍示眷酬

謝

御劄獎勵疏

昨該臣等以大捷 加恩具疏辭免奉 聖旨卿等所奏誠意懇切准辭免各賜銀一百兩綵段四表裏大紅紵絲蟒衣一襲稍示眷酬欽此臣又特奉 御筆 勅諭元輔張少師 朕以幼冲嗣位賴先生匡弼啓沃四方治安九邊寧靖我 祖宗列聖亦鑒

先生之功就加顯爵不爲過乃屢辭恩命惟一誠輔國自古忠臣如先生者罕朕今知先生實心不復強特賜坐蟒衣一襲銀錢五十兩以示優眷申成先生美德其欽承之故勅欽此該文書官太監劉東恭捧到臣私寓臣謹叩頭祇領不勝感泣竊念臣山澤之賤驥也不自意徵時厚幸致身台鼎遭逢 英主龍飛又謬以章句淺陋爲 帝者師其中倚託之重契合之深雖在 廷之臣猶有不及知者每自思惟士爲知己者歿古俠客者流急人之難旣已存亡生死矣而猶不矜其能不望其報况臣之於君有不可逃

之分受不能報之恩者乎今以臣之遭遇如此而不
思畢忠竭力以圖稱塞或雖忠於所事而有一毫計
功謀利徼寵覬恩之心則爲俠士之弗如故自臣當
事以來夙夜兢兢恒欲使功浮於食事過所受犬馬
之心於是乃安其抗違 恩命冒瀆 宸嚴至於屢
控而不已者實以愚抵此耳仰荷 聖慈特垂俞允
又 親灑宸翰 曲賜褒嘉諒其實心不復相強是
皇上之知臣也以心而不在於爵祿參縻之厚微臣
之遇 主也以道而非由於要寵竊祿之私此古之
聖賢豪傑所爲夢想而不獲一覩者也臣何緣何幸

有此遭際至於坐蟒乃尊貴之服 臣下之可僭于
金錢乃玉府之珍非貧士之所宜 殊恩特賚更
踰分涯臣又將何修何爲可以報稱繼自今惟當益
堅精白矢竭衷丹惟 社稷之是圖何髮膚之可惜
更願 皇上終鑒愚誠曲成微志 凡非分之 恩踰
格之 賞勿復濫及以畢臣倦 圖報之忱苟遂其
愚歿無所憾

進職官書屏疏

竊以安民之要在於知人辨論官材必考其素顧人
主尊居九重坐運四海於臣下之姓名貫址尚不能

知又安能一一別其能否而黜陟之乎朝著之間百
司庶府尚不能識又安能旁燭於四方郡國之遠乎
考之前史唐太宗以天下刺史姓名書於御座屏風
坐臥觀覽唐宣宗知涇陽令李行言之賢書其名於
殿柱不次擢用我 成祖文皇帝嘗書中外官姓名
於 武英殿南廊 仁宗昭皇帝亦命吏部尚書蹇
義兵書尚書李慶具各都司布政按察司官履歷揭
於 奉天門西序良以輿圖遼廓官府分羅身旣難
以遍歷故託之標記以廣其明知旣難以周知故操
其要約而運諸掌君心也臣股肱耳目也人之一心

雖賴股肱耳目以爲之視聽持行而心之精神亦必
常流通於股肱耳目之間然後衆體有所管攝而各
效其用此明君所以總條貫而御人羣之要道也仰
惟 皇上天挺睿明勵精圖治今春朝覲考察 親
獎廉能頃者吏部奏除 躬臨銓選其加意於吏治
人才如此顧今天下疆里尚未悉知諸司職務尚未
盡熟雖欲審別其道無由臣等思所以推廣 德意
開發 聖聰者謹屬吏部尚書張瀚兵部尚書譚綸
備查 兩京及在外文武職官府部而下知府以上
各姓名籍貫及出身資格造爲 御屏一座中三扇

繪天下疆域之圖左六扇列文官職名右六扇列武
官職名各爲浮帖以便更換每十日該部將陞遷調
改各官開送 內閣臣等令中書官寫換一遍其屏
卽張設於文華殿後 皇上講讀進字之所以便朝
夕 省覽如某衙門缺某官該部推舉某人卽知其
人原係某官今果堪此任否某地方有事卽知某人
見任此地今能辦此事否臣等日侍 左右 皇上
卽可 親賜詢問細加商確臣等若有所知亦得面
盡其愚以俟 聖斷一指顧間而四方道里險易百
司職務繁簡一時官自賢否舉莫逃於 聖鑒之下

不惟提綱挈要便於觀覽且使居官守職者皆知
名常在 朝廷左右所行之事皆得達於 宸聰
賢者將兢兢焉爭自淬勵以求見知於 上不才
亦將凜凜焉畏 上之知而不敢爲非 皇上獨
神智坐以照之垂拱而天下治矣臣等謹將所製
官 御屏一座隨本上 進伏乞 勅下該衙門
收如法張設恭請

聖明俯覽以少盡臣等因事納忠之誠

奉

聖旨覽卿等奏進職官書屏欲朕周覽輿圖審察衆

職誠知久安民要務具見匡弼之忠朕心深用嘉悅
圍屏着進收設於文華殿後以便朝夕省覽該衙門
知道



新刻張太嶽先生文集卷三十九

議處史職疏

准禮部手本該本部題覆翰林院編修張位奏爲懇
乞 聖明申飭史職以光 新政事議照裁定史職
係閣臣題請合照本官奏內事理將一應事宜詳行
議擬上 請 奉 欽依到閣臣等謹欽遵議得

國初設起居注官日侍 左右紀錄 言動實古者
左史記事右史記言之制迨後詳定官制乃設翰林
院修撰編修檢討等官蓋以紀載事重故設官加詳
原非有所罷廢但自職名更定之後遂失朝夕記注

之規以致 累朝以來史文闕畧昔 世宗皇帝嘗
諭大學士張璉日日每有左史右史之官歷代因之
我 聖祖創翰林之制亦有編修修撰之名但未見
居此職者盡乃事云是紀錄之職本自備官曠廢之
由實在臣下卽如邇者纂修 世宗 皇考實錄臣
等祇事總裁凡所編緝不過總集諸司章奏稍加刪
潤彙括成編至于仗前柱下之語章疏所不及者卽
有見聞無憑增入與夫裨官野史之書海內所流傳
者欲事采錄又恐失真是以 兩朝之大經大法雖
罔敢或遺而 二聖之嘉謨嘉猷實多所未備凡此

皆由史臣之職廢而不講之所致也矧我 皇上聰
明天啓 淵哲性成 踐祚以來 善政鴻猷班班
可述類非章疏所能盡見若不及時紀錄奚以章聞
盛美垂法無極所據申明史職光復 祖制以備一
代令與在于今日委不可缺臣等祇奉 明命仰稽
成憲參酌時宜謹將一應合行事宜逐條詳列于後
伏乞

聖明裁定施行 計開

一議分管責成照得史臣之職以紀錄 起居爲重
顧 宮禁邃嚴流傳少實堂廉遠隔聽睹非真則何

以據事直書傳信垂後看得日講官密邇 天顏見聞真的又每從閣臣之後出入 便殿卽有 密勿謀議非禁秘不可宣露者閣臣皆得告語之合令日講官日輪一員專記注 起居兼錄 聖諭 詔勅冊文等項及 內閣題稿其 朝廷政事見於諸司章奏者另選年深文學素優史官六員專管編纂事分六曹以吏戶禮兵刑工爲次每人專管一曹俱當川在館供事不許別求差遣及託故告假等項致誤公務

一議史臣侍直謹按禮儀定式凡遇 常朝記事官

居文武第一班之後近上便于觀聽卽古螭頭執筆之意洪武二十四年定 召見臣下儀以修撰編修充侍班官卽古隨使入直紀事之意今宜遵照 祖制除 陞殿例用史官侍班外凡 常朝 御皇極門卽輪該日記注 起居并史官共四員列于東班各科給事中之上 午朝 御會極門列于 御座西稍南專一記注 言動凡 郊祀 耕藉 幸學大閱諸 典禮亦令侍班隨從紀錄至于不時 宣召及大臣 秘殿獨對者恐有機密不必用史官侍班但令入對大臣自紀 聖諭及奏對始末封送

史館詮次其 經筵 日講則講官卽記注 起居亦不必另用侍班

一議纂輯章奏照得時政所寄全在各衙門章奏今除 內閣題稿并所藏 聖諭詔勅等項該閣臣令兩房官錄送 史館外其各衙門章奏該科奉有旨意發抄到部卽全抄一通送 閣轉發 史館至于欽天監天文祥異太常寺祭祀日期各令按月開報其抄本不必如題奏揭帖格式但用常行白紙密行楷書不論本數多寡併作一封送入

二議紀錄體例照得今次紀錄祇以備異日之考求俟後人之刪述所貴詳核不尚文詞宜定著體式凡有 宣諭直書 天語 聖諭詔勅等項備錄本文若諸司奏報一應事體除瑣屑無用文義難通者稍加刪削潤色外其餘事有關係不妨盡載原本語涉文移不必改易他字至于事由顛末日月先後務使明白無致混淆其間事蹟可垂勸戒者但據事直書美惡自見不得別以己意及輕信傳聞妄爲褒貶一議開設館局照得東西十館原係史臣編次之所密邇 朝堂紀述爲便今合用東館近上四所令史臣分直其中一起居二吏戶三禮兵四刑工除典守

膳錄人役隨同供事外一應閒雜人等不許擅入其合用紙劄筆墨酒飯等項俱照纂修例給

一議收藏處所照得國史古稱爲金匱石室之書蓋欲收藏謹嚴流傳永久今宜稍倣此意月置一小櫃歲置一大櫃俱安放東閣左右房內每月史官編完草稿裝爲七冊一冊爲起居六冊爲六曹事蹟仍于冊面各記年月史官姓名送內閣驗訖卽投入小櫃用文淵閣印封鎖歲終內閣同各史官開取各月草稿收入大櫃用印封鎖如前永不開視

一議膳錄掌管照得史館紀錄所用膳錄典守官吏見今纂修實錄卽可通融選用合將各館膳錄官選取勤謹善書者二員專膳秘密文字行吏部選撥善書貼寫辦事吏十二名專寫各衙門章牘撥當該吏四名專管文冊及朝夕啟閉館門常川供事滿日各照常送部撥補不給恩典

一議補修記注伏覩聖明踐祚之始卽召見輔臣於平臺二年之春召見計吏廉能卓異者面賜獎諭邇者以吏兵二部奏除文武職官又親臨銓選皆古帝王之盛節三年之間鴻猷善政不可

縷數茲者曠典修復亦合將二年以前事蹟追書謹錄用傳萬世擬令各官除每日照前供事外兼將二年前以前起居初政亦照月分曹以次纂錄其勅等項內閣查付各衙門章奏行六科照月類抄一冊送內閣轉發

萬曆三年二月二十日奉 聖旨史臣紀錄時政我祖宗成憲具存但近年任此職者因循曠廢遂成闕典今宜及時修舉卿等既議處停當都依擬行禮部知道

請裁抑外戚疏

伏蒙 發下工部覆 武清伯李偉請價自造墳塋一本該文書官孫斌口傳 聖旨該部折價太薄從厚

擬來欽此臣等看得李偉乃 皇家至親與衆不同

皇上仰體 聖母篤念外家之意禮宜從厚但昨工部尚書郭賓等見臣等言 先朝賜賚外戚 恩典

唯玉田伯蔣輪家爲最厚正與今 聖母家事體相

同故本爵亦遂據蔣輪例以請及查嘉靖二年蔣輪

乞 恩造墳原係差官蓋造未曾折價該部處辦木

石等料當時估計該銀二萬兩卷案具存該部因本

爵自比蔣輪例故卽查蔣輪例題覆其做工班軍及

護墳田土另行撥給原不在此數今奉 聖諭欲令
從厚臣等敢不仰體 皇上孝心且臣等犬馬之情
亦欲借此少效微悃於 聖母之家但該部查照舊
例止於如此今欲從厚惟在 皇上奏知 聖母發
自 宸衷特加優賚固非臣下所敢擅專也臣等又
惟昔玉田伯乃 世宗皇帝親母家也當時 章聖
皇太后母儀天下 世廟奉事 母后篤厚外家何
所不至而其所給乃僅於此數想以 祖宗以來相
傳恩例如此有難以踰越耳今 皇上孝事 聖母
豈能有加於 世廟而 聖母之篤厚外家亦豈
有踰於 章聖皇太后乎今以 世宗皇帝之所不
能加 章聖太后之所不可踰而 聖母與 皇上
必欲破例處之此臣等所以悚懼而不敢擅擬者也
夫孝在無違而必事之以禮恩雖無窮而必裁之以
義貴戚之家不患不富患不知節富而循禮富乃可
久越分之恩非所以厚之也踰涯之請非所以自保
也臣等待罪輔弼不敢不盡其愚伏惟 聖慈垂鑒
請申舊章飭學政以振興人才疏

竊惟養士之本在於學校貞教端範在於督學之臣
我 祖宗以來最重此選非經明行修端厚方正之

士不以輕授如有不稱寧改授別職不以濫充且兩
京用御史外省用按察司風憲官爲之則可見居此
官者不獨須學行之優又必能執法持憲正己肅下
者而後能稱也記曰師嚴然後道尊道尊然後民知
敬學臣等幼時猶及見提學官多海內名流類能以
道自重不苟徇人人亦無敢干以私者士習儒風猶
爲近古近年以來視此官稍稍輕矣而人亦罕能有
以自重既無卓行實學以壓服多士之心則務爲虛
譚賈譽賣法養交甚者公開倖調明招請託又憚于
巡歷苦於校閱高虛會城計日行轉以故士習日改

民僞日滋以馳騫奔趨爲良圖以剽竊漁獵爲捷徑
居常則德業無稱從仕則功能鮮效 祖宗專官造
士之意駸以淪失幾具負耳去年仰荷 聖明 特
勅吏部慎選提學官有不稱者令其奏請改黜其所
以敦崇教化加意人才意義甚盛今且一年矣臣等
體訪各官卒未能改於其故吏部亦未見改黜一人
良以積習日久振盪爲艱冷面難施浮言可畏奉公
守法者上未必卽知而已被傷於衆口因循頽靡者
上未必卽黜而且博譽於一時故寧抗 朝廷之明
詔而不敢挂流俗之謗議寧壞公家之法紀而不敢

違私門之請託蓋今之從政者大抵皆然又不獨學
校一事而已臣等頃因南直隸提學御史褚鈇浙江
提學僉事喬因阜赴 閣會 勅因查 先朝以來
相傳舊稿所載提學職任本自崇嚴且別項官負
勅諭俱不開款獨提學 勅開款殆如國學監規之
制中間委任責成極其鄭重但居此官者不能着實
遵奉自隳職守夫 勅諭者所以命官分職而屬之
以事者也彼既不能遵奉 上命恪恭乃職而責士
子以率從其教不亦難乎臣等查得嘉靖初年 世
宗皇帝嘗詔吏部將天下提學官通行考察改黜蓋

僅有存者又詔禮部沙汰天下生員不許附學選
廩增之數今之士習凋敝已極卽按 先朝故事太
加洗滌亦豈爲過但臣等竊以爲積廢旣久舉當以
漸驟於操急人或不堪且約束不明申令不熟不獨
奉行者之罪亦在上者之過也臣等謹將 勅諭舊
稿再加酌擬附以近日題 准事例逐款開坐上請
聖裁備載 勅內仍昭示天下使居此官者知 上
之所以責之者如此則雖被怨蒙謗而有所弗恤人
之視之知彼之責任如此亦將斂手息喙而莫之敢
撓撫按以此覈其能否部院以此定其黜陟使人皆

知敦本尚實而不敢萌僥倖之心則振興人才之一大機也仍乞 勅下吏禮二部以後務要加意此官慎重其選其各見任提學官一體俱換與新 勅以便遵守書曰作新民堯使契掌教命之以勞來匡直輔翼又從而振德之今臣等所言非敢過爲操切亦不過申明舊章以作新振德之耳伏惟 聖明裁斷施行再照提調學校固憲臣之責而羣居教習又在儒學教官顧近來考貢之法太疎士之衰老貧困者始告授教職精力既倦於鼓舞學行又歉於模範優游苟祿潦倒窮途是 朝廷以造士育才之官爲養

老濟貧之地冗蠹甚矣今後凡 廷試歲貢生貢察臣等遵照 先朝事例嚴加考試有不堪者盡法黜落提學官照例提問降調其願就教職者該部先行考閱有年力衰憊者卽行揀返不准送試 廷試學業荒疎不堪師表者發下該部驗其年力尚壯送監肄業以須再試如年已衰不必發監遙授一職回籍榮身度官無冗曠士有師模十年之後人才當不可勝用矣謹題請 旨 勅諭提學官事理

計開

一 聖賢以經術垂訓國家以經術作人若能體認經

書便是講明學問何必又別標門戶聚黨空譚今後各提學官督率教官生儒務將平日所習經書義理着實講求躬行實踐以需他日之用不許別創書院羣聚徒黨及號招他方遊食無行之徒空譚廢業因而啓奔競之門開請託之路違者提學御史聽吏部都察院考察奏黜提學按察司官聽巡按御史劾奏遊士人等許各撫按衙門訪拏解發

一孝弟廉讓乃士子立身大節生員中有敦本尚實行誼著聞者雖文藝稍劣亦必量加獎進以勵頹俗若右平日不務學業嗚托公事或捏造歌謠興滅

訟及敗倫傷化過惡彰著者體訪得實不必品其惡藝卽行革退不許徇情姑息亦不許輕信有司教官開送致被挾私中傷誤及善類

一我 聖祖設立臥碑天下利病諸人皆許直言惟生員不許今後生員務遵明禁除本身切已事情許家人抱告有司從公審問倘有冤抑卽爲昭雪其事不甘已輒便出入衙門陳說民情議論官員賢否者許該管有司申呈提學官以行止有虧革退若糾衆扛幫聚至十人以上罵詈官長肆行無禮爲首者照例問遣其餘不分人數多少盡行黜退爲民

一國家明經取士說書者以宋儒傳註爲宗行文者以典實純正爲尚今後務將頒降四書五經性理大全資治通鑑綱目大學衍義歷代名臣奏議文章正宗及當代誥律典制等書課令生員誦習講解俾其通曉古今適於世用其有剽竊異端邪說炫奇立異者文雖工弗錄所出試題亦要明白正大不得割裂文義以傷雅道

一各省提學官奉勅專督學校不許借事枉道奔趨撫按官干求薦舉各撫按二司官亦不許侵伊職掌行事若有不由提學官考取徑自行文給與生儒巾巾及有革退生員赴各衙門告訴復學者卽將本生問罪革黜若提學官有行止不端怠玩曠職者許巡按御史指實劾奏

一該管地方每年務要巡視考校一遍不許移文代委及於隔別府分調取生儒以致跋涉爲害亦不許令師生匍匐迎送考畢卽於本地方發落明示賞罰不許攜帶文卷於別處發案致令吏書乘間作弊士子無所勸懲亦不許招邀詩朋酒友遊山玩水致啓倖門妨廢公務其水陸夫馬廩給隨帶吏書俱照常行

一提學官巡歷所屬凡貪污官吏單民不法重情及
教官干犯行止者原係憲司理當拏問但不許接受
民詞侵官喜事其生員犯罪或事須對理者聽該管
衙門提問不許護短曲庇致令有所倚恃抗拒公法
一廩膳增廣舊有定額迨後增置附學名色冒濫居
多今後歲考務要嚴加校閱如有荒疎庸耄不堪作
養者卽行黜退不許姑息有捏造流言思逞報復者
訪實拏問照例問遣童生必擇三場俱通者始收入
學大府不得過二十人大州縣不得過十五人如地
方乏才卽四五名亦不為少若鄉宦勢豪年託不

暗行中傷者許徑自奏聞處治

一兩京各省廩膳科貢皆有定額近來有等奸徒
他處人才寡少往往詐冒籍貫投充入學及有詭寫
兩名隨處告考或假捏士夫子弟希圖進取或原係
娼優隸卒之家及曾經犯罪問革變易姓名援納粟
納馬等例僥倖出身殊壞士習訪出嚴行拏問革黜
若教官納賄容隱生員扶同保結者一體治罪革罷
一府州縣提調官員宜嚴束生徒按季考校凡學內
殿堂齋房等屋損壞卽辨料量工修理其齋夫膳夫
學糧學田等項俱要以時撥給不許遲誤尅減

一 生員之家依洪武年間例除本身外戶內優免二丁差役

一 生員考試不諳文理者廩膳十年以上發附近去處充吏六年以上發本處充吏增廣十年以上發本處充吏六年以上罷黜爲民

一 儒學教官士子觀法所係按臨之日考其學行俱優者禮待獎勵其行履無過但學問疎淺者一次考驗姑行戒飭再考無進送吏部別用老病不堪者准令以禮致仕若卑污無耻素行不謹者不必試其一學卽掣問革黜

一 考貢照近日事例每歲將次年應貢生員限年六十以下三十以上屢經行舉者六人嚴加考選取其優者充貢定限次年四月到部聽候廷試文理不通者卽行停降年老哀憊者姑授與冠帶榮身不許但挨次濫貢其有停廩降廩者必考居一二等方許收復未收復者不許起送應貢如有濫貢及廷試發回五名以上提學官照例降調

一 補貢有缺務查人文未經到部果在一年以裏者將原給批咨硃卷追繳方取年力精壯文學優長者一人補貢定限該貢年分次年到部方准收考如有

不遵舊例將年遠貢缺濫補市恩者起送到部卽將
本生發回革廩肄業提學官叅究

一遇鄉試年分應試生儒名數各照近日題准事例
每舉人一名取科舉三十名此外不許過多一名兩
京監生亦依解額照數起送有多送一名者各監試
官徑行裁革不許入場

一名宦鄉賢孝子節婦及鄉飲禮賓皆國之重典風
教所關近來有司忽于教化學校是非不公濫舉失
實激勸何有今後提學官宜以綱常爲己任遇有呈
請務須核真非年久論定者不得舉鄉賢名宦非

始無議者不得舉節婦孝子非鄉里推服者不得舉
鄉飲賓僎如有妄舉受人請求者師生人等卽以行
止有虧論其從前冒濫混雜有玷明典者照近例徑
自查革

一所轄境內有衛所學校一體提調整理武職子弟
悉令習讀武經七書百將傳及操習武藝有願習舉
業者聽社學師生一體考校務求明師責成量免差
役其行止有虧及訓誥句讀音韻差訛字畫不端不
通文理者卽行革退

萬曆三年五月初三日奉 聖旨學校人才所係近

來各提學官不能飭躬端範精勤考閱只虛譚要譽
賣法市恩殊失 祖宗專官造士之意卿等所奏俱
深切時弊依擬再行申飭所開條件一一備載勅內
着各着實遵行有仍前違怠曠職的吏部都察院務
要指實考察奏黜不許徇情禮部知道

論邊事疏

昨該遼東巡撫張學顏等報稱達賊二十餘萬謀犯
遼東前哨已到大寧請六請糧急於星火至於上厓
聖慮 面諭臣等虜寇深以為憂比時臣等已
即 面奏暑月非虜騎上邊之時料無大事請寬

聖懷今據薊鎮總兵戚繼光揭稱諸酋久已解散
時下正議掣兵及臣使人於宣府密探西虜青把
都動靜則本酋一向方巢住牧未嘗東行遼東所報
皆屬夷誑賞之言絕無影響數日以來更不聞消息
矣臣等因此反切憂慮大兵家之要必知彼已審虛
實而後可以待敵可以取勝今無端聽一訛傳之言
遽爾倉皇失措至上動九重之憂下駭四方之聽
則是彼已虛實茫然不知徒借聽於傳聞耳其與風
聲鶴唳草木皆兵者何異似此舉措豈能應敵且近
日虜情狡詐萬一彼常以虛聲恐我使我驚惶疲於

奔命久之懈弛不備然後卒然而至措手不及是在
彼反得先聲後實多方以誤之之策而在我顧犯不
知彼已百戰百敗之道他日邊臣失事必由於此故
臣等不以虜之不來爲喜而深以邊臣之不知虜情
爲慮也兵部以居中調度爲職尤貴審察機宜沉謀
果斷乃能折衝樽俎坐而制勝今一聞奏報遂爾張
皇事已之後又寂無一語徒使 君父日焦勞於上
以憂四方而該部以題覆公牘謂足以了本兵之事
耳臣等謂宜 特諭該部詰以虜情虛實之由使之
知警且秋防在邇薊遼之間近日旣爲虛聲所動
誠疲困恐因而懈怠或至疎虞尤不可不一儆戒之
也臣等愚見如此伏惟 聖明裁斷施行

卽日奉 聖諭兵部前報虜賊數十萬欲犯遼東前
哨已到近邊朕心日夕懸慮今經旬日如何又聲息
杳然不知前賊果否入犯該鎮有無失事你部裏如
何通不以聞着從實說來

進 郊禮圖考疏

茲者恭遇 皇上肇舉 郊禋大典臣等謹輯 郊
禮新舊圖考 進呈 睿覽舊禮者 太祖高皇帝
所定也新禮者 世宗皇帝所定也按 天地之祭

自周以來或分或合其禮不一然大率合祭者爲多國朝自洪武以後一向合祭嘉靖年間始建分祭之制然議者咸以合祀爲便顧茲重典今且未敢輕議謹輯爲禮書二冊首叙分合沿革之由次具壇壝陳設規制圖次列儀注樂章等項而以臣等淺陋之見略述其槩竊附於後以備聖明他日裁擇且以仰贊明禋之萬一臣等又惟國之大事在祀祀之大者曰郊茲者皇上親郊之始正百辟具瞻之初况郊壇高曠霜露凝寒登降周旋禮文繁縟必須寅竭誠悃乃可孚格于重玄必須收斂精神乃能成全乎大禮雖聖敬乾誠昭格有素然茲當行禮之期凡起居飲膳念慮動止之間尤宜倍加謹慎務期積誠致潔真如上帝之降臨可也臣等又無任懇切祈望之至

萬曆三年十一月初三日奉聖旨覽卿等奏進

郊禮圖冊又導朕以積誠致潔恭承大祭具見忠敬朕知道了圖冊留覽禮部知道

郊禮新舊考附

國初建園丘於鍾山之陽以冬至祀天建方丘於鍾山之陰以夏至祀地洪武二年始奉仁祖淳

皇帝西向配享十年春始定合祀之制時以天地壇
 大祀殿未成暫于奉天殿行禮至十二年正月乃合祀於
 大祀殿仍奉仁祖配享命官分獻日月星辰嶽鎮海瀆山川諸神凡一十四壇三十二年更奉
 太祖高皇帝配享永樂十八年北京天地壇成每歲仍合祀如儀南京壇有事則遣官祭告
 洪熙元年奉太祖高皇帝太宗文皇帝同配享嘉靖九年初建園丘於大祀殿之南每冬至
 祀天以大明夜明星辰雲雨風雷從祀建方澤於安定門外每歲夏至祀地以五嶽五鎮四海瀆

瀆陵寢諸山從祀俱止奉太祖一位配享太宗之配其大祀殿則以孟春上辛日行祈穀
 祭奉太祖太宗同配享十年又改以啓蟄日行祈穀禮于園丘仍止奉太祖一位配享十七年
 秋九月詔舉明堂大享禮於大內之玄極寶殿奉睿宗獻皇帝配享玄極寶殿即舊欽
 天殿也是冬十一月上皇天上帝尊號十八年春行祈穀禮于玄極寶殿不奉配二十四年拆
 大祀殿改建大享殿命禮部歲用季秋奉請卜吉行大享殿禮隨又命仍暫行于玄極寶殿

隆慶元年 詔罷 祈穀 大享二祭復 玄極寶

殿仍名 欽安殿而 天地則分祀如 世宗所更

定云臣等謹按 國初 天地分祀至洪武十年

聖祖乃定爲合祀之制每歲以正月上辛日行禮于

南郊大祀殿 列聖遵行百六十餘年至 世宗皇

帝始按周禮古文復分建 南北郊俱壇而不屋

南郊以冬至 北郊以夏至行禮而二至之外復有

孟春 祈穀季秋 大享歲凡四郊焉隆慶改元

詔廷臣議郊祀之禮時議者並請罷 祈穀 大享

復合祀 天地于南郊 先帝深惟三年無改之義

祈穀 大享在 大內行禮不便從禮官議

罷之而分祀姑仍其舊益亦有待云爾夫禮因時宜

本乎人情者也 高皇帝初制郊禮分祀者十年矣

而竟定于合祀者良以古今異宜適時爲順故舉以

歲首人之始也卜以春初時之和也歲惟一出事之

節也爲屋而祭行之便也百六十餘年 列聖相承

莫之或易者豈非以其至當允協經久而可守乎今

以冬至極寒而裸獻於星露之下夏至盛暑而駮奔

於炎歊之中一歲之間六飛再駕以時以義斯爲戾

矣且 成祖文皇帝再造宇宙功同開創配享百餘

年一朝而罷之於人情亦有大不安者故世宗雖分建園方之制而中世以後竟不親行雖肇舉大享之禮而歲時禋祀止於內殿是斯禮之在當時已窒礙而難行矣况後世乎臣等愚昧竊以爲宜遵高皇帝之定制率循列聖之攸行歲惟一舉合祀之禮而奉二祖並配斯於時義之協於人情爲順顧郊禋重典今且未敢輕議謹稽新舊規制禮儀而畧述其槩以俟聖明從容裁斷焉

被言乞休疏

昨以御史劉臺論列具奏乞休伏奉聖旨卿亦忠

爲國不獨簡在朕心實天地祖宗所共降監彼

讒邪小人已有旨重處卿宜以朕爲念速出輔理

介浮言吏部知道欽此臣捧讀恩綸涕泗交集念

臣受先帝重託旣矢以死報矣今皇上聖學尚

未大成諸凡嘉禮尚未克舉朝廷庶事尚未盡

康海內黎元尚未咸若是臣之所以圖報先帝者

木聲其萬一也臣豈敢言去古之聖賢豪傑負才德

而不遇時者多矣今幸遇神聖天縱不世出之主

所謂千載一時也臣又豈可言去皇上寵臣以賓

師不名之禮待臣以手足腹心之託相親相倚依然

藹然無論分義當盡卽其恩款之深洽亦自有不能解其心者臣又何忍言去然而臣之必以去爲請者非不得已也蓋臣之所處者危地也所理者皇上之事也所代者皇上之言也今言者方以臣爲擅作威福而臣之所以代王行政者非威也則福也自茲以往將使臣易其塗轍勉爲異順以悅下耶則無以逭於負國之罪將使臣守其故轍益竭公忠以事上耶則無以逃於專擅之譏况今讒邪之黨實繁有徒背公行私習弊已久臣一口不去則此輩一口不便一年不去則此輩一年不便若取臣之行而行者卽其近似而議之則事事皆可以爲作威事事皆可以爲作福賄賂之譫日聒於耳雖皇上聖明萬萬不爲之投杼而使臣常負疑謗于其身亦豈臣節之所宜有乎此臣之所以輾轉反側而不能不惕於衷也伏望皇上憐臣之志矜臣之愚特賜罷歸以解羣議博求廊廟山林之間必有才全德備之士旣有益于國而又無惡於衆者在皇上任之而已臣屢瀆宸嚴無任戰慄隕越之至

萬曆四年正月二十六日奉聖旨卿精誠可貫天日雖負重處危鬼神猶當護佑讒邪陰計豈能上千

天道朕亦知卿貞心不貳決非衆口所能搖惕已遣
司禮監隨堂官往諭朕意卿宜卽出視事勉終先
帝顧託勿復再辭吏部知道

謝恩疏

昨該臣以被論乞休未蒙 俞允今日伏蒙 聖恩
特降 御筆諭元輔 先帝以朕幼小付託先生先
生盡赤忠以輔佐朕不辭勞不避怨不居功 皇天
后土 祖宗必共鑒知獨此畜物爲黨喪心狂俊恃
言動搖 社稷自有 祖宗法度先生不必如此介
意只思 先帝顧命朕所倚任保安 社稷爲重卽

出輔理朕嘗惓惓此望特賜燒割一分手盒二副

春酒十觥用示眷懷先生其欽承之慎勿再辭欽此

該司禮監太監孫隆恭捧到臣私寓臣謹焚香望

闕叩頭祇領訖念臣賦性愚戇處事乖方雖楛被乎

惡言實自貽乎伊感仰塵 聖念遣慰再三載降

宸綸匪頒稠疊惡彼讒慝直欲爲有北之投鑿此悃

誠固止其居東之請捧誦未畢涕淚交零竊念臣矢

死報 國本其素心因毀乞骸殊乖本願緣未舍砥

名礪行之小節忽自忘忍耻成事之大忠茲奉 誨

言乃發深省夫事惟求諸理之至當心奚必於人之

盡知况臣款款之愚既特予於昭鑒則諸叟叟之
口誠無足爲重輕謹當仰體聖懷益殫赤烟冰霜
自保雖嫌恣以奚辭社稷是圖何髮膚之敢惜臣
不勝感戴激切之至

萬曆四年正月二十七日奉聖旨覽奏謝知卿勉
出輔理朕心乃悅知道了禮部知道

乞宥言官疏

伏蒙發下鎮撫司打問御史劉臺一本該文書官
兵得用口傳聖旨劉臺這厮讒言亂政着打一
百充軍擬票來行欽此臣謹欽遵與同官二臣商確擬

票問竊伏自惟古之聖賢所最惡者讒言亂政之人
大舜曰朕疾讒說殄行震驚朕師若不在時候以明
之捷以記之大學曰惟仁人放流之屏諸四夷不與
同中國良以讒說之人以是爲非以非爲是其意不
過欲誣害良善以洩其怨憤狠毒之私而其實乃至
於覆人國家故雖以帝舜之仁孔子之聖猶畏而惡
之如此今皇上之痛惡劉臺欲加重處是卽大舜
之疾頑讒孔子之所謂惟仁人能惡人者也臣又何
敢引嫌自避不爲皇上除讒去惡以定國是顧
臣思之臺言官也前日御史傳應禎虛捏旨意誣

損 聖德 皇上欲廷杖之臣竊以 皇上一向虛
已受諫今一旦衆辱此人將使居言路者畏懼自保
而不敢正言故再三爲之懇乞荷蒙 聖慈俯從
曲賜寬宥免其箠杖天下莫不稱仁焉今臺之讒狠
亂國其罪固不減於應禎然其所誣詆者臣也比之
君父則相懸矣前應禎誣訕 皇上臣以言官之故
猶爲乞免今臺誣害臣臣以被害之故卽欲盡法是
臣以所惡於下者事 上而愛 君父不如愛已身
臣不敢也又臣觀臺疏中尚有垂白父母在家臣實
惻然憐之夫彼之背本又噬恐爲不義固自忘其
及彼父母之心豈不念其子耶箠楚之下死生難
料萬一被創而死以憂及其父母或致並殞則於
皇上如天之仁或亦有所歉焉而臣之心又大有不
能自安者矣伏望 聖慈俯鑒臣愚免其 廷杖請
戍重罪薄加退斥以警頑讒則 皇上不行浸潤之
哲與 赦過宥罪之仁並行而不悖矣臣非敢違
旨市恩以沽流俗之譽蓋亦事理合當如此伏惟
聖明垂允焉

萬曆四年二月初七日奉 聖旨這等讒狠姦人卿
還申救他可謂忠慈之至姑准從寬該衙門知道

奉諭看詳民本疏

伏蒙 發下山東魚臺縣民屈琛一本奏許本縣鄉官僉事隨府違法事情該文書官孫斌口傳 聖旨這本說隨府曾受業於屈琛是他師長乃敢非理誣害可擬旨拏來處治欽此臣等仰見 皇上留心政務於四方民情靡不周覽又惡其以弟子而犯師長欲加重治誠振揚法紀矯正頹薄之大機也臣等不勝欽服但叅詳屈琛所奏僉起於劉軫之告訟歸咎於隨府之唆使遂發其平日不法事情若使其言果實則隨府之罪誠宜重治但此項民本其中亦多誣罔不實之辭若徑擬 旨拏問恐因而開告訐之門長刁訟之風嘉靖年間王聯趙祖鵬等事可鑒也似宜照常下都察院臣等傳示 聖意令其行與山東巡按御史從公審鞫所奏果實卽將隨府叅提問罪若有虛捏自宜坐以誣告之條庶四方民隱無不畢達而無情者亦不得盡其辭矣

新刻太嶽張先生文集卷四十

請重修

大明會典疏

准禮部手本該禮科給事中林景暘等題爲 泰道
方亨 國家閒暇懇乞 聖明及時修輯 成憲以
垂永圖以光 繼述大孝事要將弘治十五年以後
事例 命官編輯增入 會典等因該本部覆稱大
明會典一書卽唐宋六典會要之遺意以昭一代之
章程垂萬年之成憲至精且當顧其爲書成於弘治
之末年至今代更 四聖歲踰六紀典章法度不無

損益異同其條貫散見於簡冊卷牘之間凡百有司
 艱於考據諸所援附鮮有定畫以致論議煩滋法令
 數易吏不知所守民不知所從甚非所以定國是而
 一人心也嘉靖年間世宗皇帝嘗命儒臣續修
 會典自弘治十五年至嘉靖二十八年而止已經
 進呈未蒙刊布隆慶二年都御史孫應鱉亦嘗奏
 請彙輯嘉靖事例附入會典今給事中林景暘等
 復申前請委於政理有裨但今兩朝實錄尚未
 告成披閱校正日不暇給若復兼修會典未免顧
 此失彼合行翰林院候實錄進呈畢日另行題

請開館掄選儒臣分局纂修仍先行文各該衙門選
 委司屬官將節年題准見行事例分類編集呈送堂
 上官校勘明白候開館之日送入史館以備采擇
 等因萬曆二年五月初六日奉聖旨是欽此欽遵
 手本到閣臣等恭照會典一書於昭代之典章
 法度綱目畢舉經列聖之因革損益美善兼該比
 之周官唐典信為超軼矣顧其書創修於弘治之壬
 戌後乃闕如續編於嘉靖之己酉未經頒布又近年
 以來好事者喜於紛更建議者謬諳國體條例紛紜
 自相抵牾耳目淆惑莫知適從我祖宗之良法美

意幾於淪失矣今幸 聖明御極百度維新委宜及
今編輯成書以定一代之章程垂萬年之典則先該
科臣建議該部題覆比時委因 兩朝實錄未成勢
難兼理今 穆宗皇帝實錄 進呈已久 世宗皇
帝實錄編纂已完臣等刪潤功亦將畢催督繕寫計
歲終可以 進呈所有編纂諸臣在館稍暇前項欽
奉 明旨續修 會典一節相應及時舉行合候
命下查照弘治嘉靖年間事例擇日開館 命官纂
緝仍乞 勅下禮部照依先題事理催各該衙門將
見行事例選委司屬官素有文學者分類編緝送館
備錄其一應纂修事宜及合用官員職名容臣等陸續
續開具奏 聞謹題請 旨 奉
聖旨是禮部知道

世宗御筆疏

先該臣等 面奏以 皇上聖齡日長乞 留神政
務 省覽章奏暇時間取 皇祖世宗皇帝所親批
舊本 覽閱以爲裁決庶務之法已荷 聖明嘉納
茲臣等恭查 閣中所藏 皇祖親筆 聖諭六十
三道 御製四十四道 聖旨并票帖共七十道又
於纂修館中揀得嘉靖十年起至二十年止 親批

奏題本共六十五本 進上 睿覽恭惟我 世祖
天縱聰明 繼統之後二十年間勵精圖治孜孜問
學其 英謨睿斷誠有非前代帝王所能及者伏望
皇上萬幾之暇 特加省閱則致理之方不外於
法 祖而得之矣

請擇有司蠲逋賦以安民生疏

竊惟致理之道莫要於安民書曰民惟邦本本固邦
寧民安邦固卽有水旱盜賊敵國外侮之虞而人心
愛戴乎上無土崩瓦解之勢則久安長治之術也然
欲安民又必加意於牧民之官方今 聖明在上

卑郡邑長吏固莫不爭自淬勵勉修職業以求無負
於明時但虛文矯飾舊習尚存剝下奉上以希聲譽
奔走趨承以求薦舉徵發期會以完簿書苟且草率
以逭罪責其實心愛民視官事如家事視百姓如子
弟者實不多見故 皇上雖有安民之心而上澤不
得以下究者職此之故也臣等思得明春又當外官
考察之期一舉一措乃天下嚮背所係伏望 聖明
特勅吏部令其預先虛心訪覈各有司官賢否惟以
安靜宜民者爲最其沿襲舊套虛心矯飾者雖浮譽
素隆亦列下考撫按以此覈屬官之賢否吏部以此

別撫按之品流 朝廷以此觀吏部之藻鑒若撫按
官不能悉心甄別而以舊套了事則撫按官爲不稱
職矣吏部宜秉公汰黜之吏部不能悉心精覈而以
舊套了事則吏部爲不稱職矣 朝廷宜秉公更置
之庶有司不敢以虛僞蒙上而實惠旁乎元元之大
幸也臣等又查得隆慶六年六月 詔書一欵自嘉
靖四十二年四十四年四十五年并隆慶元年錢糧
除金花銀不免外其餘悉從蠲免其二年三年四年
各量免十分之三至於淮安徐州以水患廣東惠潮
二府以兵傷則并隆慶二年三年亦從蠲免 恩至

渥矣乃該地方猶不能追納至萬曆二年戶部乃議
於拖欠七分之一中每年止帶徵三分而民猶以爲苦
何也蓋緣各有司官不能約已省事無名之征求過
多以致民力殫竭反不能完公家之賦其勢豪大戶
侵欺積猾皆畏縱而不敢問反將下戶貧民責令包
贖近來因行考成之法有司官懼於降罰遂不分緩
急一槩嚴刑追併其甚者又以資貪吏之囊橐以致
百姓嗷嗷愁嘆盈閭咸謂 朝廷催科太急不得安
生夫出賦稅以供上者下之義也憐其窮困量行蠲
免者上之恩也於必不可免之中又爲之委曲調處

是又恩之恩也今乃不知感戴而反歸過於上則有司官不能奉行之過也然愚民難以戶曉損上乃可益下須賴 皇上力行節儉用度漸舒又以比虜納款邊費稍省似宜曲垂寬恤以厚下安民合無 勅下戶部查各項錢糧除見年應徵者分毫不免外其先年拖欠帶徵者除金花銀遵 詔書仍舊帶徵外其餘七分之中通查年月久近地方饒瘠再行減免分數如果貧瘠不能完者悉與蠲除以甦民困至於漕運糧米先年亦有改折之例今查京通倉米足支七八年而太倉銀庫所積尚少合無比照先年事例

將萬曆五年漕糧量行改折十分之三分派糧多及災傷地方徵納夫糧重折輕旣足以寬民力而銀庫所入又藉以少克是足國裕民一舉而兩得矣臣等待罪輔弼日夜思所以佐 皇上布德元元輯寧邦本計無便於此者伏乞 聖明採納施行生民幸甚

萬曆四年七月初六日奉 聖諭吏戶二部 朕

奉 天子民注存邦本思欲固國安民必得良有司加意牧養近來各地方官雖頗知守已奉法然虛文粉飾舊習未除今朝覲考察在邇着吏部悉心訪察各官賢否惟以牧愛宜民者爲最其有弄虛文事趨

謁剝下奉上以要浮譽者考語雖優必寘下等并撫按宮一體論黜近又聞各有司官催徵錢糧不分緩急一槩嚴併又畏縱富豪奸猾偏累小民致有流離失所者朕甚憫之今後除見年應納錢糧不免外其以前稅欠着戶部分別年月久近分數多少具奏蠲免萬曆五年漕運糧米暫行改折十分之三以寬民力各着實奉行

考滿辭免 恩命疏

茲者臣以一品九年考滿該吏部題奉 聖旨朕元輔受命 皇考匡弼朕躬勲德茂著茲一品九年考滿

恩禮宜隆着加特進左柱國陞太傅支伯爵俸兼官照舊給與應得誥命遠寫勅獎勵賜宴禮部廕一子做尚寶司司丞以稱朕褒答忠勞至意欽此有 命自天措躬無地伏念臣本以謏陋謬秉 台衡受先帝顧托之隆荷 皇上倚毗之重禮之以師傳待之以腹心 異數隆施駢至疊錫亦欲罄其狗馬之力用以少答 高厚之恩而學術迂疎行能淺薄朝夕獻納不過口耳章句之麤手足拮据率皆法制品式之未心力徒竭績效罔聞茲當九載課績之期正應三考黜幽之典豈謂旣逃於顯斥乃尤濫被乎

殊恩退自省循若臨淵谷臣聞有非常之才然後有非常之功有非常之功乃可受非常之賞五等厚祿三公峻階饗賜大烹廕承延世皆所謂非常之賞也雖先朝名臣碩輔耆德元勳膺此數者蓋亦無幾臣何有功德可以堪承若不揣分義之安必自速顛隳之咎此所以展轉思惟不敢以爲榮而深以爲懼也除勲階 勅獎 誥命賜恩不敢瀆辭謹已恭領其諸 特典萬非所堪伏望 皇上俯鑒愚誠 收回成命俾臣得安義勉效馳驅則 皇上施推心之愛百朋未足爲榮而愚臣保知足之規九死不敢

報臣不勝感激惶懼之至

萬曆四年十月十九日奉 聖旨卿以碩德宏才夙佐 皇考親承 顧命輔朕冲年閱歷滋深忠勞獨茂功在 社稷澤被生民茲特循彝典加恩猶未愜于朕志卿宜勉遵成命副朕眷懷所辭不允吏部知道欽此

考滿謝 手勅 加恩疏

茲者臣以一品九年考滿該吏部題奉 聖旨踰例加恩臣自揣愚分不安謹已具疏辭免隨 遣中使頒賜銀五十兩貯絲四表裡內大紅織金胸背斗牛

一表裡羊三隻茶飯卓五卓酒三十甌新鈔五千貫
臣疊荷 恩施已不勝感戴矣今日又蒙 特遣司
禮監隨堂太監孫秀齋奉 御筆手勅諭元輔先生
親受 先帝遺囑輔朕冲年今四海昇平四夷賓服
實賴先生匡弼之功先生精忠大烈朕言不能述官
不能酬惟我 祖宗列聖必垂鑒知陰祐先生子孫
世世與國咸休也茲歷九年考績特於常典外賜銀
二百兩坐蟒蟒衣各一襲歲加祿米一百石薄示褒
眷先生其欽承之勿辭欽此又該文書官太監孫得
勝齋 獎勵勅書一道各恭捧到臣私第臣謹焚香

叩頭祇領訖伏念臣謬司鼎鉉歷有歲年親承 先
帝憑几之言特荷 皇上倚衡之寄雖嘗誓捐辱質
勉竭苦心而戴 高厚者有難報之恩肩繁重者無
可底之績日申月飾特 祖宗已試之規夕惕朝乾
乃臣子本然之分論 君德則聰明自天而淺學無
裨諳治功則謀猷惟 后而綿力何有愆尤徒積汰
斥爲宜豈意 聖明復從甄叙穹階世賞既按功令
以宣麻 宸藻奎章復歷 睿思而 賜札嘉乃丕
績居然虞廷讓美之風惟公德明藹矣周宣毗賢之
命重以寶案精鏤之貺兼之綺衣赤紱之榮不稼不

耕久已被素殮之刺非勲非戚乃冒膺詔祿之恩瞻此駢施灼然異數將控辭而弗獲欲酬報以奚由惟當益殫疲蹙勉效馳驅知我者天卽違俗而違惜許身于國惟盡瘁以爲期臣無任激切感戴之至

再辭 恩命疏

昨以一品九年考滿荷蒙 聖恩踰例陞賞臣自揣分義不安具疏辭勉奉 聖旨卿以碩德宏才夙佐皇考親承 顧命輔朕冲年閱歷滋深忠勞獨茂功在社稷澤被生民茲特循彝典加恩猶未愜于朕志卿宜勉遵成命副朕眷懷所辭不允吏部知

此 天聽未回氷兢愈切敢陳微悃再控 宸嚴臣聞人之受享各有分量受過其量鮮不爲灾譬之雨澤所以生物過多或反有傷甘膳所以養人太飽亦能致疾臣幸以一介庸豎爲 帝者師紆朱拖紫揖讓 人主之前當軸秉衡平章軍國之重所謂千載一時之遇也乃自受任以來 宸綸蕃錫 異數殊恩所以加于臣者歲無虛月雖膏雨普潤而臣之被澤爲獨隆江河同飲而臣之臄腹已先飽矣及茲止足猶懼滿盈若復浸灌不已貪饕無厭其有不至於灾患者乎欲貴雖人同情履危良亦可畏與其貪得

以速答何如自抑以圖存臣雖至愚豈不自審且太
傳之秩古謂三公 本朝文臣無居此者惟嘉靖初
年大學士楊廷和曾奉 命特加旋亦辭免彼 定
策元老猶不敢當臣何人斯可以叨冒至於伯祿部
宴符丞之廕雖 先朝輔臣間有蒙被者然或因一
事而偶加或以積久而漸及固未有不諭功閥一朝
而盡畀之者夫以 國典之所未嘗予者而臣獨冒
然以受之昔人之所未曾備者而臣乃兼得而有之
豈惟天道所忌蓋亦公論不平早夜思惟如負芒刺
用是不避煩瀆復陳其愚伏望 聖慈曲垂矜宥

臣得以其未盡之力勉效驅馳是 皇上之所以厚
臣而保其終也臣于冒 天威無任隕越悚慄之至
萬曆四年十月二十二日奉 聖旨朝廷設立三
公之職用弘化理得賢則授自古已然朕以卿精忠
大勲經邦論道厥惟其人特進崇階允乎公論至于
增祿宴廕等項亦皆 累朝優禮輔臣常典安得以
盛滿爲嫌過執謙遜其尚體朕至意毋復固辭吏部
知道欽此

三辭 恩命疏

頃以拜 恩踰分再疏辭免奉 聖旨朝廷設立三

公之職用弘化理得賢則授自古已然朕以卿精忠大勲經邦論道厥惟其人特晉崇階允孚公論至于增祿宴廕等項亦皆累朝優禮輔臣常典安得以盛蒲爲嫌過執謙遜其尚體朕至意毋復固辭吏部知道欽此捧誦 溫綸愈深跼踖欲仰承 恩眷則分不自安將再瀆 宸嚴又懼貽重譴思惟展轉寢食靡寧然臣所以屢控而終不能已者非矯也緣臣前歲以遼東大捷荷蒙 聖恩欲加陞廕臣具疏辭免中間引古俠士酬報知己之義以及人臣敬事後食之心每欲事過所受功浮於食犬馬之誠於是乃

安自今凡非分之 恩踰格之賞無復濫及庶大義克盡微志獲伸等因已荷 聖明俯垂矜允又特加綸獎風勵臣工是臣之微誠旣已仰孚於 聖鑒臣之愚忠又已盟心而自許矣乃今未有尺寸之效以自副其功浮於食之心而非分之 恩踰格之賞又復濫及則臣向之所以陳辭者不過矯飾之虛言而 皇上之所以許臣者亦未爲相信之深至矣臣不敢自背其言上以欺 主外以欺人故不避煩瀆瀝血陳誠必望 聖慈特垂俞允倘微志終伸卽通候之爵未爲榮萬鍾之祿不爲富矣臣屢冒 天威

無任戰慄隕越之至 萬曆四年十月二十五日奉
聖旨卿有定國安民大功加秩賜祿未足酬賞乃猶
固執謙遜至于再三朕覽所奏詞益用懷歎茲重違
卿意特准辭免太傅伯祿成卿忠志用立臣極其餘
常典悉宜勉承以見君臣相體之義慎勿又辭該部
知道欽此

請叙錄日講諸臣疏

臣等伏覩 皇上踐祚以來日 御講筵孜孜問學
隆冬盛暑未嘗少間而侍講諸臣申時行等亦夙夜
在公勤誠匪懈在諸臣以勸講為職雖竭忠盡

所當然豈敢有所希覬但臣等竊以為敬事後食者
人臣靖共之心有勞必錄者 明主激勸之典况

先朝於日講官亦每 特加優禮所以重 聖學也
今 皇上聰明日開聞見日廣雖 天挺英資匪由
學習而諸臣開導啓沃之功亦似有不可泯者伏望
聖慈俯軫諸臣微勞酌其年資量加陞級以示激勸
勅下吏部詮註遵行夫諸臣效勞愈深則 皇上典
學之功愈進諸臣之被 恩愈渥則 朝廷崇儒之
典愈光矣

辭

加恩疏

昨該臣等以講讀諸臣學士申時行等效勞年久乞
恩陞級以示激勸茲該文書官孫斌口傳 聖意俯
念臣等提調講讀亦有勤勞欲一體 加恩令臣等
具擬上 請欽此臣等伏奉 綸音不勝感激敢不
欽遵以仰承 恩眷但念臣等猥以淺薄俱蒙 皇
上簡任輔弼弼輔弼之職上則培養 君德翼贊 廟
謨下則表率羣僚修明庶政其職最爲繁重最難稱
塞若提調講讀不過職分中之一事實與諸臣之專
供一職者不同雖每日趨侍 講筵改定講義亦

過總其大綱率領諸臣以供事而已又何功之可言
何勞之可錄夫掠人之美以自爲功謂之竊無其實
而冒其賞謂之忝忝與竊臣等不敢爲也伏望 皇
上俯鑒微忱免厯 聖念所有 加恩一節萬不敢
承止將原本擬票上 請伏乞 聖裁臣等仰蒙
恩念不勝感激圖報之至

議處就教舉人疏

昨該禮部開送乞 恩就教舉人臣等會同翰林院
掌院事學士申時行遵奉 欽依出題考試取中上
卷八卷中卷三百三十六卷俱堪授教職已經封卷

進 呈訖臣等又查得先年就教舉人多授以府州縣學訓導之時令其以舉人署教事仍准下科會試一次三年之後考其年力精壯通達民事者乃陞有司正官次則量轉學正教諭以次漸陞有司蓋以就教舉人皆未經國學作養故使之分署教職資其廩給以進學習事為將來用之之地也近年以來此意寔失舉人乞 恩者槩授以學正教諭絕無除訓導者不及三年卽陞知縣又以願就者多學正教諭缺少除授不盡則縱令回籍下科仍以舉人會試之後始從選除甚非政體由是舉人以就教為捷徑不復

坐監而 祖宗造士作人之意寔以不存臣愚竊以為居今之時欲盡復初制固非人情所堪亦宜酌議釐正以教士習合無 勅下吏部將今次臣等所定上卷八卷及中卷十名以前俱授以州學正中卷二百名以前俱授縣學教諭二百名以後俱授以府州縣各人才衆多所在儒學訓導仍俱准下科會試一次三年之後考其有才力能治民者始陞授有司正官今次查有見缺盡與除授如負缺不穀省令在部聽候陸續選除毋得徇情縱令回籍致乖政體以後年分俱照例施行如此則舉人不敢僥倖於徑截之

引大奇文集卷四十一
途而國學由此充實亦作興人才之一端也

請停止

內工疏

該文書官立得用口傳 聖旨 慈慶 慈寧兩宮
着該衙門修理見新只做迎面欽此臣等再三商確
未敢即便傳行竊惟治國之道節用爲先耗財之原
工作爲大然亦有不容已者或居處未寧規制當備
或歷歲已久敝壞當新此事之不容已者也於不容
已者而已之謂之陋於其可已而不已謂之侈二者
皆非也恭惟 慈慶 慈寧乃 兩宮聖母常御之

所若果規制有未備敝壞所當新則臣寺仰體 皇
上竭情盡物之孝不待 聖諭之及已卽請 旨修
建矣今查 慈慶 慈寧俱以萬曆二年興工本年
告完當其落成之日臣等嘗恭詣闕視伏覩其 巍
崇隆固之規彩絢輝煌之狀竊以爲 天宮月宇不
是過矣今未踰三年壯麗如故乃欲壞其已成更加
藻飾是豈規制有未備乎抑亦敗壞所當新乎此事
之可已者也况昨該部該科屢以工役繁興用度不
給爲言已奉 明旨以後不急工程一切停止今無
端又興此役是 明旨不信於人而該部科必且紛

紛執奏徒彰 朝廷之過舉茲臣下之煩言耳方今天下民窮財盡國用屢空加意撙節猶恐不足若浪費無已後將何以繼之臣等灼知 兩宮聖母欲皇上祈 天永命積福愛民亦必不以此爲孝也臣等備員輔導凡可將順豈敢抗違但今事在可已因此省一分則百姓受一分之賜使天下黎民萬口同聲祝 聖母之萬壽亦所以成 皇上之大孝也伏望 聖慈俯鑒愚忠將前項工程暫行停止俟數年之後稍有收壞然後重修未晚臣等干冒 宸嚴任悚慄之至

萬曆五年五月二十一日上隨該文書官口傳

聖旨先生忠言已奏上 聖母停止了

嶺西大捷辭免 加恩疏

昨蒙 發下兵部題數廣東羅旁大捷請叙錄有功人員本臣已酌量擬票上請茲該文書官孫斌口傳聖旨廣東大捷全是先生每運籌都該廕賞改票來行欽此臣等不勝感激不勝惶悚茲者嶺西之役兵不踰時而俘獲四萬有餘拓地千里之遠誠爲殊常大捷然此皆 祖宗垂祐 皇上聖武布昭下則將士用命之所致也臣等參預 密勿適會成功有何

勞勤敢冒 恩賞况前已奉 旨以後邊功不許叙
及輔臣臣等又豈敢身自犯之伏望 聖明俯鑒臣
等愚衷所有 加恩一節 特賜停寢庶臣等犬馬
微分得以少安謹將原票封 進隨奉 聖諭廣東
大捷實賴先生每運籌賜元輔銀一百兩蟒衣一襲
彩段四表裡次輔二各銀八十兩四表裡欽此

奏請

聖母裁定 大婚吉期疏

該文書官送下欽天監一本題稱 皇上大婚禮擇
於十二月大利然未定有年分臣等恭照 祖

聖婚期多在十六歲出幼之年 英宗皇帝九歲登

極正統七年正月成婚 武宗皇帝十五歲登極正

德元年八月成婚 世宗皇帝亦十五歲登極嘉靖

元年九月成婚皆在十六之年今 皇上聖齡方在

十五 中宮亦止十四歲若待來年十二月則過選

婚之期一年有餘於事體未便若卽用今年十二月

則又太早矣該監又稱一年之間止利十二月餘月

皆有礙臣等竊惟帝王之禮與士庶人不同凡時日

禁忌皆民間俗尚然亦有不盡然者臣等素性愚昧

不信陰陽選擇之說凡有舉動只據事理之當爲時

勢之可爲者卽爲之未嘗拘泥時日牽合趨避然亦往往誤蒙天幸動獲吉利况 皇上爲 天地百神之主一舉一動皆將奉職而受事焉又豈陰陽小術可得而拘禁耶仰惟 兩宮聖母旣已慎選賢淑作配 聖躬臣等亦豈不欲及早贊成嘉禮以爲萬年嗣續之計以慰四海仰望之心但如該監所言實未穩便適聞文書官向臣等說 聖母慈意亦欲候明年二三月萬物發生之時舉行 大禮仰惟 聖母睿見極其允當考之古禮皆以仲春會男女桃夭之咏見於風人今若定以春時則旣有合於天地交而物化醇之意且當 聖齡十六又率遵乎 累朝列聖之規不遲不早最爲協中天婚姻大事人道所重然必待父母之命媒妁之言自天子以至於庶人一也今此 大禮亦惟取裁於 聖母之一言耳仰煩 睿思再加斟酌定以明歲或取三月春煖之時或用四月清和之候 諭下臣等傳示各衙門遵行其該監本合無姑且 留中以俟 裁定施行隨該文書官口傳 聖母諭先生說的是今定以明年三月次日奉 御批欽天監本 朕奉 聖母慈諭着於明年三月內擇吉行禮

纂修書成辭 恩命疏

昨奉 聖諭以 皇祖實錄書成 命臣等撰勅加恩監修總裁官臣自以官品已極涯分久踰不敢再叨謹欽遵將英國公張溶并同官二臣擬勅上進茲該文書官立得用口傳 聖旨 皇祖四十五年實錄字字句句都是先生費心看改幾次我盡知道先生恩該首加却怎的不擬這勅着另改擬了總行欽此臣恭聞 寵命愧懼交并追惟我 皇祖世宗皇帝實錄自 先帝嗣統之初已卽降纂修之命一向因循廢閣竟未脫藁迨臣當事始定爲章程

期限然後責成有據端緒可尋其中編摩草創雖皆出於諸臣之手然實無一字不經臣刪潤無一事不經臣討論旣更定其文義復讐校其差訛窮日逮夜冒暑凌寒蓋五年於茲而今始克就鞭駑策蹇寧靡寸勞况書成加恩 累朝盛典 皇上按故事錄微勞臣卽循例仰承亦豈得爲溢濫但臣有匹夫微志碌碌欲以自遂者向已屢控 宸嚴茲敢再陳素悃臣以羈單寒士致位台鼎 先帝不知臣不肖臨終親握臣手屬以大事及遭遇 聖明 眷倚彌篤寵以賓師之禮委以心膂之託 渥恩殊錫豈獨 本

朝所無考之前史亦所希覲每自思惟古之節士感
遇知已然諾相許至於扶面碎首而不辭旣已存亡
死生矣而猶不矜其能不食其報况君臣分義有不
可逃于天地之間者乎用是盟心自矢雖才薄力儻
無能樹植鴻鉅以荅 殊眷惟於 國家之事不論
大小不擇閒劇凡力所能爲分所當爲者咸願畢智
竭力以圖之嫌怨有所弗避勞瘁有所弗辭惟務程
功集事而不敢有一毫覲 恩謀利之心斯於臣子
分義庶乎少盡云爾故自 皇上臨御以來所加於
臣文武錄廕不啻四五矣而臣皆未敢領昨以九年

任滿 皇上欲授臣以三公之官給臣以五等之祿
臣亦懇疏陳辭必得 請而後已豈敢異衆爲高以
沽流俗之譽哉蓋素所盟誓者至重不敢自背其初
心故也近年以來君臣之義不明敬事之道不講未
有尺寸卽生希冀希冀不得輒懷缺望若執左契而
責報于 上者臣竊非之每欲以身爲率而未能也
今乃以楮筆供奉之役卽叨橫 恩渥澤之施則平
日所以勸勉諸臣者皆屬矯僞人誰信之此臣所以
展轉思惟有不能一日自安者也臣聞人臣事君無
隱情無二辭今臣所言皆已真吐肺腸辭理俱竭藉

惟 皇上復申前命臣亦不過再執此辭而章奏屢騰言語煩瀆非 皇上以手足腹心待臣之義也萬望 聖慈俯鑒愚衷 特賜停寢俾臣微志獲伸雖蔬食沒齒有餘榮矣所有改 勅一節萬不敢擬謹將原稿封 進伏乞 聖裁施行

萬曆五年八月二十一日奉 聖旨卿 社稷大功不止纂修一事乃屢辭恩命遜美弗居覽奏真忠大義深激朕衷特允所辭以成卿勞謙之美風激臣工仍宣付史館昭垂萬世該部知道欽此

論決重囚疏

昨該司禮監太監孫得勝口傳 聖旨奉 聖母諭今歲大喜命臣等於刑科三覆奏本上擬 旨斷不行刑欽此仰惟 聖母慈悲不殺之仁 皇上聖明好生之美臣等敢不仰承以廣 德意但查我 祖宗舊制凡官吏軍民人等犯該死罪有決不待時者有監至秋後者鞫問既明悉依律處決未有淹禁累年不行處斷者至嘉靖末年 世宗皇帝以齋醮奉玄始有暫免不決之令或間從 御筆所勾量行處決然此實近年姑息之弊非我 祖宗垂憲之典也夫春生秋殺天道所以運行雨露雪霜萬物因之發

育若一歲之間有春生而無秋殺有雨露而無雪霜則歲功不成而化理或滯矣明王奉若天道其刑賞予奪皆奉天意以行事書曰天命有德五服五章哉天討有罪五刑五用哉若棄有德而不用釋有罪而不誅則刑賞失中慘舒異用非上天所以立君治民之意矣臣等連日詳閱法司所開重犯招情有殺祖父母父母者有毆死親兄及同居尊屬者有殺一家非死罪三人者有強盜劫財殺人者有鬪毆逞兇登時打斃人命者據其所犯皆絕滅天理傷敗彝倫仁人之所痛惡覆載之所不容者天欲誅之而皇

上顧欲釋之其無乃違上天之意乎康誥曰惟迪茲不于我政人得罪天惟與我民彝大湣亂曰乃其速由文王作罰刑茲無赦言彼寇攘姦究不孝不友之人所犯至於如此若爲政者不加以罪則天與我民之常道將至於泯滅而壞亂必須速依文王所作之法刑之而無赦此書乃皇上近日所講習者夫文王視民如傷古所稱仁聖之主而於此等之人亦必刑之而無赦者良以爲惡之人彼自蹈於刑辟雖欲生之而不可得也且稂莠不鋤嘉禾不茂冤憤不泄戾氣不消今聖母獨見犯罪者身被誅戮之可

憫而不知被彼所戕害者皆含冤蓄憤於幽冥之中
明王聖主不爲之一泄彼以其怨恨冤苦之氣鬱而
不散上或蒸爲妖沴氛祲之變下或招致凶荒疫癘
之災則其爲害又不止一人一家受其荼毒而已獨
奈何不忍於有罪之兇惡而反忍於無辜之良善乎
其用仁亦舛矣况此等之人節經法司評審九卿大
臣廷鞫皆已衆證明白輸服無辭縱使今年不決將
來亦無生理不過遲延月日監繫牢獄耳然與其暗
繫牢獄而人不及知何如明正典刑猶足以懲奸而
伸法乎法令不行則犯者愈衆年復一年充滿囹圄

旣費關防又虧國典其於政體又大謬也伏願 皇
上念上天之意不可違 祖宗之法不可廢毋惑於
浮屠之說毋流於姑息之愛奏上 聖母仍將各犯
照常行刑以順天道若 聖心不忍盡殺或仍照去
年例容臣等揀其情罪尤重者量決數十人餘姑牢
固監候俟明年 大婚吉典告成然後槩免一年則
春生秋殺仁昭義肅並行而不悖矣臣等叨與密勿
此關係 朝廷大政 祖宗舊典不敢不盡其愚伏
惟 聖明裁擇

萬曆五年九月十四日文書官口傳



聖旨先生說的是今年照舊例行刑

卷四十一

新刻太嶽張先生文集卷四十一

聞憂謝

降諭宣慰疏

本月二十五日得臣原籍家書知臣父張
以九月十三日病故臣一聞計音五內崩裂茲者伏蒙
皇上親灑宸翰 頒賜 御劄朕今覽二輔所奏得
知先生之父棄世十餘日了痛悼良久先生哀痛之
心當不知何如里然 天降先生非尋常者比親承
先帝付託輔朕冲幼 社稷奠安天下太平莫大之
忠自古罕有先生父靈必是懼安今宜以朕爲念勉

抑哀情以成大孝朕幸甚天下幸甚欽此該司禮監
太監李佑恭捧到臣私第臣不忠不孝禍延臣父乃
蒙 聖慈曲軫哀憐犬馬餘生 慰諭優渥臣哀毀
昏迷不能措詞惟有痛哭泣血而已臣不勝激切哀
感之至

謝

遣官賜賻疏

臣於本月二十五聞臣父憂今日欽奉 聖旨賜臣
銀五百兩紵絲十表裡新鈔一萬貫白米二十石香
油二百斤各樣碎香二十斤蠟燭一百對麻布五十

疋該司禮監隨堂太監魏朝恭捧到臣私第臣謹
頭祇領訖伏念臣犬馬微生禱蒲賤質事 主不能
效匡扶之力事親不得盡菽水之歡以致抱恨終天
雖生猶歿仰荷 聖慈曲垂憫念昨既奉 慰諭之
懃惓茲又拜 錫賚之隆渥顧此 殊恩今昔罕覩
臣一家父子歿者啣環結草存者碎首捐軀猶不足
以仰報 聖恩於萬一也臣哀苦愚衷昏迷罔措仰
天泣血辭不能宣誠不勝激切感戴之至

萬曆五年九月二十七日

謝 兩宮太后賜賻疏

臣於本月二十五日聞臣父憂今日欽奉 仁聖皇太后懿旨賜臣銀五百兩紵絲十表裡新鈔一萬貫白米二十石香油二百斤各樣碎香二十斤蠟燭一百對麻布五十疋該 慈慶宮管事太監張仲舉恭捧到臣私第臣謹叩頭祇領訖伏念臣罪惡深重禍延臣父以致抱恨終天痛苦幾絕仰荷 慈恩垂憐犬馬殘生 諭慰諄切又 特頒厚賻赫奕充庭顧此 殊恩古今罕遇臣一家父子歿者啣環結草存者捐軀殞首猶不足以仰報 慈恩於萬一也臣哀苦愚衷辭不能布誠不勝激切仰戴之至

慈聖皇太后賻禮謝疏 同前

謝

卹典疏

臣於本月二十八日該禮部題爲卹典事欽奉 聖旨是朕元輔功在 社稷伊父卹恩委宜從厚着照例與祭葬仍加祭五壇各差官前去祭葬以示優眷欽此伏念臣負罪積愆禍延臣父仰荷 聖慈特頒恩卹塵 溫綸之俯賁視彝典而加優犬馬何有微勞烏鳥獲伸私悃古今罕遇存歿均霑臣雖糜骨捐軀莫能仰酬 洪造於萬一也臣哀苦病憊未能匍

匍 闕庭俯伏叩謝不勝激切仰感之至

萬曆五年十月初二日

乞 恩守制疏

臣於本月二十五日聞父訃音卽移咨吏部題請放
臣回籍守制隨該吏部題奉 聖旨朕元輔受 皇
考付託輔朕幼冲安定 社稷朕深切倚賴豈可一
日離朕父制當守君父尤重准過七七不隨朝你部
裏卽往諭着不必具辭欽此臣在憂苦之中一聞
命下驚惶無措臣聞受非常之恩者宜有非常之報
夫非常者非常理之所能拘也臣一介草茅忝司政

本十有餘年受 先皇顧託之重荷 聖主倚毗之

專無論平日所承 隆恩異數超軼古今卽頃者闈

憂之日 兩宮聖母爲臣惻惻 聖心感動爲臣悽

愴 慰吊之使絡繹道途 賻贈之賚充溢筐篚又

蒙 皇上親灑宸翰 特降聖書中間慰藉之懇渠

勉喻之諄切尚有溢於 聖言之外者臣伏而讀之

一字一淚雖旁觀逖聽之人亦無不傷心酸鼻者夫

自古人臣以忠結主商則成湯之於伊尹高宗之於

傅說周則成王之於公旦漢則昭烈之於諸葛亮其

隆禮渥眷辭命誥諭之文載在史冊至今可考固未

有謙抑下巽親信敬禮如 皇上之於臣若是之懇
薦者此所謂非常之恩也臣於此時舉其草芥賤軀
摩頂放踵粉爲微塵猶不足以仰荅於萬一又何暇
顧旁人之非議狗匹夫之小節而拘拘於常理之內
乎且人之大倫各有所重使幸而不相值則固可各
伸其重而盡其所當爲不幸而相值難以並盡則宜
權其尤重者而行之今臣處君臣父子兩倫相值而
不容並盡之時正宜稱量而審處之者也况奉 聖
諭謂父制當守君父尤重臣又豈敢不思以仰體而
酌其輕重乎顧臣思之 臣今犬馬之齒總五十有三

古人五十始服官政而 本朝服制止於二十七箇

月計臣制滿之日亦五十六歲耳此時自量精神體
力尚在強健 皇上如不以臣爲不肖外則操戈執

銳宣力於疆場內則荷橐持籌預議於帷幄遠邇閒
劇惟 皇上之所使雖赴湯火歿不敢避是臣以二

十七月報臣父以終身事 皇上昔人所謂報國之

日長報劉之日短者也如此則君臣父子之倫雖不
得以並盡而亦不至於相妨夫古人有銜哀赴官壘

縗從政者有金革之事則可妨今賴 皇上威德四

郊無壘九塞清塵故臣欲以其間少盡私情此臣之

所以籲 天泣血哀鳴而不能自己者也伏望 聖
慈垂念烏鳥微情 曲賜允許不惟臣之愚哀獲安
臣父有知亦啻感於九泉矣

萬曆五年十月初二日奉

聖旨卿薦孝至情朕非不感動但念朕昔當十齡
皇考見背丁寧以朕囑卿卿盡心輔導迄今海內又安
蠻貊率服朕冲年垂拱仰成頃刻離卿不得安能遠
待三年且卿身繫 社稷安危又豈金革之事可比
其強抑哀情勉遵前旨以副我 皇考委託之重勿
得固辭吏部知道欽此

再乞守制疏

頃者以臣父病故奏乞回籍守制伏奉 聖旨卿薦
孝至情朕非不感動但念朕昔當十齡 皇考見背
丁寧以朕囑卿卿盡心輔導迄今海內又安蠻貊率
服朕冲年垂拱仰成頃刻離卿不得安能遠待三年
且卿身繫 社稷安危又豈金革之事可比其強抑
哀情勉遵前旨以副我 皇考委託之重勿得固辭
吏部知道欽此 臣在痛楚困憊之中捧誦 綸音至
先帝顧託一節觸地號天肝腸寸裂夫人之相與然
諾相許猶能捐軀赴義歿且弗背臣於 國家糞土

草芥之臣耳 先帝不知臣不肖臨終託臣以大事
叮嚀付囑言猶在耳中道而背之雖施於交友然且
不可乃敢以此事吾君父而自蹈於誅夷之罪乎
蓋臣今所乞於皇上者非長往遠引背而去之之
謂也痛念臣父別來十有九年雖陟岵之懷時時在
念而以國家事重未敢言私竊常自擬俟皇上
大婚禮成暫乞一假歸省不圖一旦奄至於此使臣
抱恨終天今日雖得歸家亦知扳號無及但念臣父
生身恩重今縱不得再覩其音容然及其未殯憑棺
一慟身負簣土加於丘壠之上猶得少追其違曠之

咎以慰冥漠之魂比及禫除臣當不俟 宣召馳赴
闕庭以聽任使是臣未盡愚忠尚有俟於他日也若
此願不獲將負痛終身雖勉強在此而精神沮喪心
志昏迷發慮出謀必至乖舛或因而鬱鬱致病喪此
殘軀則忠孝君親兩俱有損此臣所以展轉惴惶
而不能已於哀鳴也夫君臣之義無所逃於天地之
間君之於臣欲其生則生欲其死則死命之進則進
命之退則退臣豈敢以區區螻蟻微情仰干大義之
重所以屢控而不止者亦恃皇上平日諒臣之深
眷臣之薦憑寵怙恩而覬幸於一獲耳臣連日

痼切窮苦心蘊結而難紓語荒迷而無次惟 聖慈
哀憐臣下情不勝瀝血投淚懇切祈望之至

萬曆五年十月初五日奉

聖旨覽奏詞益哀懇朕惻然不寧但卿言終是常理
今朕冲年國家事重豈常時可同連日不得面卿朕
心如有所失七七之期猶以爲遠矧曰三年卿平日
所言朕無一不從今日此事卻望卿從朕母得再有
所陳吏部知道欽此

謝 賜甜食疏

伏蒙 聖母 皇上特遣近侍官孫良尚銘到臣私

第 頒賜甜食二盒茶食二盒又傳奉 慈諭

節哀自愛臣謹叩首祇領不勝感戴 天恩之至

萬曆五年十月初四日

三乞守制疏

比者臣再疏陳乞伏奉 聖旨覽奏詞益哀懇朕惻

然不寧但卿言終是常理今朕冲年國家事重豈常
時可同連日不得面卿朕心如有所失七七之期猶
以爲遠矧曰三年卿平日所言朕無一不從今日此
事卻望卿從朕母得再有所陳吏部知道欽此又聞
同官二臣言昨送本官將臣奏本到閣傳奉 聖意

云雖上百本亦不能從嗟乎古語云犬馬之誠不能動人譬人之誠亦不能動天臣始不信今乃見之臣前後所奏哀苦迫切之情非不仰觸 聖心也悲鳴號泣之聲非不上徹 天聽也然竟不能徼一二之幸於萬分之中者仰窺 皇上之心不過以數年以來舉天下之重盡屬於臣見臣鞠躬盡瘁頗稱 意指將謂 國家之事有非臣不能辦者此殆不然也夫人之才識不甚相遠顧 上用之何如臣之不肖豈真有卓犖超世之才奔軼絕塵之力惟 皇上幸而用之故臣得盡其愚耳今在廷之臣自輔臣以至於百執事孰非臣所引薦者觀其器能咸極一時之選若 皇上以用臣之道而用諸臣諸臣以臣心之慮而事 皇上將臣平日所稱聖賢道理 祖宗法度此兩言者兢兢守之持而勿失則固可以端委 廟堂而天下咸理是臣雖去猶未去也何必專任一人而使天下賢者不得以各效其能乎且臣尚有老母年亦七十二歲素嬰多病昨有家人到致臣母意囑臣早歸田野之人不知 朝廷禮法將謂臣父既沒理必奔喪屈指終朝倚闔而望今若知臣求歸未得相見無期鬱鬱懷思因而致病則臣之心益有不能

自安者矣。皇上方以孝養。兩宮何不推此心以
及臣之母乎。夫人之最難遣者。憂思之情也。臣本孱
弱之軀。數日之間。上戀君恩。下念父母。欲留既不
可欲去。則未能抱此沉思寢食俱廢。若使憂能傷人。
則臣之身亦有不能自保者矣。皇上誠欲用臣。何
不生全之。以責他日之效乎。臣聞歎歎不擇音。今臣
情勢窘急。無可奈何。跼地號天。誠不自知其詞之過
激。而有干於嚴譴也。惟聖慈哀其愚而矜許之。臣
無任拭淚救血懇切仰干之至。奉

聖旨。朕爲天下留卿。豈不軫卿迫切至情。恐相違拒。
但今日卿實不可離朕左右。着司禮監差隨堂官一
員同卿子編修嗣修馳驛前去營葬。卿父完日。即迎
卿母來京侍養。用全孝思。卿宜仰體朕委曲眷。臣至
意。其勿再辭。該衙門知道。欽此。

謝 降諭慰留疏

臣三疏陳情未蒙 俞允。今日該司禮監太監何進
恭捧 御筆 諭元輔。朕以冲幼。賴先生爲師朝夕
訥誨。以匡不逮。今再三陳乞守制於常理。固盡於
先帝付託大義。豈不鮮終。况朕學尚未成。志尚未定。
一日二日萬幾。尚未諳理。若先生一旦遠去。則數年

啓沃之功盡棄之矣先生何忍已有旨特差司禮監
官同先生子前去造葬事完便就迎接先生老母來
京侍養以慰先生孝思務要勉遵前旨入閣辦事豈
獨爲朕實所以爲社稷爲蒼生也萬望先生仰體
聖母與朕惓惓懇留至意毋勞又有所陳欽此念臣
以一縷微情屢瀆天聽方跋伏苦由以待譴誅乃
荷聖慈曲垂矜宥旣違其抗違之罪又申之慰
勉之辭念臣情切送終特遣樞臣而造葬知臣心
懸歸省遂將老母以偕來眷念周詳卹存懇至實
曠古所未聞之盛事皆人臣不當得之殊恩臣伏
地頂天叩心雪涕乾坤並育何獨憐於蟲豸之
微雨露隆施乃徧潤於根莖之朽念茲罔極欲
報奚繇苟可藉手於一酬寧惜闔門之千指臣無任
仰戴天恩激切哀感之至

乞暫遵諭旨辭俸守制預允歸葬疏

頃者臣三疏陳情伏奉聖旨朕爲天下留卿豈不
軫卿迫切至情忍相違拒但今日卿實不可離朕左
右着司禮監差隨堂官一員同卿子編修嗣修馳驛
前去營葬卿父完日卽迎卿母來京侍養用全孝思
卿宜仰體朕委曲眷留至意其勿再辭該衙門知道

欽此又奉 聖諭朕以冲幼賴先生爲師朝夕納誨以匡不逮今再三陳乞守制於常理固盡於 先帝付託大義豈不鮮終况朕學尚未成志尚未定一日二日萬幾尚未諳理若先生一旦遠去則數年啓沃之功盡棄之矣先生何忍已有旨特差司禮監官同先生子前去造葬事完便就迎接先生老母來京侍養以慰先生孝思務要勉遵前旨入閣辦事豈獨爲朕實所以爲 社稷爲蒼生也萬望先生仰體 聖母與朕惓惓懇留至意毋勞又有所陳欽此臣迫於一念微情蠢愚不能自解憑恃 寵眷屢瀆 宸嚴

不加譴訶已爲厚幸乃又仰塵 聖心曲加體恤施之以禮之所不當得以伸其追慕之情資之以力之所不能爲以遂其懷歸之願凡可以安臣之志而慰臣之私者皆親勞 聖慮屈已下逮爲臣圖之無論臣心悲感啣結凡朝士大夫見者聞者無不惻切歎頌皆以大義責臣謂 殊恩不可以橫干 君命不可以屢抗旣以身任 國家之重不宜復顧其私臣連日枕塊自思且感且懼欲再行陳乞恐重獲罪戾且 大婚期近 先帝之所付託與 國家之大典禮莫此爲重乃一旦委而去之不思效一手一足之

力雖居田里於心寧安用是茹忍哀悰不敢再申前
請謹當恪遵 前旨候七七滿日不隨朝赴閣辦事
日侍 講讀但乞 聖慈俯諒愚哀容令在官守制
所有應支俸薪 准令盡數辭免一應 祭祀吉禮
俱不敢與入侍講讀及在閣辦事俱容青衣角帶出
歸私第仍以縗服居喪凡章奏應具銜者仍容加守
制二字使執事不廢於公朝下情得展於私室臣職
子道庶幾少全再惟人子事親送終爲大臣父雖蒙
特恩遣官治窆然窀穸之事必躬必親乃可無悔今
卜地營塋須明年三四月間乃可竣工計此時 大

禮已成 國務稍暇至期仰懇 聖恩仍容臣乞假
一行送父歸窆便迎臣母一同來京臣得了此一念
則自此之後皆報 國之日矣臣不識進止敢預乞
俞旨以爲他日請行之地伏惟 聖慈矜許臣不勝
感激祈望之至 奉

聖旨卿爲朕勉出朕心始慰這所奏俱准歸窆一節
還候旨行吏部知道欽此

謝 賜點心甜食疏

今日伏蒙 聖母仁聖皇太后特遣司房太監劉彥
保到臣私第 頒賜甜食一盒七品點心一盒又傳

奉 慈諭天氣寒冷着臣節哀自愛臣謹叩首祇領
不勝感戴 天恩之至

又

今日伏蒙 聖母慈聖皇太后 皇上特差答應近
侍李忠到臣私第 頒賜上用甜食二盒素點心四
盒卷簽麪筋二盒又傳奉 慈諭天氣寒冷少要煩
惱臣謹叩頭祇領不勝感戴 天恩之至

乞恢

聖度宥愚蒙以全國體疏

禮回籍守

比因翰林院編修吳中行等疏言臣等
制至有詆臣為忘親貪位者以致上干

怒俱獲

重譴又蒙

特降

聖諭宣示百官朕

天明命

為天下君進退予奪朕實主之豈臣下

自擅元

輔張居正受

皇考顧命輔朕幼冲摠

猷弼成

化理以其身任

社稷之重豈容一日去朕左右茲

朕體其至情厚加恩卹凡人子所以榮親送終之典

備極隆異元輔孝思已無不盡亦不在此一行且綱

常人紀君臣為大元輔既受

皇考付託義不得復

顧其私為朕倚任義不得恣然自遂朕為

社稷至

計懇切勉留羣臣都當助朕留賢繼是同心為國巨

柰羣奸小人藐朕冲年忌憚元輔忠正不便已私乃

借綱常之說肆爲擠排之計欲使朕孤立於上得以任意自恣殊爲悖逆不道傾危社稷大傷朕心茲已薄示處分用懲奸罔凡爾大小臣工宜各明于大義恪共職業共成和衷之治如或黨奸懷邪欺君無上必罪不宥欽哉故諭欽此該禮部刊布到臣臣傷痛之餘驚魂未定忽聞朝廷有此處分心悚神悸寢食靡寧臣聞非常之元必致惑於衆庶經生之見每堅守其故常夫惟聖人在天子之位乃能執義理之中正建皇極以導民固非經生學士之所能窺也臣雖不肖鄒魯之教習聞之矣束髮修行至於白

首雖一言一動之微猶兢兢如執玉捧盈罔敢失墜况事關綱常人紀士君子立身大節而可苟焉以自越於名教乎自從初計以至於今其叩心泣血呼號於旻天之下者不啻三四矣乃臣也請之彌哀而皇上留之愈固留之而不得至於親勞萬乘之重爲臣圖慮私情特遣心膂之臣爲臣經理家事則朝廷之恩至於不可復加而臣之苦心殆顛連而無告矣夫臣所遇之時何時也所居之任何任也所事之君何君也所受之恩何恩也皇上舉人子之力不能致者而悉以昇臣臣乃不以人臣之所當

爲者而效之於上。是尚得爲人類矣乎。臣於此時誠道盡途窮。莫知所出。故不得已而爲辭。俸守制之請。又不得已而爲預訂歸葬之請。意欲暫遵諭旨以慰皇上之心。而預陳悃誠。徐爲乞歸之計。誠萬萬不得已而爲之者也。旣荷聖慈矜允。又許以歸。爽一節候旨而行。臣竊以爲君親二念。庶可曲全而無害矣。乃今議者不達皇上所以懇切留臣之意。又不白臣所以委曲順命之忠。徒見三年之喪。古人所重。奪情之事。治世非宜。舉其經文之說。紛紛瀆擾。遂致上千天怒雷霆。洊驚杖責。編遣曾不

少貸。又特降宣諭。讓諸臣以欺藐君父。忌憚排擠。則旣虧國體。又傷聖心。而臣之微衷。尤有惕然不寧者矣。夫域中三大君。居其一。臣欺其上。罪不容誅。諸臣皆素知章句者。今方責臣以不能盡子道。乃敢先自蹈於不臣之罪乎。况皇上聰明聖智。曠世間出。臣往見大小臣工。一瞻天表。輒欣慶累日。每聞朝廷行一政。出一令。輒舉手吐舌。謂明見萬里。方傾心仰戴之不暇。而敢萌欺藐之念乎。如臣之愚。凡所注措。惟知求利。國家不能取諧。流俗以此致恨。理或有之。若謂欺藐君父。則臣固知其必

無也方今 聖明在上百工濟濟臣每切慶幸以爲
雍熙太和之美庶幾復見今被二三狂童無端生此
一釁使 君父挾見欺之心以臨臣而臣下蒙欺上
之罪以事 主臣 主之間猜懼互起情悃隔闕議
論滋多則安靜和平之福必不克以終享此臣所爲
深惜也今言者已詆臣爲不孝矣斥臣爲貪位矣詈
臣爲禽獸矣此天下之大辱也然臣不以爲耻也夫
聖賢之學有遯世不見是而無悶者人臣殺其身有
益於君則爲之况區區些言議非毀之間乎苟有以成
臣之志而行臣之忠雖被惡名不難受也臣之所懼

獨恐因是而益傷 皇上之心大虧 國體之重鑿

混沌未萌之竅爲將來無窮之害耳今諸臣已被譴
斥臣不敢又救解於事後爲欺世盜名之事前已奏
稱遵 諭暫出今亦不敢因人有言又行請乞以自
背其初心但連日觸事驚心憂深慮切故敢陳其縷
縷之愚伏願 皇上恢弘天地之量洞開日月之明
察兆心仰戴之誠憫迂儒拘孿之見卓然自信盡輝
羣疑今後凡有言者諒其無知勿與較計寧使愚臣
受辱毋致有傷 聖心仍乞 鑒臣初請俟 大禮
既成放臣歸葬則紛紛之議不俟禁諭而羣喙自息

矣臣不勝震懼墮越懇切祈望之至 奉

聖旨朕爲卿備加恩卹曲全父子之情卿爲朕抑情
順命實盡君臣之義於綱常人紀何有一毫虧損這
廝每明係藐朕冲幼朋興詆毀欲動搖我君臣傾危
社稷卿雖曲爲解說於法決是難容所奏朕以具悉
卿亦務勉遵諭旨用成大忠大孝以終 顧託之重
勿以浮言介懷欽此

謝 召見疏

昨該鴻臚寺少卿陳學曾等傳奉 聖諭以臣父喪
七七期滿 召臣於初六日吉期入閣辦事今日又

蒙 特差文書官孫斌 宣臣入見於 平臺臣以

此者臣父不幸仰荷 聖恩賜吊賜賻又 遣官治

葬卹典殊常臣於 國家未有尺寸之功叨此 隆

恩感洞心膺致詞稱謝伏奉 上諭先生孝情已盡

了朕爲 社稷屈留先生先生只想 父皇付託的

意思成全始終纏是大忠大孝欽此臣仰聆 玉音

悲感哽塞伏奉 皇上前後 諭旨委曲懇切臣愚

敢不仰體又昔承 先帝執手顧託誓當以歿圖報

今日豈敢背違但臣賦性愚直凡事止知一心爲

國不能曲徇人情以致叢集怨讎久妨賢路今日若

得 早賜放歸不惟得盡父子微情亦可保全晚節
 伏蒙 上諭先生精忠為國的心 天地 祖宗知
 道 聖母與朕心知道那羣奸小人乘機排擠的自
 有 祖宗的法度處治他先生不必介懷欽此又蒙
 諭今日好日子先生可就閣辦事欽此隨蒙 頒賜
 銀五十兩綵段四表裡與酒飯喫仍 命文書官孫
 斌送臣到 閣臣當於 禁門叩謝 兩宮聖母恩
 賚卽遵 旨赴 閣辦事訖念臣哀苦衷懷難勝重
 任摧殘形狀有玷清班揆諸情禮之宜惟以縱歸為
 當乃蒙 聖慈不加厭棄曲賜慰留起諸苦塊之中
 還畀絲綸之寄釋其苴杖假以冠裳預消吉旦以
 傳宣 特御內臺而接晉 恩光下濟藹然家人父
 子之親 顧答頻煩寧止魚水君臣之契既服 訓
 辭之諄切復蒙 殊錫之駢蕃至於 聖念之懃倦
 難以名言而頌述臣於此際更復何辭惟當益竭衷
 丹矢堅精白今雖暫援而止靖共之念不敢少懈於
 斯須儻終得請而歸銜結之忱尚欲勉圖於異日臣
 下情無任激切感戴之至

謝 內府供給疏

先該臣奏乞辭俸在京守制已蒙 聖明俞允茲該

內府各衙門傳奉 聖旨元輔張先生俸薪都辭了
他平素清廉恐用度不足着光祿寺每日送酒飯一
卓各該衙門每月送米十石香油二百斤茶葉三十
斤鹽一百斤黃白蠟燭一百枝柴二十扛炭三十包
服滿日止欽此臣仰荷 恩施愈深惶悚竊惟頃者
辭俸守制之舉正欲別於居官食祿之臣得奉 俞
音始安微分今乃叨此 大賚所入更爲加豐月分
內府之儲日給大官之饌是所辭者少而所受者多
旣博虛名而又獲實利貪饕已甚廉節奚存不獲不
耕益重風人之刺繼粟繼肉謬叨賓禮之隆雖 聖
慈不靳於鴻施在微臣實盈於鼉腹將聚族而共食
豈一飯之敢忘臣下情無任激切感戴之至

謝 免自陳疏

頃以星變示警仰蒙 聖明俯納言官所陳飭舉考
察之典令京堂官皆自陳不職以聽汰黜臣雖已辭
俸守制然猶奉 旨入閣辦事日侍 講讀實與事
故離任者不同昨該同官二臣爲臣題請伏奉 聖
旨元輔本朕再四勉留又准辭俸守制着不必自陳
吏部知道欽此臣聞三公爲大臣之首築免宜先中
書乃政本之司感召爲切臣才品最下學術尤疎居

台府已踰十年總樞機又且六載上不能燮調元化
佐明主以察璣衡下不能振舉宏綱率羣僚而修
品式諸所注措每見乖違積此釁愆殆非朝夕故
玄緯示掃除之象在愚臣實罪戾之尤謂宜亟賜
汰除庶以少懲瘼曠豈意聖慈曲垂弘庇既遣黜
幽之典復寬自劾之章俾以墨纒仍叅密務臣謬
蒙恩宥愈切凌競退自省循若爲消弭謹當澡心
自勵克已知非洗垢刮癩雖莫追於既往拾遺補過
期有救於將來臣下情無任激切感戴省悔圖報之
至

請別遣大臣以重大禮疏

今日該文書官送本到閣見有戶科給事中李涑
一本內稱大婚吉禮臣有服制不宜與執事請乞
改命等因伏奉聖諭昨李涑說大婚禮不宜命先
生供事這廝却不知出自聖母面諭朕說先生盡
忠盡不的孝重其事總命上公元輔執事行禮先生
豈敢以臣下私情違悞朝廷大事先朝奪情起復的
未聞不朝叅居官食祿今先生都辭了乃這大禮亦
不與可乎看來今小人包藏禍心的還有每遇一事
卽借言離間朕今已鑒明了本要重處他因時下喜

事將近姑且記着從容處他先生只遵 聖母慈命
要緊明日起暫從吉服勿得因此輒事陳辭欽此臣
捧誦 恩綸不勝感激不勝欽仰卽宜遵奉無事賣
辭但其事之本末外廷之臣或不及知而以臣爲有
所踰越以干 大禮臣不得不一言以自明先該禮
部題 大婚納采問名請 欽命大臣二員充正副
使行禮該文書官丘得用口傳 聖旨傳示 聖母
慈諭這大禮還着元輔一行以重其事又說忠孝難
以兩盡先生一向青衣角帶辦事固是盡孝但如今
吉期已近先生還宜暫易吉服在閣辦事以應吉典

出到私宅任行服制欽此昨日又節奉 聖諭朕
聖母慈諭賜元輔坐蟒胸背蟒衣各一襲該文書官
丘得用口傳又口傳 聖旨着於十九日起俱吉服
辦事欽此此臣被 命充使奉 諭從吉之由也伏
念臣前者具奏遵 旨暫留原以 大禮期近圖効
犬馬微勞以終 顧命之重然亦自知服色不便不
可與執事辱 大典乃蒙 天語諄諄傳示 聖母
慈諭謂 先朝舊典凡 大婚納采問名發冊奉迎
皆用班首勲臣及 內閣首臣將命又委曲 諭臣
暫易吉服從事蓋 聖母與 皇上以腹心手足待

臣實與羣臣不同故凡國家大事皆欲臣為之管領而臣亦妄信其愚不敢以羣臣自處凡可以撫忠效勞者皆不避形迹不拘常禮而冒然以承之且士民之家其父母有大喜慶事為之子孫者亦不敢以已之私忌而違父母之使命况事關君父而臣又臣子之最親信者乎然此實非外臣之所能窺衆人之所可喻也但聞之古禮吉凶異道不得相干變服從吉委為未妥李涪所奏其意雖不可知而其言未為不是伏望聖慈俯從所論以禮使臣奏上聖母容臣仍以初服在閣辦事凡一應典禮所當行者謹當夙夜匪懈悉心措畫以贊襄嘉禮之成不敢辭勞惟是遣命充使一節懇乞聖慈別遣大臣一員將事免令臣與庶大典不致於溷辱而臣之初心亦得以少安矣奉聖旨卿只遵奉慈命勿以小人之言自阻禮部知道欽此

謝 皇太后慈諭疏

欽奉 聖母慈聖皇太后慈諭 皇帝大婚禮在邇我當還本宮不得如前時常常守着看管恐皇帝不似前向學勤政有累聖德為此深慮先生親受先

帝付託有師保之責比別不同今特申諭交與先生
務要朝夕納誨以輔其德用終先帝付託重義庶
社稷蒼生永有賴焉先生其敬承之故諭外賜坐蟒
蟒衣各一襲綵段八表裡銀二百兩用示惓惓懇切
至意欽此該司禮監隨堂太監張鯨慈寧宮管事
牌子太監謹柯恭捧到臣私第臣謹叩頭祇領訖臣
捧誦恩綸悲感交集追念壬申之夏先帝不豫
召臣等於御榻前該司禮監太監馮保宣讀遺
囑以皇上付託比時臣親聞我聖母在帷中口
諭云江山社稷要緊先生每務盡忠爲國臣伏地

慟哭至於失聲自惟才微力小不能勝此重任又念
聖齡方幼睿質未充臣等外臣雖欲竭駑駘効犬
馬然燕見之時有限開導之益益寡九重天遠高
卑迥隔豈能日侍左右以調護起居輔養德性
每念及此心切皇皇仰賴我聖母天篤慈仁
躬親教育居則同宮寢則對榻使非禮之言不得一
聞於耳邪媒之事不敢一陳於前凡一面命耳提諄
諄教戒不曰親近賢輔則曰聽納忠言不曰懷保小
民則曰節省浮費益我聖母之於皇上恩則慈
母也義則嚴師也至於臣之孤忠直道屢被儉邪誣

詆搖撼亦惟我 聖母 深加鑒亮 曲賜保全故
臣得以益堅自信盡展其愚自 皇上臨御以來於
茲七年以 聖躬則純真未鑿天然完固以 聖學
則精勤靡懈日就光明以內則道泰時清民安物阜
以外則百蠻歸款九塞塵清揆厥所由繫誰之力歟
仰惟我 聖母陰功至德豈獨慰我 穆考憑九之
託其二祖 列聖在天之靈實默鑒之今海內臣
民歌誦 聖德推原本始者亦惟祝願我 聖母壽
康福祉等同天地以保子孫黎民於億萬年也茲奉
誥諭以 慈駕還宮慮看管之少踈恐 聖德之有

累委臣以師保之責勉臣以匡弼之忠 寵錫駢蕃
開喻懇切臣捧讀未竟涕泗橫流念臣昔承 先帝
顧託之重旣矢以爲 國忘家捐軀殉 主矣其在
今日敢不益摭忠藎圖報 國恩但 內禁外廷地
勢自隔臣謨 母訓聽納懸殊自茲以後尚冀我
聖母念 祖宗基業之重 天位保守之難凡所以
擁護 聖躬闡導 聖學者尤望時加 訓迪勿替
夙恩臣知 皇上純孝性成必能仰承 慈意服膺
罔懈也至於進藎忠言弼成 聖政則臣分義所宜
自盡者雖微 慈諭猶當思勉况奉 教督諄諄敢

不整竭愚衷對揚 休命臣誠不勝感激祈望之至
奉

聖旨覽卿奏謝 聖母具悉忠愛知道了禮部知道
欽此

乞遵守 慈諭疏

伏蒙 頒示 聖母勸勉 慈諭說與 皇帝知道
爾婚禮將成我當還本宮凡爾動靜食息俱不得如
前時聞見訓教爲此憂思爾一身爲 天地神人之
主所係非輕爾務要萬分涵養節飲食慎起居依從
老成人諫勸不可溺愛在席任用匪人以貽我憂這

箇便可以祈 天永命雖虞舜大孝不過如此爾敬
承之勿違欽此 臣等俯而捧讀仰而嘆曰大哉我
聖母之訓乎龜鑑藥石不足以喻其明切也淵哉我
聖母之德乎明德宣仁不足以為之比倫也竊聞父
母愛子必教之以義方弗納於邪乃爲真愛子於父
母必服從其教訓不貽父母之憂乃爲至孝况我
皇上一身承 祖宗基業之重爲 天地神人之主
比之士民之家其所關係寧止萬倍故我 聖母諄
諄教戒皆發於 天性至慈根於心而不容自己者
蓋惟其愛之也深故其訓之也切惟其訓之也切益

見其愛之之深也至於慎起居節飲食毋溺衽席毋用匪人數語者尤爲緊切帝王所以養德養身之要舉不外此伏望 皇上仰體 慈心服膺 明訓不徒聽從於面命尤必允蹈於躬行 大婚禮成之後視朝講學比前更宜勤敏至於 晏息幸御尤望萬分保愛萬分搏節心存兢業儼如 聖母之在前身服 教言恒若 慈音之在耳則 聖壽可等於松喬 聖德可媲於堯舜 宗社億萬年無疆之慶實在於此此乃 皇上之至孝所以仰承 聖母之真愛者也臣等不勝欽仰祈望之至

奉

御批

聖母慈訓朕當拳拳服膺尚賴卿等朝夕納誨左右匡弼庶克有成覽奏知道了該衙門知道欽此

新刻張太岳先生文集卷四十一

新刻張太岳先生文集卷四十二

遼東大捷辭免

加恩疏

伏蒙 發下遼東巡撫都御史張學顏報捷一本欽
奉 聖諭昨見遼東捷報非常卽奏 聞 聖母蒙

面諭朕云賴 天地 祖宗默佑此時正爾行嘉

禮之際有此大捷乃國家之慶我心甚喜元輔運籌
廟謨二輔同心協贊纔得建此奇功我勉留張先生
這是明效朕恭對云 聖母慈諭的是茲恭述以示
先生等知一應敘錄宜從優厚稱朕惓惓仰體 聖

母至意欽此臣等捧讀 恩綸不勝欣躍不勝感激
看得遼東一鎮切鄰虜巢數年以來無歲無警邊民
苦於侵掠官軍疲於戰守邇賴 皇上聖明留神邊
備軫念該鎮將士比諸邊獨苦加賑加賞大需 殊
恩增餉增兵數破常格以故將士感奮咸思樹立以
圖報稱前擒王杲斬馘一千有餘繼戰平虜獲級二
百之上至於今次建功尤爲奇特出邊二百餘里斬
獲四百三十彼之精銳咸就殲夷我之損傷止於一
卒使東胡破膽頓消窺伺之謀西虜驚心益謹款關
之約誠該鎮百餘年間未有之奇勲也且當 嘉禮

肇行之期 慈御移居之日而捷音凱奏千里飛傳

文德武功一朝咸萃臣等列職丞弼恭逢盛事欣
慶踴躍萬倍恒情然此實 上帝申庥 祖宗垂佑

我 皇上天威遠震諸將士戮力用命之所致也臣
等以章句腐儒竊祿禁近曾靡尺寸仰贊廟謨乃荷
宸綸謬加獎鑒又恭述 聖母惓惓倚眷至意尤

踰尋常臣等內自省循誠不知將何爲報也夫有非
常之功者宜受非常之賞今該鎮捷報實爲非常俟
兵部題覆本上臣等謹遵 諭擬賞悉從優厚至於
臣等則先已奉 旨不得侵冒邊功臣居正又屢次

張九岳文集卷四十二
奏辭俱荷 聖慈俞允今次若欲 加恩則萬萬不
敢叨承者也臣等不勝欣忭感切之至

辭

上巾恩賞疏

慈者伏蒙 聖恩以今日臣等恭視 皇上整容上
巾禮成 特賜臣居正銀一百兩紵絲六表裡臣調
陽臣四維每銀八十兩紵絲四表裡及講官申時行
等正字馬繼文等亦各 賚及臣等被 命之餘愧
汗沾背仰惟 天恩寵賚豈敢抗違奔走效勞乃臣
子常分自舉行 大禮以來臣等節被 恩施不二

而足至於今次所 賚尤爲踰常內自省循實爲忝
竊卽講讀諸臣亦每向臣等言無勞叨賞於心不安
伏乞 聖慈俯鑒愚誠容臣等將今次 恩賚辭免
仍送該衙門交收庶 橫恩不至於屢濫愚心亦得
以少安臣等不勝愧悚懇切之至

奉

聖旨朕上巾始謂成吉奉 聖母慈命賜賚卽內監
咸與况輔相豈可後不獨爲一侍視先生等宜欽承
慈眷并示講讀諸臣勿辭欽此

再辭遼東大捷

張力岳文集 卷四十二
三
加恩疏

伏蒙 發下兵部覆遼東禦虜功次本敘及臣等該
文書官丘得用口傳 聖旨前有諭先生每運籌有
功該加恩敘錄擬旨來行欽此 天恩下逮綸旨傳
溫臣等不勝感激但央機奮勇執銳披堅本諸將士
之力卽該鎮督撫官親總戎行者猶不可與之並論
况臣等官列 禁近職在論思仰賴 皇上威德遠
播屢殲醜虜邊境輯寧臣等因緣遭際霑被 寵榮
已爲萬幸豈敢又貪冒 天功妄希 恩賚况前已
有 明旨不許敘及閣臣之功臣等又曾屢辭恩命
今若因此復行叨冒是 明旨不信於人而臣等前
次具辭皆出於矯飾耳內自省循事體欠妥所有
恩命終不敢當謹將兵部本遵奉 前諭俱從厚擬
賞其 加恩臣等一節必望 聖慈俯鑒愚誠 特
賜停寢庶功賞不至於混濫愚分亦得以少安臣等
抗違 寵命不勝戰慄惶悚之至

奉

聖旨該鎮大捷實卿等運籌之功陞廕非濫旣懇辭
朕勉從賜元輔銀一百兩彩段六表裏次輔二各八
十兩四表裏以示褒嘉該衙門知道欽此

乞歸葬疏

臣於去年九月二十五日聞臣父憂屢疏乞請回籍守制未蒙 俞允仰荷 聖恩特遣司禮監官爲臣父造葬 降諭慰留至再至三臣不得已奏乞暫遵諭旨辭俸在京守制仍候 大婚禮成再請歸葬奉 聖旨卿爲朕勉出朕心始慰這所奏俱准歸葬一節還候旨行吏部知道欽此比時臣仰沐 恩眷殊常誠不忍一旦背而遠去又知 聖意堅定若實擾不已必獲重譴且 大婚期近臣叨承 先帝付託之重若不於此一効微勞卽歸伏草奔心豈能安故

暫留以順 上命預請以訂歸期誠萬萬不得已而爲之者也旣荷 聖慈俞允許以候 旨而行則又自幸烏鳥微情亦必得遂於今日矣茲遇 皇上嘉禮備成又值 兩宮聖母大慶臣得以淺陋之識討論故事贊成 盛典犬馬圖報之忱於是少効乃敢復申前請今賴 聖明在上中外事體帖然底定儻蒙 天恩垂憫慨然允臣回籍終制固爲萬幸矣若皇上必欲留臣驅使俾竭其駑駘之力則願乞數月之假候尊上 聖母徽號禮成之後星馳回籍送臣父骨歸土卽依限前來供職以畢臣惓惓圖報之

忠臣得了此一念剖心裂肝死無所恨臣干冒天威不勝戰慄隕越之至

奉

聖旨卿受遺先帝輔朕冲年殫忠宣勞勲猷茂著茲朕嘉禮初成復奉聖母慈諭惓惓以朕屬卿養德保躬倚毗方切豈可朝夕離朕左右况前已遣司禮官營葬今又何必親行宜遵先後諭旨勉留匡弼用安朕與聖母之心乃爲大忠至孝所請不允吏部知道欽此

大婚禮成辭免

加恩疏

昨奉聖諭朕大婚禮成元輔張先生受先帝付託殫忠竭力左右朕躬啓迪保護功難名述宜加殊恩以表眷酬二輔同心協贊勞績茂著並宜敘錄擬勅來行欽此隨該臣具辭止爲二臣擬勅加恩今日該文書官孫斌口傳聖旨張先生元功恩典當首加如何通不敘及着二輔另擬來看欽此仰惟皇上嘉禮備成普天同慶因而覃敷恩賚首及閣臣此明主逮下之仁錄勞彰勸之典也臣敢固爲抗違以虛貺施但臣於國家受恩獨重皇上

待臣既與諸臣不同則臣之報禮亦當與諸臣有異
人之所不能者而臣爲之人之所可受者而臣辭之
庶於分義少盡耳若大禮之成臣不過討論故典
贊成盛事而已是豈衆人之所不能爲而隆恩
殊錫又豈人臣之所當受者乎况臣暫留於此原欲
一効微勞既已辭俸守制則與見任有異若因此冒
叨恩典則昔者願忠之悃適爲希覬之圖而外沽
守制之名實冒見任之體初心既已自違事理亦爲
欠當故在諸臣可受而臣決不可受也伏望聖慈
鑒臣微悃免令二臣另擬惟使臣愚志得伸雖蔬食

歿齒榮幸多矣臣不勝惶悚祈望之至

奉

勅諭吏部朕大婚禮成內閣輔臣忠勞茂著宜加特
恩元輔張居正受先帝付託盡忠輔導保護啓迪
勲猷獨茂宜加殊禮以答元功但元輔以守制懇辭
暫從其請俟制滿之日該部奏請加恩次輔呂調陽
加支尚書俸進兼建極殿大學士張四維加少保進
兼武英殿大學士兼官俱照舊仍各廕一子做中書
舍人以示酬眷如勅奉行欽此

再乞歸葬疏

茲者以臣父歸窆有日疏乞回籍送葬奉 聖旨卿受遺 先帝輔朕冲年殫忠宣勞勲猷茂著茲朕嘉禮初成復奉 聖母慈諭惓惓以朕屬卿養德保躬倚毗方切豈可朝夕離朕左右况前已遣司禮官營葬今又何必親行宜遵先後 諭旨勉留匡弼用安朕與 聖母之心乃爲大忠至孝所請不允吏部知道欽此臣伏誦 宸綸涕泗橫集念臣雖賦質愚昧然君臣大義頗知向方况昔承 先帝顧託之重茲又奉 聖母申命之頒耿耿孤忠寧敢自負但臣今日所祈非欲長往遠引忍於背違者也痛念先臣生

臣兄弟三人愛臣尤篤自違晨夕十有九年一旦訣聞遂成永訣生不得侍養焉歿不得視含焉每念及此五內崩裂一從聞訃籲天號泣恨不能朝被 命而夕就道也後屢奉 溫諭慰留諄切義不敢抗情不忍離又念大婚期近欲因此一効犬馬微勞故暫留以俟後 命預請以訂歸期此臣處 君臣父子之變不得已而委曲以求通者也然抱此隱痛神往形留加以孤志不明橫遭狂訕內憂外侮舉集於一身數月以來志意衰沮形容顛頽惟含慟飲泣屈指計日以俟 嘉禮之成冀以俯遂其初願耳夫盡忠

所以成孝而死者不可復生臣豈不知今日之歸無益臣父之死且重荷 殊恩特遣重臣爲之造葬送終之禮已爲極至臣今雖去亦復何加但區區烏鳥私情唯欲一見父棺送之歸土以了此一念耳若此念不遂雖強留於此而心懷蘊結形神愈病必不能專志一慮以圖 國家之事公義私情豈不兩失之乎比得家信言臣父葬期擇於四月十六日如蒙 聖慈垂憐 早賜俞允給臣數月之假俟尊上 兩宮聖母徽號禮成卽星馳回籍一視窀穸因而省問臣母以慰衰顏儻荷 聖母與 皇上洪庇

而康健無病臣卽扶侍同來臣私念旣遂志意獲紓自此以後當一心一慮服勤終身死無所憾是今雖嘗曠於數月而後乃畢力於終身 皇上亦何惜此數月之假而不以作臣終身之忠乎此臣之所以叩心泣血呼 天乞憐而不能自己者也若謂臣畏流俗之非議忘 願託之重任孤負 國恩欲求解脫則 九廟神靈鑒臣之罪必加誅殛人亦將不食其餘矣臣情出迫切冒竇 宸嚴自干斧鉞誠不勝戰慄惶悚之至

奉

聖旨朕勉留卿原爲 社稷大計倚毗深至覽卿此奏情詞益迫朕不忍固違准暫回籍襄事還寫勅差文武官各一員護送葬畢就着前差太監魏朝敦趣上道奉卿母同來限五月中旬到京往回都着馳驛該省撫按官仍將在籍起身日期作速差人奏報該衙門知道欽此

謝 假歸葬疏

茲者臣再疏懇乞給假歸葬奉 聖旨朕勉留卿原爲 社稷大計倚毗深至覽卿此奏情詞益迫朕不忍固違准暫回籍襄事還寫勅差文武官各一員護

送葬畢就着前差太監魏朝敦趣上道奉卿母同來限五月中旬到京往回都着馳驛該省撫按官仍將在籍起身日期作速差人奏報該衙門知道欽此臣屢疏陳情萬非得已瀆擾 天聽方切悚惶乃蒙 聖慈不加譴訶 特賜俞允又遣官衛導預定來期臣憂苦之悰一朝頓解投泪雪涕忽若更生不惟臣父有知啣感於地下因以昭示天下使知 君父有兩重之恩忠孝有曲全之道凡爲人臣者孰不思委質捐軀以盡莫逃之分爲人子者孰不思竭誠致慎以伸難解之情 聖朝懿舉又不獨關係臣一身之

進退而已。願臣昔者急切求歸，祇欲遂鳥鳥思親之念。今者違離有日，又不勝犬馬戀主之心。擬候兩宮聖母徽號禮成之後，伏乞特賜召見於便殿一觀。天顏面陳，微悃以少伸贍戀之忱。臣仰荷隆恩，不勝激切感戴之至。

奉

聖旨覽卿奏謝，朕知道了。待卿行有定日，朕于文華殿召卿面辭。禮部知道。欽此。

請簡用閣臣疏

照得閣臣列在禁近，以備顧問。代王言其職

務最爲繁重，必博求賢哲，廣集衆思，乃足以仰贊

皇猷，弼成化理。今臣居正以題奉，欽依給假，可

籍止。臣調陽臣四維二人在閣，誠恐聞見有限，辦理

不前，或致誤事。伏乞聖明俯察在廷諸臣有心

術端正才識優長者，特賜簡拔一二人，與臣等同

辦閣務，庶共濟有賴。庶事可康。臣等又查得先朝

簡用閣臣多出。特旨間有下部會推者，又查得萬

曆三年八月內，該臣等以閣臣員缺題請簡用奉

聖旨，卿等舉堪任的來看。欽此。隨該臣等推舉詹

事府掌府事吏部左侍郎兼翰林院學士張四維等

三頁欽蒙 御筆點用臣四維合無今次仍請 聖
明特簡或 勅下吏部會推上請 點用臣等未敢
擅便謹題請 旨

奉

御批卿等推堪是任的來看欽此

奉 旨 薦舉閣臣疏

昨該臣等題為 閣務繁重懇乞 聖明博簡才賢
以廣忠益事乞增用閣臣協贊機務請斷自 宸衷
特賜簡用或 勅下吏部會官推舉等因奉 御批
卿等推堪是任的來看欽此欽遵查得萬曆三年八

月內臣等題請 簡用閣臣亦奉 御批卿等舉堪

任的來看欽此臣等隨舉得詹事府掌府事吏部左
侍郎兼翰林院學士張四維吏部左侍郎兼翰林院
侍讀學士馬自強詹事府少詹事兼翰林院侍讀學
士掌院事申時行三頁堪任奉 御批張四維陞禮
部尚書兼東閣大學士着隨元輔等在內閣辦事吏
部知道欽此其馬自強等二頁隨蒙 聖明簡擢馬
自強陞禮部尚書加太子少保申時行歷陞吏部右
侍郎仍日侍講讀是二臣之才品學識固已簡在
聖心矣今臣等公同評品堪任是職似亦無踰於二

臣者敢仍以二臣推上伏乞 聖明再加審酌於二臣之中或 簡用一員或並用二員令其與臣等同辦閣務深為便益再照二臣才品雖同年資稍異馬自強任禮部尚書已及三年近又恭遇 大婚嘉禮頗効勤勞如用本官似應量加一品官銜仍以尚書兼閣學辦事申時行年資稍淺如用本官似應量轉左侍兼閣學辦事乃為相應臣等俱未敢擅便謹題請 旨

奉

聖旨馬自強以本官加太子太保兼文淵閣大學士申時行陞吏部左侍郎兼東閣大學士俱着隨元輔等在內閣辦事吏部知道

請給勘合疏

茲者臣仰荷 聖慈俯容給假歸葬違遠有期不勝瞻戀念臣謬膺 重託頂戴 鴻恩雖身遠 闕庭而 國家之事有不能一刻暫忘於心者辭 朝之後或於四方事情有所聞見或於 朝廷政務有所獻替即欲不時奏 聞但途路寫遠未能即達伏乞 勅下兵部給與勘合數道以便差人齎奏臣不勝惓惓願忠之至

奉

聖旨准給與兵部知道

謝 賜勅諭并 銀記疏

茲者蒙 准給假辭行有日仰荷 天恩 特降手諭朕大禮甫成倚毗先生方切豈可一日相離但先生情詞迫切不得已准暫給假襄事以盡先生孝情長途保重到家少要過慟以朕爲念方是大孝五月中旬就要先生同母到京萬勿遲延致朕懸望又先生此行雖非久別然國事尚宜留心今賜先生 帝資忠良銀記一顆若聞朝政有闕可卽實封奏聞外

奉

聖母慈命賜先生路費銀五百兩紵絲六表裏

朕賜亦同先生欽承之故諭欽此并 龍箋勅諭一

道 帝資忠良銀記一匣銀池鎖鑰全該司禮監太

監王臻恭捧到臣私寓臣謹叩頭祇頌訖又該本官

口傳 聖旨着臣於十一日詣 文華殿 面辭欽

此念臣頃以微情上干 高聽仰蒙 矜憫 特賜

允俞犬馬之忠旣少伸于朝宇烏鳥之願兼追盡于

家園戴此 恩私已難報荅茲復 渙頒睿藻 曲

軫微悰愍其在道之勞令加珥護憂其憑棺之慟俾

順禮經溫然家人父子之親溢於口語文字之外三

薰三復一涕一言且 鳳綽龍箋輝煌映日精鏤彩
幣炫爛充庭至於圖章篆記之頒雖 先朝間有若
乃取義命詞之重則往牒希聞昔傳說之輔商宗是
稱 帝賚若魏徵之對唐帝曾辯忠良豈如一介孤
踪兼備二臣盛美遭逢若此稱塞謂何臣敢不俯仰
哀思仰紆 慈念望歸途之漸渺瞻 魏闕以長懸
天語春溫時佩 推心之愛星言夙駕日虔趨
命之恭尚勉圖有謀入告之忠庶以見在遠不忘之
義臣感戴 洪恩無任瞻戀激切之至

奉

聖旨覽卿奏謝具見忠愛朕心嘉慰卿未行朕已懸
望宜早襄葬事星馳赴京吏部知道欽此

謝 兩宮賜路費疏

今日伏蒙 聖母慈聖宣文皇太后以臣蒙 准給
假特賜路費銀五百兩紵絲四表裏差 慈慶宮管
事太監李用恭捧到臣私寓臣謹叩頭祇頌訖 慈
恩下逮行色增輝 寵錫非常鏤肌切感念欲仰酬
夫 高厚唯有俯罄其忠丹一心永肩九死奚惜臣
不勝激切仰戴感奮思報之至 聖母仁聖懿安皇
太后賜路費銀三百兩紵絲六表裏謝疏同

奉

聖旨覽卿奏謝 聖母知道了禮部知道欽此

召辭紀事

先是有 旨令臣以十一日詣 文華殿 面辭是

日 上御 文華殿西室 召臣入致辭云臣仰荷

天恩准假歸葬又 特降手諭賜路費銀兩表裏

及銀記一顆臣仰戴 恩眷非常捐軀難報 上云

先生近前來夢臣至 御座前 上諭云 聖母與

朕意原不肯放先生回只因先生情詞懇切恐致傷

懷特此允行先生到家事畢卽望速來國家事重先

生去了朕何所倚託臣叩頭謝因奏言臣之此行萬

非得已然臣身雖暫違大馬之心實無時刻不在

皇上左右伏望 皇上保愛 聖躬今 大婚之後

起居食息尤宜謹慎這一件是第一緊要事臣爲此

日夜放心不下伏望 聖明萬分擗節保愛又數年

以來事無大小 皇上悉以委之於臣不復勞心今

後 皇上却須自家留心莫說臣數月之別未必便

有差誤古語說一日二日萬幾一事不謹或貽四海

之憂自今各衙門章奏望 皇上一一省覽親自裁

決有關係者 召內閣諸臣與之商確停當而行

上說先生忠愛朕知道了又奏臣屢荷 聖母恩慈以服色不便不敢到 宮門前叩謝伏望 皇上爲臣轉奏 上又說知道了長途保重到家勿過哀臣仰荷 聖慈憫念不勝感戀伏地哭泣不能致謝上云先生少要悲痛然 天語未畢亦哽咽流涕臣叩頭而退 上謂左右云我有好些話要與先生說見他悲傷我亦哽咽說不得了隨着人奏知 聖母聖母亦感痛差管事牌子李旺賜銀八寶六十兩途中賞人又口傳 慈諭先生旣舍不得 皇帝到家事畢早早就來不要待人催取欽此

謝 召見面辭疏

今日伏蒙 召臣於 文華殿西室 面辭仰荷天語慰諭諄諄臣犬馬之情不勝依戀涕泗橫集言不能宣仰見 聖慈垂憫亦爲臣哽咽隨蒙 特遣文書官太監孫斌 暖殿牌子李忠賜臣食品八盒又蒙 聖母差 慈寧宮牌子李旺 賜臣銀八寶豆葉六十兩爲途中犒賞之需又口傳 慈諭臣行之後 皇上無所倚託到家事畢卽宜早來不必候人催取臣謹俱叩頭祇頌訖臣數年供奉一旦違離悵望 天顏心焉如割歸家竣事卽當仰遵 慈諭

星夜前來用畢臣惓惓圖報之忠不敢迤邐以負
重託臣不勝感戴瞻戀之至

奉

聖旨覽卿奏謝 聖母知道了禮部知道

謝 遣官郊餞疏

茲臣蒙 准給假先於十一日詣 文華殿 面辭
今日出城就道伏蒙 聖恩 特遣司禮監太監張
宏餞送於郊外又 賜臣甜食二盒乾點心二盒臣
謹望 闕叩頭祇頌卽時啓行去訖重臣啣 命寵
賜賓筵 尚食分珍光生祖道仰 聖情之繾綣荷

帝賚之駢蕃往昔所希冒叻愈甚祖途日遠躬跋
涉以星言 魏闕天高望雲霄而兩涕臣無任感戴
瞻戀之至

奉

聖旨覽卿奏謝朕知道了禮部知道

歸葬事畢謝 恩疏

臣前乞 恩給假荷蒙 俞允於三月十三日辭行
一路感 恩含痛倍道遄征至四月初四日抵家拜
臣父柩一慟幾絕孀母見臣歸來猶訝夢中相見臣
因備誦 聖母 皇上 慈恩特許歸葬本未母子

相抱痛哭失聲當是時鄉老親戚故舊環列柩前靡不噓唏感歎仰頌恩遇者乃以四月十六日率子弟族人扶臣父柩歸窆於勅賜大暉山之原其日欽遣營葬司禮監太監魏朝工部主事徐應聘諭祭禮部主事曹誥護送臣回尚寶司少卿鄭欽錦衣衛指揮僉事史繼書先任湖廣巡撫都御史今陞刑部右侍郎陳瑞撫治鄖襄等處都御史徐學謨及地方司道等官畢來會葬謹已安厝成禮訖臣於臣父菽水之養雖有曠於生前窀穸之禮幸少盡於歿後宿心獲遂冥骨用安斯實仰荷我皇上至仁

徧覆大孝弘敷故臣得以少釋終天之恨曲全烏鴻之情臣闔門百口仰戴隆恩無可報答惟有竭誠盡力爲臣死忠爲子死孝庶以少酬洪造之萬一耳臣聞天雖高而聽則卑人有求而願必遂前者中外臣工見聖母慈諭倚託之重皇上溫旨勅留之懇以爲臣之所請必不得遂矣豈意聖慈曲軫幡然允俞俾臣宿願獲伸前言終踐于以見皇上愛臣之篤不強其心之所弗安于以見微臣獲上之深得行其道之所當盡皆有出於羣情意料之外者誠聖朝希曠之恩教孝作忠之典也臣

引大岳文集卷四十二
不勝銘心鏤骨感激啣戴之至

奉

聖旨覽卿奏謝朕知道了禮部知道

請寬限疏

臣於三月十三日蒙 恩准假辭行至四月初四日
抵家十六日葬臣父訖除另具奏謝 恩外先該臣
奏乞給假葬父省母伏奉 聖旨朕勉留卿原爲
社稷大計倚毗深至覽卿此奏情詞益迫朕不忍固
違准暫回籍襄事還寫勅差文武官各一員護送葬
畢就着前差太監魏朝敦趣上道奉卿母同來限五

月中旬到京往廻都着馳驛該省撫按官仍將在籍
起身日期作速差人奏報該衙門知道欽此今葬事
已竣卽宜遵奉 前旨同臣母星馳赴 闕圖報

國恩但臣母今年七十有三一向多疾去年痛臣父
歿舊疾轉增今年正月間伏枕數日飲食頓減此司
禮監太監魏朝所親見比因臣歸母子相見乃復易
悲爲歡眠食復舊然氣體終是羸弱不勝勞苦臣因
誦 聖母慈諭 皇上恩旨欲令同臣赴京臣母頂
戴 鴻恩卽當力疾就道柰今天氣漸暑道路阻修
高年多病之軀豈能跋涉二三千之遠爲此進退

躊躇誠難自強臣欲欽遵 嚴限獨身前來又恐有違將母同行之 旨不得已再瀝悃誠仰于 天聽惟祈 聖慈俯賜寬限容臣暫停至八九月間天氣涼爽扶持臣母一同赴京其先差司禮監太監魏朝原以葬臣之父取臣之母今臣父既葬臣母未行久稽使命臣心不安合無 俯容先回復 命免令敦促俾臣得扶持老母從容赴 闕是今雖暫違數月之限而私願既遂母身獲寧內顧無虞志專報 主自茲以往捐軀碎首死無所憾矣臣怙恃 恩慈屢行煩瀆不勝惶悚隕越之至

奉

聖旨朕日夜望卿至如何如請寬限着留先差太監魏朝待秋涼伴送卿母 來卿宜作速上道務於五月終到京以慰朕懷方是大忠大孝便寫勅差錦衣衛堂上官一員星夜前去催來勿再遲延該衙門知道欽此

奉 諭擬遼東賞功疏

臣於三月十三日蒙 恩准假回籍至四月初四日抵家方經營臣父葬事忽於本月十一日該兵部差官齎奉 聖諭內閣昨見遼東塘報大捷比前次更

多朕心深喜今早奏聞 聖母歡悅殊甚朕以冲年
踐祚恒念德不足格 天威不能冒虜夙夜惕勵而
邊臣奮勇屢立非常奇功誠如 聖母前諭賴 天
地 祖宗默佑乃國家之慶元輔平日加意運籌卿
等同心協贊之所致也部疏上時卿等一錄封此諭
內着兵部馬上差人星夜前去與張先生看將一應
敘錄比前再加優厚用示朕惓惓獎酬之意欽此又
該同官大學士呂調陽等錄示閣中題稿并該鎮塘
報傳奉 聖意欲臣議擬處分等因臣在哀苦之中
忽聞該鎮有此奇捷輒復轉戚爲欣枚淚稱慶又惟

慶賞予奪雖 朝廷大政然以我 皇上之明聖俟
該部題覆閣臣票擬之日 皇上秉離照以裁之出
乾斷以處之自將應機立解遊刃有餘乃不遠數千
里而詢及於臣且 俯念微勞冲然讓美誠 聖不
自聖謙而又謙之心也臣又曷勝欽仰曷勝感激竊
照遼東一鎮歲苦虜患邇賴 聖明加意鼓舞屢奏
膚功乃今以裨將偏師出邊遏剿斬馘至四百七十
餘級而我軍並無損失功爲尤奇况當 嘉禮美成
之會兩月之間捷報踵至而今次所獲比前更多此
誠 昊穹純祐 宗社垂庥我 皇上聖武布昭之

所致也所據該鎮文武諸臣協心用命功委可嘉
聖諭欲加厚賞誠不爲過雖其中有投降一節臣未
見該鎮覈勘詳悉第據塘報所稱如總兵李成梁素
稱忠勇屢立奇勲前次劈山之捷該部議加封爵臣
欲留此殊典以待後功故未敢擬今次大捷伊雖未
嘗親歷戰陣而號令調度實由主將論功行賞仍宜
首敘似應量加流爵以勸功能副總兵陶承學奮勇
當先決機取勝副使翟繡裳守備預嚴督察加慎俱
宜重加陞級仍行厚賞總目梁夢龍巡撫周詠履任
雖俱未久威令亦已大行 卹陞俸級或量與蔭敘

本兵調度有功尚書方逢時宜加陞敘侍郎曾省吾
鄧光先宜加俸級或特與服色其餘將士及文武臣
工與有勞者或陞或賞該部議覆自有舊例臣不能
一一敘擬惟 頒賞一節本出 特恩今次似在可
已伏乞 聖裁再照近年各邊獲功屢蒙 聖恩敘
及閣臣欲加陞蔭臣自以職在論思不敢攘奪將士
之功具疏辭免不啻四五俱荷 聖明俞允但同官
諸臣所處原自不同乃以臣之故竟未得一霑 恩
命臣心恒以爲歉今臣旣不在任而諸臣協贊廟略
發蹤指示功自有歸伏乞 聖慈弘敷大賚將大學

士呂調陽張四維 特加武廕馬自強申時行量加
文廕以酬其勞至於臣者 寵榮已極涯分久踰茲
荷 宸綸追獎已逾華袞之褒決不敢復有叨冒以
取覆餗之尤也臣愚昧無知誤蒙 聖明俯詢敢略
陳其槩統冀 聖明裁奪施行

奉 諭還朝疏

先該臣以臣父葬畢卽宜遵 旨將母赴 闕緣臣
母老暑天不能遠涉疏乞寬限奉 聖旨朕日夜望
卿至如何却請寬限着留先差太監魏朝待秋涼伴
送卿母北來卿宜作速上道務於五月終到京以慰

朕懷方是大忠大孝便寫勅差錦衣衛堂上官一員
星夜前去催來勿再遲延該衙門知道欽此本月十
六日蒙 差錦衣衛指揮僉事翟汝敬齎奉 勅諭

一道到臣原籍該地方官迎接至臣私第開讀 皇
帝勅諭少師兼太子太師吏部尚書中樞殿大學士
張居正卿前奏請給假爲父封少師兼太子太師吏
部尚書中樞殿大學士張文明營葬朕念卿孝心懇
切不忍固違暫准回籍襄事限五月中旬回京實非
得已自卿行後朕惓惓注念朝夕計日待旋茲覽來
奏復請寬假欲待秋涼奉母同來殊乖朕望茲特命

錦衣衛指揮僉事翟汝敬馳驛星夜前去守催起程
卿母既高年畏熱着先差太監魏朝留待秋涼伴送
來京卿可卽日兼程就道務于五月末旬回閣辦事
用副 先帝委託之重以慰朕夙夜倚毗延佇至意
欽哉故諭欽此又特奉 宸翰 諭元輔張先生自
先生辭行之後朕心日夜懸念朝廷大政俱暫停以
待今葬事既完卽宜遵旨早來如何又欲寬限茲特
遣錦衣衛堂上官齋勅催取勅到卽促裝就道以慰
惓惓先生老母畏熱難行還着太監魏朝將先生父
墳未盡事宜再行經理便候秋涼護送先生老母同

來先生宜思 皇考付託之重 聖母與朕眷倚之

切早未輔佐以成太平之治萬勿耽延有孤懸望先
生其欽承之欽此臣謹焚香望 闕叩頭祇頌訖

天使臨門 雲緘啓札 聖心懸切 眷命重申臣

旣迫大義之難違又念 殊恩之未報雖有私曲違

復爲圖謹欽遵 諭旨留臣母託之司禮監太監魏

朝候秋涼徐行臣已於本月二十一日更服墨纓星

馳就道伏念臣違遠 闕庭已踰兩月今恨不能一

蹴便至仰覲 天顏但臣原籍去京師幾三千里加

以道途霖潦每至迍邐哀毀餘生難勝勞頓今計五

月終旬之限已屬稽違私心惶惶不遑寧處除候到
京之日伏冀待 謹外謹先奏 知以仰慰 聖母
皇上懸念尤冀 聖慈曲垂矜憫 特寬斧鉞少假
便宜俾孱弱之軀獲免困仆裂肝碎首死不敢辭臣
無任惶悚墮越之至

奉

聖旨覽奏知卿已在途朕心慰悅炎 遠道宜慎加
調攝用副眷懷便從容斐行不妨吏部知道

謝 遣官郊迎疏

臣於五月二十一日被 召還 朝早夜疾趨以告

月十五日未刻到京城外仰荷 天恩特遣司禮監

太監何進 賜宴於真空寺該何進口傳 天語慰

勞勩倦又傳奉 聖旨若午時分進城便着張先生

在朝房稍候朕卽召見於平臺若未時分進城着先

生逕到宅安歇次日早免朝召見欽此念臣昔者奔

歸已沐賓筵之 遣餞今茲趨 命又厯 重使以

勞迎 湛露重濡 需雲偏覆光生俎豆 寵極章

縫顧以草野微賤之臣辱此 聖朝殊絕之典捫心

自懼粉骨難酬除今日遵奉 恩諭於朝房齋戒沐

浴次早恭詣 文華殿 朝見外臣不勝仰戴 鴻

長
文
華
殿
朝
見
外
臣
不
勝
仰
戴
鴻

恩激切感奮之至

奉

聖旨卿冒暑疾馳忠勤茂著朕心嘉悅特遣使郊勞用示眷酬覽奏謝知道了禮部知道欽此

謝 兩宮遣使郊勞疏

臣於五月二十一日被 召還 朝早夜疾趨以六月十五日到京仰荷 聖母慈聖宣文皇太后 特遣慈寧宮管事太監李琦於城外真空寺口傳 慈諭慰勞勤倦又 特賜銀八寶二十兩金錢川扇十柄隨又遣管事太監李用頒賜 上用乾點心二盒

熟餠四盒果餅二盒鮮果二盒清酒一罈臣謹俱叩頭祇領訖伏念臣受 國厚恩矢當捐軀以報聞君召命豈敢俟駕而行起居不遑分義宜爾乃荷 慈恩曲軫 寵命重申諄諄 慰勞之辭奕奕環奇之貺顧以凡庸沐此優眷鏤肌切感墮首奚辭臣不勝感奮激切之至 仁聖懿安皇太后同

奉

聖旨覽卿奏謝 聖母知道了禮部知道欽此

謝 召見疏

臣於本月十五日趨 召到京十六日仰承 恩諭

賜見於文華殿西室該臣以前者蒙恩准假葬
父事竣臣母老未能同行又蒙聖恩特留司禮監
太監魏朝候秋涼伴行臣一門存歿仰戴天恩不
勝感切叩頭稱謝伏承天語先生此行忠孝兩
全了臣因奏臣一念烏鳥私情若非聖慈曲體何
由得遂感恩圖報之忱言不能宣惟有刻之肺腑
而已蒙諭云暑天長路先生遠來辛苦臣叩頭
謝因請違限之罪蒙諭云朕且先生來甚喜兩
官聖母亦喜臣奏臣違遠闕庭倏忽三月然大馬
之心未嘗一日不在皇上左右不圖今日重覩

天顏又聞聖母慈躬萬福臣不勝慶忭蒙諭云
先生忠愛朕知道了又問云先生沿途見稼穡何
如臣因備述往來經過畿輔河南地方今春二麥全
收秋禾茂盛實豐登之慶又問黎民安否臣奏各
處撫按有司官來見臣必仰誦皇上奉天保民
至意諄諄告戒令其加意愛養百姓凡事務實勿事
虛文臣見各官兢兢奉法委與先年不同以是黎民
感德皆安生樂業實有太平之象又問今邊事何
如臣因奏昨在途中見山西及陝西三邊督撫總兵
官俱有密報說虜酋俺荅西行爲挨落達子所敗損

傷甚多掩荅僅以身免此事雖未否虛實然以臣策
 之虜酋真有取敗之道夫夷狄相攻中國之利此皆
 皇上威德遠播故邊境又安四夷賓服因叩頭稱
 賀蒙 諭云此先生輔佐之功臣又奏虜酋若果喪
 敗胡運從此當日衰矣但在我不可幸其敗而輕之
 蓋聖王之制夷狄惟論順逆不論疆弱若其順也彼
 勢雖弱亦必撫之以恩若其逆也彼勢雖疆亦必震
 之以武今後仍望 皇上擴弁包之量廣覆育之仁
 戒諭邊臣益加恩盡彼既敗於西將依中國以為固
 又恐乘其敝而圖之若我撫之不改初意則彼之感

德益深永為藩籬不敢背叛 數十年之利也仰見

天顏喜甚再三首肯云先生說的是又蒙 諭先生

沿途辛苦今日見後且在家休息十日了進閣臣草

芥微軀仰荷 聖慈垂念叩頭稱 謝隨又蒙 恩

賜銀一百兩紵絲六表裏新錦三千貫羊二隻酒二

瓶茶飯一卓燒割一分臣謹叩 謝又蒙 遣

司禮監太監張宏引至 慈寧 慈寧朝謁 兩官

聖母謝 恩而出竊念臣往據 慈寧 恩私得

暫解於繁機幸克襄乎大事遠荷 聖情之懸注特

厯 勅使之敦催爰望闕以遵途遂脂牽而戒兩頤

長天新美 卷四十一 十七

星馳夙駕雖啓處之不遑奈永遠山長恨奮飛之莫
逮致稽程限已踰旬朝自知不免於嚴訶敢望獲
從乎寬政乃蒙我皇上泚慈宥假優眷駢蕃盤瓠
持出於尚方迎勞更煩乎中貴禁扉宵啓促文席
以清言天語春溫霽宸嚴而俯慰憂民艱而軫
邊事曲賜咨詢修內治而計外攘謬承鑒獎禮
隆晝日侈三接以爲榮溼溥雲天擬百朋而非重
戴恩罔極圖報奚繇惟誓捐狗馬之餘生庶少荅
乾坤之大造臣誠不勝踴躍欣慶激切感戴之至

奉

聖旨朕昨見卿喜甚又聞歲會三民安邊境寧謐益用
欣慰覽奏謝知道了該部知道欽此

新刻張太嶽先生文集卷四十三

乞鑒別忠邪以定

國是疏

臣于本月十五日趨

召到京晚閱邸報見戶部浙江司員外郎王用汲一本為乞察總憲大臣欺罔以重正氣以彰國是事奉旨切責革職為民臣不知所言何事其時方急于赴命企覩

天顏一切時事俱未暇諗問次日

朝見畢會同官三臣始知用汲以都察院左都御史

陳炯參論湖廣巡按御史趙應元託病乞休謂其有所阿附等情妄行誣詆然尚未見其全疏也日來少暇取其全抄讀之始知用汲之言陽爲論外實陰以攻臣也儉邪小人已蒙

聖斷處治臣似可置之無論但其所言有朝廷政體所關天下治亂所係者臣若隱忍不言將使忠邪混淆是非倒植卒致國是不定政本動搖非細故也劉向有言讒邪之臣將同心以害正臣正臣進者治之表也邪臣進者亂之機也方今天下當五陽之會處極辨之朝一陰潛萌其兆已見羣邪害正積慮

百深臣有社稷之寄心切憂之故不容已于言也

臣請先析其疏中所借口者二事而後發其機竅所在惟聖明鑒察臣看得用汲疏中謂臣前葬父事

畢謝恩疏無御史趙應元名謂臣有所憾于應元

而矜阿附臣意遂因其稱病而糾之此大誣也臣前

回籍數日卽扶先人柩歸窆比時都御史陳瑞以陞

任赴京道經臣里其餘各官皆奉差有事及本地

方任劄者適會臣父葬期遂吊祭于丘隴其時應元

差滿正與新任巡按御史郭思極交代于襄陽相去

數百里勢自難及彼何嘗有所失禮于臣而臣憾之

張大音七長

耶夫吊喪送殯人道之常不但臣無所憾于應元卽應元亦未嘗有持秉風裁不爲私交之意但偶不與耳彼亦何所畏避而遂以病乞休耶若其稱病之有無虛詐及憲職之果否修舉在外爲堂官訪之必真臣不知也前者屢奉明旨御史託病偷安及差滿臣聞道俱着都察院着實糾劾考察然掌院之臣竟未聞有執法奉行者今獨外有此舉耳而遂爲人所誣指脅制則後之居是任者必將以外爲戒寧背違明旨而不敢結怨臺臣相與務爲扶同欺蔽以致紀綱陵替而不可收拾豈朝廷所以屬任臺臣振揚

風紀之意耶又謂舊歲以星變考察其所懲抑者半爲不附宰臣之人此又大誣也臣按舊規每遇京官考察時吏部都察院預行各衙門堂上官開列應黜官員事跡送部院會同考察比時兵部尚書方逢時奉命帶管吏部事一日持各衙門所開及本部司屬所訪姓名事跡告臣言據所開則應黜者衆柰何臣卽語之曰人才難得况此乃非時考察事起倉卒恐一時廉訪未真或有虧枉但取其罪狀顯著人所共知者量行黜降足矣故比時考察人數比之往年獨少臣何嘗屬意部院私黜一人今逢時見任

皇上試一問之可知也今日某某被黜以某某故則各衙門堂官所開部官所訪者豈盡皆臣指使之耶卽如禮部主事張程乃今大學士馬自强原任禮部尚書時所首開者豈自强亦阿附臣意而黜之耶又如禮部郎中章禮乃臣子業師亦在開中臣亦不敢以私庇之竟從降調况其餘乎今自强見在

皇上試一問之可知也夫人之善惡各以其類兔死狐悲情勢自然若被黜者一一求其所以得罪之故捕風捉影捏造流言以倚齷當事之人則將來司考察之柄者將緘口歛臂而不敢輕動一人祖宗考

察公典幾于廢矣又豈朝廷所以屬任銓衡振刷吏治之意耶然此二端皆借言也至末後一段謂

皇上當獨攬乾綱不宜委政于衆所阿附之元輔此則其微意所在乃陷臣之機穽也唐貞觀時有勸太宗攬權不宜委政房玄齡等者太宗曰此欲離間我君臣也立命徒之今用汲之意實類于此然此可以惑庸闇之君不可以欺明哲之主也天自古惟明王聖主乃能擇賢而屬任之非庸君闇主之所能也三五之隆不可殫舉成湯聖君也其于伊尹乃學焉而後臣之高宗長主也拔傅說于胥靡一旦命總百官

而屬之曰汝爲舟楫汝爲霖雨其倚任之重如此然成湯高宗不以其故貶王而功業之隆照耀史冊垂憲千古蓋八柱高承而天位始定四時成歲而大造乃成明主勞于求賢而逸于得人故信任賢臣者正所謂攬權也豈必若秦始皇之衡石程書剛愎自用隋文帝之猜忌任察讒害忠良而後謂之有權耶若夫庸君闇主則明不足以知賢而信不足以使下雖奉之以太阿之柄彼亦不能持也以 皇上之明聖用汲乃不以成湯高宗之所以任其臣者而導之爲秦皇隋帝不亦謬哉夫國之安危在于所任今但當

論輔臣之賢不賢耳使以 臣爲不賢耶則當亟賜罷黜別求賢者而任之如以 臣爲賢也

皇上以一身居于九重之上視聽翼爲不能獨運不委之于 臣而誰委耶 先帝臨終親執臣手以

皇上見託今日之事 臣不以天下之重自任而誰任

耶羈旅微賤之 臣一旦處百僚之上據鼎鉉之任若

不得 明主親信委用又何以能肩鉅負重而得有

所展布耶况今各衙門章奏無一不經 聖覽而後

發票及 臣等票擬上 進亦無一不請 聖裁而後

發行間有特出 宸斷出于 臣等智慮所不及者今

謂 皇上謾不經意一切委之于臣何其敢于厚誣
皇上耶臣自受事以來殫赤心以盡忠王室者

神明知之矣賴我 皇上神聖臣得以少佐下風數

年之間紀綱振舉百司奉職海內之治庶幾小康此
市人田父所共歌頌而欣慶者也今乃曰人人盡私

事事盡私又何顛倒是非一至此耶然用汲之言如

此也而意不在此也其言出于用汲也而謀不止于

用汲也緣臣賦性愚戇不能委曲徇人凡所措畫惟

施一槩之平法所當加親故不宥才有可用疎遠不

遺又務綜覈名實搜剔隱姦推轂善良摧抑浮競以

是大不便于小人而傾危躁進之士遊談失志之徒

又從而鼓煽其間相與怨懣擻嗾冒險釣奇以覬幸

于後日爲攫取富貴之計蓄意積慮有間輒發故向

者劉臺爲專擅之論今者用汲造阿附之言夫專擅

阿附者人主之所深疑也日浸月潤鑠金銷骨小則

使臣冒大嫌而不自安大則使臣中竒禍而不自保

明主左右旣無親信重臣孤立于上然後呼朋引類

藉勢乘權恣其所欲爲紛更變亂不至于傾覆國家

不已此孔子所以惡利口大舜所以疾讒說也臣日

夜念之憂心悄悄故敢不避煩瀆一控茲 聖明之

前遂以明告于天下之人臣是顧命大臣義當以
死報國雖赴陷湯火皆所不避况于毀譽得喪之
間皇上不用臣則已必欲用臣臣必不能枉已以
徇人必不能違道以干譽臺省紀綱必欲振肅

朝廷法令必欲奉行姦宄之人必不敢姑息以撓三
尺之公險躁之士必不敢引進以壞國家之事如

有捏造浮言欲以熒惑上聽紊亂朝政者必舉

祖宗之法請于皇上而明正其罪此臣之所以報

先帝而忠于皇上之職分也尤望皇上大奮乾

斷益普離明大臣之中有執法奉公如陳炯者悉與

主持裁斷俾得以各守其職業而無所畏忌則

國是不移而治安永保矣臣誠不勝懷忠奮義憤發

激切之至奉

聖旨朕踐祚之初方在冲幼賴卿受遺先帝盡忠

輔佐以至于今紀綱振肅中外又寧此實宗

靈所共昭鑒惟是姦邪小人不得遂其徇私自便之

計假公伺隙肆為讒譖者累累有之覽奏忠義奮激

朕心深切感動今後如有訛言譸張撓亂國是的是

朕必遵祖宗法度置之重典不宥卿其勿替初心

始終輔朕俾臻于盛治用副虛已倚毗至懷吏部

知道

奉 旨迎母就養謝 遣官効勞疏

臣母 誥封一品夫人趙氏伏蒙 欽差司禮監太

監魏朝伴護來京就養到京又蒙

聖恩 特命司禮監太監李佑

賜勞于郊外隨送至臣私寓臣扶持臣母焚香望

闕叩頭安家訖伏念臣嚴親見背已深風木之悲母

氏幸存亦逼桑榆之景每欲就 帝都而侍養庶幾

竊 天祿以延齡抱此縷情憚于輶濟詎意區區之

悃上軫 宸衷 蒼蒼之高俯從人願叠荷 恩綸

之存注特厯 勅使以將迎 賜勞郊關送歸里第

望慈容而動喜既以紆瞻雲陟岵之懷奏甘膳以承

歡寧復憶饌鯉飲江之樂候起居于八座欣團聚于

一家昔李令伯之陳情未登職仕在潘安仁之奉母

徒賦閒居方之今日所遭詎可同年而語茲蓋恭遇

我 皇上孝隆錫類 愛立因親准孝養 兩官之

心為鞠育此人之惠故烏鳥獲伸其私願螻蟻亦賴

以曲成臣不自知宿世于 國家有何緣分今生一

草芥冒此 寵榮仰而戴 天府焉省已方寸既定

何牽繫之為憂七尺雖微矢捐糜而罔惜臣誠無任

激切感戴銘心圖報之至奉 聖旨卿母已至京朕

心甚悅覽奏謝知道了 聖母即欲召卿母入見今既稱高年遠來勞頓且從容就養禮部知道欽此

謝 兩宮聖母疏

臣母 誥封一品夫人趙氏伏蒙 聖恩差司禮監

太監魏朝伴送來京就養到京仰荷

聖母慈聖宣文皇太后 特遣 慈寧宮管事太監

李用 賜勞于郊外隨送至 臣私第 臣即扶母焚香

望闕叩頭謝 恩安家訖 臣母仰沐 慈恩至隆極

渥即當匍匐入 內仰叩 慈尊以少伸頂戴之誠

柰 臣母年高多病加以長途跋涉步履益艱雖勉強

扶行恐不能成禮謹令 臣恭 會極門叩頭代

謝 臣誠不勝感切悚懼之至 聖母仁聖懿安皇太

后同俱奉 聖旨覽卿奏謝 聖母知道了禮部知道

謝 賜母首飾等物疏

臣母伏蒙 欽取來京就養今日仰荷 聖恩差司

禮監太監張鯨齋 賜 臣母金纒絲鑲嵌青紅寶石

珍珠長春花頭面一副銀八寶豆葉一百兩紅紵絲

蟒衣一疋青紵絲蟒衣一疋紅羅蟒衣一疋青羅蟒

衣一疋裡絹四疋甜食二盒又蒙 兩宮 聖母俱

有首飾八寶齋衣珍食之 賜 臣謹于私寓扶侍 臣

母焚香望闕叩頭祇領訖潘輿將母方承愛日之歡漢闕馳恩忽拜自天之貺賁榮光于荆布藉景色于桑榆寶鬢莊嚴巧出天宮之樣金精璀璨寵頒玉府之藏珍羞充溢于圓方華綺煒煌于筐篚驚傳閭巷榮感簪紳實臣子不敢覬之殊恩亦載籍所未聞之盛事欲酬高厚惟當移孝以爲忠苟利國家敢惜捐軀而碎首臣母子誠不勝頂戴感切之至奉

聖旨覽卿奏謝朕知道了禮部知道欽此 謝

謝 兩宮聖母疏

臣伏蒙 欽取到京就養今日仰荷 聖母慈聖宣文皇太后 特賜金纒絲鑲嵌青紅寶石珍珠長春花頭面一副珍珠寶石環一雙紅羅蟒衣一疋青紵絲蟒衣一疋紅紵蟒衣襖兒綠膝襪裙一套青紵絲蟒衣襖兒綠紵絲暗花裙一套銀八寶豆葉三包每包二十兩葷素盒八副該 慈寧宮管事太監謹柯陳相恭捧到臣私第謹叩頭祇領訖 慈光下被天賚洪敷凡在聽聞舉深忻躍矧身膺 異數獨被隆施捐糜此軀未足言報臣母子誠不勝頂戴感切之至 聖母仁聖懿安皇太后 賜金纒絲首飾一

副織金閃色紵絲六表裏輦素盒八副謝疏同俱奉
聖旨覽卿奏謝 聖母知道了禮部知道欽此

為故大學士高拱乞 恩疏

伏蒙 發下原任大學士已故高拱妻張氏陳乞
卹典一本該文書官田義口傳 聖旨高拱不忠欺
侮朕躬今已死了他妻還來乞恩典不准他欽此
等聞 命震驚罔知所措看得高拱賦性愚戇舉動
周章事每任情果于自用雖不敢陷欺 主之大惡
然實未有事 君之小心以此誤犯 天威死有餘
戮但伊昔侍 先帝于潛邸九年有餘犬馬微勞似

足以少贖罪戾之萬一 皇上永言孝思凡
簪履之遺猶不忍棄况係舊臣必垂軫念且當其生
前既已 寬斧鉞之誅今值歿後豈復念宿昔之惡
其妻冒昧陳乞實亦知 皇仁天覆 聖度海涵故
敢以匹婦不獲之微情仰干鴻造也查得

世宗肅皇帝時原任大學士楊一清翟鑾俱以得罪
褫職後以 大慶覃恩及其子陳乞俱蒙 賜復原
職給與 卹典今拱之事體實與相同夫保全舊臣
恩禮不替者 國家之盛典也山藏川納記功忘過
者 明主之深仁也故 臣等不揣愚昧妄為代請不

獨欲 俯存閣臣之體實冀以仰成 聖德覃布

鴻施又以愧死者勸生者使天下之為臣子者皆知

竭忠盡力以共戴 堯舜之君也仰惟 聖慈裁祭

臣 等不勝戰慄隕越之至奉

聖旨高拱負 先帝委託藐朕冲年罪在不宥卿等

既說他曾侍 先帝潛邸講讀朕推念舊恩姑准復

原職給與祭葬禮部知道

請裁定 宗藩事例疏

先該 臣等題奉 欽依重修 大明會典節奉

勅諭卿等宜督率各官悉心講究以成一代畫一經

常之典昭示無極欽此欽遵隨開館纂修間 臣等看

得各衙門事例惟禮曹為繁 國家典章亦惟禮制

為重乃屬纂修官先將禮曹纂完送副總裁官看改

然後呈送 臣等刪潤近該副總裁禮部尚書潘晟等

將各官所纂禮曹事例參互考訂呈稿到閣 臣等仔

細參詳 國家典禮如儀制秩祀等項皆出

祖宗列聖睿思親定至精極當 臣等不敢妄議但次

其年月刪其重複分類編錄足垂永久惟 宗藩一

事條例最繁前後事體參差不一似皆因時立法未

能悉協于中至嘉靖四十四年該禮部題覆言官建

議始定爲 宗藩條例一書頒布天下比時禮官亦自以稽考 累朝典制博采諸宗建白斟酌損益既殫厥心矣然以 等愚見觀之揆諸事理尚多有未當者推原其意徒以 天潢支派浩繁祿糧匱乏國家之財力已竭 宗室之冒濫滋多不得不曲爲隄防嚴加裁抑願集議之始未暇精詳中間彼此矛盾前後牴牾或減削太苛有虧敦睦或擬議不定靡所適從或一事而或予或奪或一令而旋行旋止或事與理舛窒碍難行或法與情乖輕重失當徒使奸猾得以滋弊有司無所持循略舉數端可知其槩如

親王樂工二十七戶乃

高皇帝所定載在

會典

蓋以 藩王體尊其燕饗皆得用樂不獨迎接

詔勅爲然今乃槩從裁革此減削太苛事例之未妥

者也又如 親王故絕旣許爲之繼封以重大宗又

云親弟親姪方許請繼及查例行之後亦有不由親

弟親姪而繼封者此議擬不定亦事例之未妥者也

又如 郡王初封者爵秩雖同然有 帝孫 王孫

之異亦當視其親疎以爲差等今房屋等項一槩停

給此親無隆殺亦事例之未妥者也又今文官三品

以上皆得給與祭葬 郡王體亞 親藩乃身後墳

價槩從停給此恩卹太薄亦事例之未妥者也又如郡王故絕者不准襲封而以罪革奪者反得襲封將軍等未有子者許選繼室而親郡王未有子者乃反不許選繼擅婚庶人名糧止給五十石而罪宗庶人乃得七十餘石又歷世不減此恩紀失倫亦事例之未妥者也又如郡王與親王同城住居故絕者止以本等官職奉祀而另城郡王故絕者其子又得世授鎮國將軍此事同例異亦事例之未妥者也又如擅婚子女不定年限槩從查革有一府而至數百位者于法不可盡革不革則又廢法此釐革無

序亦事例之未妥者也又如郡王故絕與以罪革降者事體原自不同其冊印亦當分別進繳今乃槩從繳奪此混施無別亦事例之未妥者也又如濫妾及花生傳生子女冒請名封將保勘宗室通行革奪長史等官俱問發邊衛充軍及流官寄籍奏請選婚者革退另選將被選之人發邊衛充軍遇赦不宥此立法太嚴亦事例之未妥者也諸如此類尚不可以悉數夫令所以布信數易則疑法所以防奸二三則玩見今該部處置宗藩事情悉用此爲準因時救弊似亦未爲大害但欲勒成簡冊昭示將來則必考

求 國體審察人情上不虧 展親睦族之仁下不
失酌盈濟虛之術使情法允協哀益適宜乃足為經
常可久之規垂萬世不刊之典今觀其例議實多未
妥臣等欲因仍紀載則恐事理不順有碍施行欲徑
從改易則先皆題奉 欽依今不敢以臆見擅為更
定照得萬曆四年六月內該禮部題為名封事奉
聖旨這宗室濫妾所生子女于例已不許請名請封
乃至今改姓易籍發為編民殊非情理之當見今重
修會典此等條例都着議擬停當改正行欽此合無
勅下禮部遵照 前旨將前項條例再加斟酌并

累朝見行事例係關 宗藩者悉行哀集分類編錄
仍會同多官議擬停當上請 聖裁著為憲令然後
開送臣等纂入 會典庶法以畫一而可守令以堅
信而不移懸諸日月萬世無弊矣緣係纂修事理臣
等未敢擅便謹題請 旨奉
聖旨禮部看議來說

番夷求貢疏

臣近者接得巡撫甘肅兵部右侍郎兼都察院右僉
都御史侯東萊差人齎到烏思藏僧人番書一紙譯
稱釋迦摩尼比丘鎖南堅錯賢吉祥合掌頂禮

朝廷欽封幹大國事閣下張知道你的名顯如日月
天下皆知有你身體甚好我保佑 皇上晝夜念經
有甘州二堂地方上我到城中爲地方專先與

朝廷進本馬匹物件到了我和闡化王執事賞賜乞
照以前好例與我我與 皇上和大臣晝夜念經祝
讚天下太平是我的好心壓書禮物四臂觀世音一
尊瓊瓊二段金剛結子一方有閣下分付順義王早
早回家我就分付他回去虎年十二月初頭寫等因
并虜酋順義王俺荅亦有稟帖爲本僧轉乞通貢俱
送到臣看得烏思藏僧人鎖南堅錯 虜酋俺荅

所稱活佛者也去年虜酋西行以迎見活佛爲名
欲西搶瓦剌比時臣竊料虜酋此行必致敗衄符其
既敗而後撫之則彼之感德愈然而款貢可以堅久
乃授策邊臣使之隨宜操縱因機勸誘陰修內治以
待其變今聞套虜連遭喪敗俺荅部下番夷悉皆離
叛勢甚窘蹙遂託言活佛教以作善戒殺阻其西掠
勸之回巢又因而連合西僧向風慕義交臂請 貢
獻琛來王自此虜款必當益堅邊患可以永息此皆
天地 祖宗洪庇 皇上威德所及而臣以淺薄謬
當樞軸躬逢太平有道之盛誠不勝欣慶不勝仰戴

除求 貢一事已奉 旨下禮兵二部議處惟本僧

所餽臣禮物雖遠人何化之誠難以峻拒但臣係輔

弼近臣參預 密勿義不得與外夷相通查得 國

初翰林學士宋濂因朝鮮國王餽禮求文却而不受

曰天朝之臣豈可受小夷之禮 高皇帝聞而深喜

之其能守義自重如此况臣列職 帷幄與詞臣不

同而通 貢大事又非求文之比緣是不敢私受謹

略具其事本末仰乞 聖明俯賜裁奪 勅下臣愚

遵行庶不孤遠夷歸饗之誠亦以見人臣不敢自專

之義為此謹具題 知伏候 勅旨奉

聖旨卿輔理勲猷宣播遐邇通戎狄咸賓朕得以垂拱
受成深用嘉悅覽奏具見忠慎宜勉納所餽以慰遠
人饗風慕義之誠禮部知道欽此

召見紀事

先是禮部以 聖體大安遵 旨擇于初九日請

皇上視朝已奉 俞允至初八日遣文書官至內閣

諭臣居正朕明日御朝切欲與先生一見柰先生前

有旨不在朝參之列明日未朝之時先于平臺召見

說與先生知之是日黎明臣入見于 平臺致詞云

恭惟 聖躬康豫 福壽無疆臣犬馬微衷不勝欣

慶叩頭稱賀 上說朕久未視朝國家事多勞先生

費心臣對言臣久不覩 天顏朝夕仰念今蒙

特賜召見下情無任懽忻但 聖體雖安還宜保重

至于 國家事務臣當盡忠幹理 皇上免勞掛懷

上云先生忠愛朕知道了隨 賜銀五十兩彩幣六

表裏燒割一分酒飯一卓臣叩頭稱謝 上又諭云

先生近前看朕容色臣承 旨至 御座前跪

上親執臣手仰見 天顏和粹 玉音清亮不勝忻

忭 上又說朕日進膳四次每次俱兩碗但不用葷

臣對云病後加飧誠為可喜但元氣初復亦宜節調

過多恐傷脾胃然不但飲食宜節臣前奏疹後最忌

風寒與房事尤望 聖明加慎 上云今 聖母朝

夕視朕起居未嘗暫離三官俱未宣召先生忠愛朕

悉知 上又說十二日經筵其日講且待五月初旬

行臣謹承 旨叩頭而退始鳴鐘 御門百官致詞

稱賀云

請更定 時享祝文疏

據太常寺手本為祭祀事該本寺卿溫純等開稱

太廟時享原設 九帝后冠服今祝文內稱 五廟

皇祖考妣太皇太后 皇高祖考憲宗純皇帝 皇

高祖妣孝貞純皇后 皇曾伯祖考孝宗敬皇帝

皇曾伯祖妣孝康敬皇后 皇曾祖考睿宗獻皇帝

皇曾祖妣慈孝獻皇后 皇伯祖考武宗毅皇帝

皇伯祖妣孝靜毅皇后 皇祖考世宗肅皇帝 皇

祖妣孝潔肅皇后 皇考穆宗莊皇帝 皇妣孝懿

莊皇后職等照得 憲廟而下旣備列 六帝后乃

又加以 五廟則不止于九矣今查 五廟內實止

太祖 成祖 英宗三廟設祭而祝文則多稱 二

廟于座位未合似應改正其歲暮 大禘東壁下配

享設壽春王以下共十五位神牌按 帝系圖壽春

王于 太祖爲伯霍丘以下七王爲兄寶應以下七

王爲姪自 英宗以來相沿稱壽春及霍丘以下七

王俱爲皇高伯祖寶應以下七王爲皇曾伯祖倫序

旣紊且世次已遠不宜仍稱高曾伯祖查親盡

帝 后止稱徽號今諸王似應改稱本爵庶于名義

爲協等因到閣據此 臣等恭照 時享之制止于

九廟 太祖 成祖百世不遷其餘則以親序而

祧廟不與焉查得 先朝祝文弘治中有 憲宗而

上稱 八廟太皇太后嘉靖初自 孝宗而上稱

六廟皇祖考妣太皇帝后至 孝烈皇后升祔

仁宗奉祧始稱 五廟隆慶年間因而不改蓋其時
世宗新升之主卽 孝烈舊祔之位世數猶未增也
至我 皇上嗣統則世次異矣乃 時享祝文自
皇高祖憲宗皇帝至 皇考穆宗皇帝已備 六廟
之數而 太祖 成祖 英宗三廟猶仍 五廟之
稱揆之世數名義委屬未妥 臣等竊惟孝莫大于尊
祖禮莫嚴于假 廟當 皇上躬親對越之頃正
祖宗神靈陟降之時 帝后尊稱不宜徑從簡略
廟祔世次尤當序列分明合無比照歲暮 大禘禮
將 時享祝文通列 九廟帝后聖號以致如在之
誠不必更稱 五廟字樣其 大禘配享壽春等王
親屬已遠稱謂未安宜將諸王神牌俱止稱本爵其
皇高祖祖等稱盡行裁去庶得情禮之當合候
命下容 臣等另撰祝文進呈 御覽發下該寺并壽
春等王神牌一體遵照改正施行 奉
聖旨是該衙門知道欽此

看詳戶部進呈 揭帖疏

伏蒙 發下票擬章奏內有戶部進呈 御覽揭帖
一本 臣等看得 國家財賦正供之數總計一歲輸
之太倉銀庫者不過四百三十餘萬兩而細至吏承

納班僧道度牒等項毫釐絲忽皆在其中矣嘉隆之間海內虛耗公私貯蓄殊可寒心自 皇上臨御以來躬行儉德覈實考成有司催徵以時逋負者少姦貪犯賊之人嚴併不貸加以北虜款貢邊費省減又適有天幸歲比豐登故得倉庫積貯稍有贏餘然閭閻之間已不勝其誅求之擾矣 臣等方欲候 國用少裕請 皇上特下蠲租之詔以慰安元元之心今查萬曆五年歲入四百三十五萬九千四百餘兩而六年所入僅三百五十五萬九千八百餘兩是比舊少進八十餘萬兩矣五年歲出三百四十九萬四千

二百餘兩而六年所出乃至三百八十八萬八千四百餘兩是比舊多用四十萬餘矣問之該部云因各處奏留蠲免數多及節年追贓人犯財產已盡無可完納故入數頓少又兩次奉 旨取用及奏補金花拖欠銀兩計三十餘萬皆額外之需故出數反多也夫古者王制以歲終制國用量入以爲出計三年所入必積有一年之餘而後可以待非常之事無匱乏之虞乃今一歲所出反多于所入如此年復一年舊積者日漸消磨新收者日漸短少目前支持已覺費力脫一旦有四方水旱之災疆場意外之變何以給

之此皆事之不可知而勢之所必至者也比時欲取之于官則倉廩所在皆虛無可措處欲取之于民則百姓膏血已竭難以復支而民窮勢感計乃無聊天下之患有不可勝諱者此臣等所深憂也夫天地生財止有此數設法巧取不能增多惟加意樽節則其用自足伏望 皇上將該部所進揭帖置之 座隅時 賜省覽總計內外用度一切無益之費可省者省之無功之賞可罷者罷之務使歲入之數常多于所出以漸復 祖宗之舊庶 國用可裕而民力亦賴以少寬也鄙諺云常將有日思無日莫待無時想

有時此言雖小可以喻大伏惟 聖明留意

論外戚封爵疏

今日該文書官立得用口傳 聖旨皇親都督同知王偉着進封伯爵擬旨來行欽此并將正德二年封慶陽伯復儒嘉靖二年封泰和伯陳萬言及各子男輩授官事例傳示臣等恭照 聖祖定制公侯伯爵非有軍功不得濫封國初如魏定兩公自以佐命元勳聯姻 帝室彭城惠安雖託籍戚里然亦半有軍功胙土剖符皆無容議宣德中季始有恩澤之封弘治以來遂為故事然實非 高皇帝之舊制也嘉靖

八年 世宗皇帝曾詔廷臣會議外戚封拜事理該
府部等衙門議稱 祖宗之制非軍功不封夫爵賞
者天下之爵賞人主所恃以勵世之具也今使椒房
之屬與有大勲勞之人並享茅土非所以昭有功勸
有德也今除已封見任者姑准終身外此後凡
皇親駙馬俱要查照 祖宗舊制不許夤緣請封其
有出自 特恩一時賞賚者亦止照 祖宗朝故事
量授指揮千百戶等官以榮終身敢有違例奏請希
圖恩澤妄引洪熙以後事例比乞者聽本部及科道
官卽時舉劾寘之重典以爲貪冒不知止足者之戒

等因奉

聖旨卿等旣會議停當外戚封爵古未有

我 皇祖亦未有制典規定二國公雖爲戚里實開
國佐命靖難元勲難同其功彭城惠安二伯亦有軍
功居半都着照舊襲封其餘以爲戚里濫膺重爵名
器旣輕人不知勸見任的都當查革但其中有干

先朝恩命及已封者姑與終身子孫不許承襲欽此
此我 世祖趙世之見同符 二祖非近代帝王所
能彷彿其萬一者嗣後雖曾垂澤安平許傳再世則
以 孝烈皇后有翦逆保駕之功 特旨酬賞非援
例進封者也 臣等竊以爲我 皇上當英妙之齡事

事皆祇適 先猷憲章 烈祖則 太祖定制與

世祖聖諭正宜仰稽而效法者但既有正德以後事

例王偉係 中宮至親臣等不敢抗違謹擬 傳帖

上請 聖裁發下吏部施行其 皇親子男輩姑且

從容俟後再有 大喜慶事然後 加恩未晚也臣

等謹查嘉靖八年 世宗皇帝聖旨及廷臣會議二

本進呈 御覽用見 先朝恩封外戚始末伏惟

聖明垂覽

請停止輸錢內庫供賞疏 昨該文書官姚秀口傳 聖旨內庫缺錢賞用着臣

等擬 旨傳該部鑄造進用欵此臣等查得萬曆四

年二月奉 聖旨萬曆通寶錢着鑄二萬錠與嘉

靖隆慶等相兼行使戶工二部知道欵此本月又該

工部題鑄造事宜節奉 聖旨錢式照嘉靖通寶鑄

金背一萬四千錠火漆六千錠着以一千萬文進內

庫應用欵此萬曆五年二月內該戶部進新鑄制錢

又奉 聖旨這錢錠還查原定二萬之數以一半進

內庫應用一半收貯太倉欵此及查工部題議制錢

二萬錠該錢一萬萬文用工本銀十四萬九千兩大

半取之太倉銀庫此奉 旨鑄錢之大略也臣等看

得先朝鑄造制錢原以通弊便民用存一代之制鑄成之後量進少許呈樣非以進供上用者也萬曆二年鑄造之初亦止進樣錢一千萬文其後以一半進用已非通幣便民之本意今若以賞用缺錢徑行鑄造進用則是以外府之儲取克內庫大失舊制矣且京師民間嘉靖錢最多自鑄行萬曆制錢之後愚民訛言便謂止行萬曆新錢不行嘉靖舊錢小民甚以爲苦近該五城榜示曉諭民情少定今若又廣鑄新錢則嘉靖等項舊錢必致阻滯不行于小民甚爲不便又與原奉

聖旨與嘉靖隆慶等錢相兼行使之意相背臣等揆度事體似爲未便伏望聖明裁審暫停鑄造進用之旨待二三年後如果民間錢少再行鑄造亦未爲晚仍乞皇上曲納臣等節次所陳狂愚之言敦尚儉德樽節財用諸凡無益之費無名之賞一切裁省庶國用可充民生有賴不然以有限之財供無窮之用將來必有大可憂者臣等備員輔導敢不盡其愚伏惟

聖明亮察

萬曆七年四月十九日上次日奉

新刻張太岳先生文集卷四十四

請罷織造內臣對

工部覆禮科左給事中顧九思工科都給事中王道成等疏請罷蘇松及應天織造取回原差內臣上遣文書官傳諭云御用袍服緊急織造且未可罷若如部議取回內臣改屬撫按有司則織造不精誰任其責且見有錢糧不必加派先生每擬票來臣與同官二臣持工部疏入見上於便殿奏云近日蘇松等處水災重大據撫按官奏報及臣等所聞百姓困苦流離朝不謀夕有羣聚劫奪者地方錢糧委難

措處且自前年星變時親奉 明旨停止織造着孫
隆回京至今尚未完報是 詔令不信而 德澤不
宣也臣等謂宜從該部所請以彰 皇上敬 天恤
民至意民惟邦本願少加 聖心 上曰朕未嘗不
愛惜百姓但彼處織造不久當完遠不過來春爾臣
對言 皇上德意臣民無不欣仰卽孫隆在彼亦能
仰體 聖心安靜行事但地方多一事則有一事之
擾寬一分則受一分之賜今彼中織完十未四五物
料錢糧尚有未盡徵完者災地疲民不堪催督願
皇上且取回孫隆其應天被災稍輕許坤仍舊可也

上乃許之曰近降去花樣皆御前發出銀兩並未加
派擾民此一件還着織完回京其餘則皆停罷可也
臣等頓首曰幸甚蓋是時宮中自 大婚以來應受
賜者皆籍記以待又當供奉 慈寧歲幣益不足盡
仰東南織造 上心亦難之乃從中發銀五千兩畀
孫隆約用盡更請一不以煩百姓外廷莫得知也故
上指此爲言因以部疏授臣云先生將去票來又
顧臣等云君臣一體今有司通不奉行百姓安得受
惠臣對言誠如 聖諭臣等今日亦無非推廣 皇
上德意而已願 皇上重惜民生保固邦本則百萬

生靈仰戴 至仁實 社稷靈長之慶因叩頭出次
日奉 聖旨蘇松地方災傷重大孫隆着查近降花
樣御前發去銀兩應織袍服上緊湊織完日即便回
京其以前織完的照數解進未完的都着停止物料
等項准作歲造段疋支用撫按官還查數明白具奏
許坤且着照舊

請酌減增造段疋疏

伏蒙 發下工科都給事中王道成等請酌減織造
段疋一本臣等查得先該承運庫太監孔成等以
賞賜夷人段疋缺乏題請行南京蘇松浙江等處增

織於內又將 上用袍服等項併請織造共該七萬

三千疋奉 聖旨工部知道今科臣王道成等因見

東南地方災傷重大民力罷敝恐加派擾民故有此
奏臣等看得歲造段疋原有定額 祖宗朝計一歲

所造賞賚諸費尚有贏餘至嘉靖年間賞賚無時每
稱缺乏乃行文於該地方增織謂之急缺段疋然亦
間一行之非可爲常例者也今查萬曆三年該庫已
稱缺乏請於歲造之外添織九萬有餘其時以 大

婚禮重 賞賜浩繁該部不得已欽遵 明旨設法
措處然聞之各地方庫藏搜括已盡經今四年方得

織完而添織之。旨又下計該庫所開數目度其所費非得銀四五十萬不能辦此索之庫藏則庫藏已竭加派小民則民力已疲况今歲南直隸浙江一帶皆有水災頃蒙特恩破格蠲賑又取回織造太監罷困之民方得更生乃又重複加派子惠之恩未洽誅求之令卽施非聖慈所以愛養元元培植邦本之意也民窮財盡賦重役繁將來隱憂誠有不可勝諱者科臣所奏宜留聖心臣等看得該庫偶因三衛夷人賞賜段疋缺少廝豹一樣服色及近年北虜俺荅款貢歲增賞賚溢於舊數故題請添織以

上二項委不可已至於上供御用等項則近年京太監許坤蘇杭太監孫隆織進御前者已自足用不必又取辦於歲造矣臣等愚見伏乞聖明再諭該庫查北虜俺荅一宗賞賜一歲約該幾何及三衛夷人廝豹服色缺少幾何照數行該地方添織卽作歲造之數其餘皆可停止惟復俯從科臣之言一槩減半織造其支費銀兩勅下戶工二部酌處免復加派小民庶近日蠲恤之旨不爲虛文罷極之民少得蘇息也臣等職在帷幄蒙皇上心膂之寄豈不知國用浩繁事在難已敢故爲節省之

言以沽違拂之譽但事關邦本不得不爲深長之慮
伏望 聖慈宥其愚昧 裁酌施行

奉

聖旨東南地方既有災傷這段疋等項准減半織造
其支費銀兩着戶工二部措處毋得加派小民欽此
服闋謝降

勅召見賜衣帶金器疏
先准吏部咨欽奉 聖諭問臣服制幾時滿着吏部
上本起復該部回稱臣服制扣至萬曆七年十二月
二十四日期滿禮當從吉等因備咨到臣遵候開至

本月二十三日仰荷 天恩特降 手勅諭元輔

少師先生在京守制忠孝兩全今當服滿朕心忻慰

特賜玉帶一條大紅坐蟒蟒衣各一襲金執壺一把

金臺盞一副用示眷知念五日見朝畢候朕御平臺

召見以後朝參經筵俱照舊行先生欽承之故諭該

文書官太監孫斌恭捧到臣私寓臣謹焚香望 闕

盥手捧讀叩頭祇領訖伏念臣猥以庸虛特蒙 眷

遇曩邁家嚴之變將匍匐以言奔顧惟 慰勉之堅

屢籲號而莫遂繼荷 聖慈之曲軫敢煩 睿思以

折衷許臣謝常祿以在公容臣襄大事而歸里自違

丘隴趨覲 闕廷入則荷橐持籌遵墨綬之往制出
乃寢苦枕塊守直經之常經既獲承 聖王之倚毗
秉克盡匹夫之懇悃斯蓋我 皇上乾坤幃載父母
愛憐酌權宜於禮典之中垂體恤於使令之外鏤鐫
識感啣結難酬惟茲隙駟之易馳倏爾祥琴之在御
先王之制不敢踰雖勉循禫柎之文人子之心不能
忘實倍切居諸之感乃荷 宸衷俯記降 清問於
銓曹復蒙 綸札傳宣接 威顏於 中禁祗佩
袞辭之藹郁重永 朋錫之駢蕃奩出壺觴驚鱗裏
黃金之質衣加鞶帶羨紅光白壁之珍更令既毀之
殘軀還被斯皇之寵飾捧而心醉服以魂搖昔名臣
若榮溥夜賢之輩際盛世在未宣順化之間固常變
禮從時並荷 先朝之知遇未聞 殊恩異數有如
今日之遭逢者也臣敢不益摠丹悃仰荅 隆施倘
筋力之未疲遠道寧忘於驅策如髮膚之可效微生
何愛於捐糜謹欽遵 聖諭於二十五日 廷見後
卽趨詣 平臺恭候 召見誠不勝激切感戴之至

召見

平臺記事

欽奉 勅諭召見於平臺致詞云臣前奉 欽依在

京守制服滿朝見奉 面諭先生全忠全孝萬古留
名臣奏臣蒙 皇上天恩委曲體悉故得以少盡臣
子之情不勝感戴叩頭稱謝又奏昨蒙 聖恩特降
手勅恩賚殊常尤不勝感戴叩頭謝畢又奏昨奉
勅諭着臣以後照舊朝參臣卽當欽遵但年前數日
尚在三年之內餘哀未忘仍望 皇上俯容再寬數
日免令朝參陪祀候元旦慶賀後照舊朝參供職
上說先生元旦出來也能臣叩頭承 旨 上又說
與先生酒飯喫臣叩頭謝又奏臣在制中屢荷 兩
宮聖母慈恩賜賚稠疊今服滿欲請各宮門外叩頭

謝未敢擅便請 旨 上說是着張宏引進臣叩

頭退隨詣 慈慶宮外叩頭蒙 仁聖皇太后遣中

使傳 諭云先生忠孝兩全丁宜益盡心輔佐賜銀

五十兩紵絲四表裏隨詣 慈寧宮門外叩頭蒙

慈聖皇太后着引伴太監張宏傳 諭云 皇帝冲

年凡事多賴先生輔佐天下太平今服制已滿忠孝

都全了宜益盡心處置國事 特賜膳九品金執壺

一把金臺盞一副金鑲牙筯一雙銀五十兩彩段四

表裏葷素食八盒甜食四盒酒十瓶 命太監張宏

迺酒三盃管待

辭免

恩命疏

准吏部咨爲欽奉 聖諭事查得節奉 勅諭朕大
婚禮成內閣輔臣忠勞茂著宜加特恩元輔張居正
受 先帝仗託盡忠輔導保護啓迪勲猷獨茂宜加
殊禮以答元功但元輔以守制懇辭暫從其請候制
滿之日該部奏請加恩如勅奉行今本官服制已滿
謹遵 勅諭題請加恩等因奉 聖旨朕元輔 社
稷重臣受 先帝顧託翊戴朕躬以及大婚弼成治
理勲績隆茂着加大傅歲加祿米一百石原廕武職

伊男陞一級世襲着南鎮撫司僉書管事用副朕酬
獎元功至意欽遵備咨到臣臣聞 命驚惶拊躬局
促仰惟 皇上鴻仁下逮駿惠旁敷在因嘉禮之成
肆舉叙勞之典以臣叨居首弼加惠獨先念臣方在
宅憂懸賞以待茲允高臣之請渙頒追錄之恩 三
錫殊榮一朝並至旣已奉有 成命詎宜仰瀆 宸
嚴但臣自揣踈庸誤承 眷遇一從受事以至于今
每自省循諸所蒙被豈獨近代臣人之所稀覯抑亦
在昔載記之所罕聞卽如頃者服制未除預垂 清
問迄于祥禱甫屆過降 溫綸 袞辭塵十札之褒

珍貺踰百朋之重黃金白璧炫耀門庭錦綺華章充溢筐篚臣伏思惟盆盎之器不啻盈矣鼯鼠之腹亦既飽矣及今克自抑畏庶幾獲免傾危而淡旬之間豐施荐及越歲之後異命且申注之已盈而不虞其將覆敝之過飽而不慮其難容在輿論爲未孚尤天道之所忌此臣所以夙夜不寧凌兢罔措者也伏望 聖慈鑒臣素悃俾仍舊員 特寢新恩庶愚分獲安幸道顛隳之咎微軀未始得紓啣結之忠臣誠不勝戰兢跼踖懇切竢 命之至

奉

聖旨卿保進朕躬夙夜匪懈輔宣化理茂著成功恭維酬勲宜從優典朕體卿謙讓至情今次所頒恩數欲卿安受視 先朝施及元臣故事已自不同朕心方以爲歉卿豈可復行遜避宜勉遵成命以慰朕懷所辭不允吏部知道

再辭

恩命疏

昨臣以蒙 恩殊常具奏辭免該文書官姚秀送本到閣口傳 天語着同官二臣擬票 溫旨勉臣遵奉不必再辭隨奉 聖旨卿保進朕躬夙夜匪懈輔

宜化理茂著成功眷德酬勲宜從優典朕體卿謙讓
至情今次所頒恩數欲卿安受視先朝施及元臣
故事已自不同朕心方以為歉卿豈可復行遜避宜
勉遵成命以慰朕懷所辭不允吏部知道欽此仰惟
聖眷優崇宸綸藹郁敢不祇若用彰二寵榮但臣
自以蒙被過隆難於報答涯分久溢恐致顛危故屢
次瀆陳非敢矯飾誠省躬揣分有萬七不能自安者
也今奉聖諭諄切又該同官二臣咸導臣以將順
誠臣以抗違二臣竊伏思惟俯自斟酌因憶前年蒙
侍皇上日講曾奉面諭先生功大朕無可為

只是看顧先生子孫便了臣每念及此輒為涕零夫
施及於已身者其恩猶淺施及於子孫者其恩為深
戴德於一時者其報有盡戴德於後世者其報無窮
今蒙聖恩憐念臣男擢之衛司延以世賞藐焉朝
息荷此殊榮斯蓋前論所謂看顧臣子孫倦倦
之意也臣不勝感激不勝頂戴謹拜手祇領仍囑臣
後嗣世效犬馬仰報生成惟是三公崇階以待者
碩在本朝文職咸不敢居萬鍾厚祿以賜勲親臣
昔已蒙恩豈宜重冒惟此二項殊典揣已終不
敢當伏望聖慈俯鑒臣愚准臣量受臣男陞廕其

太傅祿米之加 俯容辭免庶 橫恩不致於濫及
微分亦得以少安履厚戴 高不敢忘報臣 冒
天威不勝戰慄隕越之至

奉

聖旨卿功在 社稷不惟朕所眷知亦中外臣民所
共聞見進秩加恩於禮匪過乃又固辭不已朕心益
用弗寧今諒卿悃誠特准辭免太傅以成卿勞謙廉
讓之美其餘宜勉遵成命慎毋再辭吏部知道

辭考滿加恩疏

准吏部咨題請稽考績以優輔臣事內稱臣於萬曆

五年九月內聞臣父憂奏乞回籍守制荷蒙 皇上

諭留准假歸葬旋 詔還內閣至萬曆七年十二月

二十四日服滿起復通計前後歷任年分除給假回

籍不計外其餘月日皆實在 內閣輔政扣至萬曆

七年十二月十七日止一品九年滿後又歷三年例

應考滿給由等因奉 聖旨卿等說的是元輔爲朕

勉留夙夜在公忠勤匪懈實與見任供職者不殊你

部裏便查考滿恩例從厚開擬來看備咨到臣臣伏

誦 綸音不勝惶悚竊惟該部所奏乃課功常典臣

之所處則值事之變而酌禮之中非可以常典槩論

者也今且無論臣功之有無與課之殿最但以事理言之追憶前年先臣不祿臣聞訃之初五內崩裂瀝血陳情惟乞一去而已乃奉 聖諭懇留至於三四此時臣雖在昏迷中猶念 先帝之顧託未終 聖母 皇上之深恩未報犬馬戀主實切依依而烏鳥私情又有不能自釋者乃不得已而爲在京守制之請仰荷 聖慈俯從又 特允歸葬旋即 召還免其 朝參停止支俸令以素服在閣辦事臣出則綜理 國事盡在公之義入則守其直經執居喪之禮是臣之不去者報 君恩也守制者報親恩也士大

夫有識者咸謂 皇上之所以處臣與臣之所以處於君臣父子之情庶幾兩全而無害矣然身雖處於公家事實殊於見任今乃又計美前後月日通作實歷積日累勞循例考滿則事同見任禮曠居喪君臣之義雖全父子之情則缺矣 皇上昔日之所以處臣與臣之所以自處者豈不兩失之乎臣又查得前代典禮與 本朝律令凡奪情起復者皆居官食祿與見任不殊故先年大學士楊溥李賢等皆從服中陞官考滿以事同見任故也今臣乃辭俸守制皇上原夫奪臣之情臣亦未嘗於制中起復比之諸

臣事體原自不同况前年荷蒙 聖恩以 大婚禮

成叙錄 內閣諸臣晉秩廕子獨臣以服制未滿

特勅該部俟制滿而後題請是 皇上亦諒臣在服

制之中不可以加恩故也夫既不可以加恩又獨可

以考滿乎蓋事必揆諸天理之當即乎人必之安乃

無歉恨所謂求仁而得仁者今臣自審於理欠當於

心未安故不得不仰控 聖明冀申情款惟求協夫

事理之中而已非畏人之議已而故為是喋喋也伏

望 聖慈俯鑒愚誠 特停恩命 勅下吏部免臣

給由庶臣得以安心供職而 皇上曲全之仁與

臣自處之義終為完善無所虧缺矣臣於此理則

已詳 皇上聖明必垂洞鑒萬望即 賜俞允免致

再三陳控煩瀆 宸嚴臣不勝惶恐戰慄懇切祈望

之至

奉

聖旨卿昔為朕勉留夙夜在公忠勤彌篤殊勲茂績

中外所知該部題請考滿加恩委係盛典茲覽卿奏

辭俸守制與奪情起復不同朕心更覺洞然卿之所

處實為恩義兩盡足以垂範萬世特允所辭以全忠

孝大節至於卿之勲勞簡在朕心當別有酬眷吏部

歸政乞休疏

臣一介草茅行能淺薄不自意遭際先皇拔之侍從之班昇以論思之任壬申之事又親揚末命以皇上爲託臣受事以來夙夜兢懼恒恐付託不效有累先帝之明又不自意特荷聖慈眷禮優崇信任專薦臣亦遂忘其愚陋畢智竭力圖報國恩慙怨有所弗避勞瘁有所弗辭蓋九年於茲矣每自思惟高位不可以久竊大權不可以久居然不可遽爾乞身者以時未可爾今賴天地祖宗洪佑中外

安盛 大禮 大婚 耕籍 陵祀鴻儀鉅典一

修舉 聖志已定 聖德日新 朝廷之上忠賢濟

濟以 皇上之明聖令諸臣得佐下風以致昇平保

鴻業無難也臣於是乃敢拜手稽首而歸政焉且臣

稟賦素弱比年又以任重力微積勞過慮形神頓憊

血氣早衰踰五之齡鬚髮變白自茲以往聰明智慮

當日就昏蒙若不早自陳力以致折足覆餗將使王

事不終前功盡棄此又臣之所大恐也伏望 皇上

特出睿斷 親綜萬幾 博簡忠賢俾叅化理 賜

臣骸骨生還故鄉庶臣節得以終全駑力免於中蹶

臣未竭丹衷當令後之子孫世世爲大馬以圖報效也

奉

聖旨卿受遺 先帝爲朕元輔忠勤匪懈勲績日隆朕垂拱受成荷毗正切豈得一日離朕如何遽以歸政乞休爲請使朕惻然不寧卿宜仰思 先帝丁寧顧託之意以社稷爲重永圖襄贊用慰朕懷慎無再辭吏部知道

再乞休致疏

昨臣以 大禮畢成具疏乞休伏奉 聖旨卿受遺

先帝爲朕元輔忠勤匪懈勲績日隆朕垂拱受成倚毗正切豈得一日離朕如何遽以歸政乞休爲請使朕惻然不寧卿宜仰思 先帝丁寧顧託之意以社稷爲重永圖襄贊用慰朕懷慎無再辭吏部知道臣聞 命自天不勝感悚念臣發跡寒卑賦才謏劣仰承 先帝顧託之重祇荷 皇上眷遇之隆分當捐身度以仰酬 高厚之萬一豈敢輒求引退圖遂私懷但臣葵藿之志雖殷而犬馬之力已竭一自壬申受事以至於今惴惴之心無一日不臨於淵谷中遭家難南北奔馳神疲於思慮之煩力疲於擔負之重

以致心血耗損筋力虺隤外若勉強支持中實衰憊已甚殫荼茹堇苦自知之恒恐一日顛仆有負重託欲乞身於聖明之前非一日矣獨念國事未定大禮未完口嚅嚅而不忍言心依依而未能舍今賴皇上神聖臣得以少效愚衷中外乂安國家無事諸大典禮皆已完就乃敢一言其私蓋亦度其時可以去而後去耳昔顏回有言東野畢之馬將敗矣步驟馳騁朝禮畢矣歷險致遠馬力盡矣而猶求馬不已無何而東野畢之馬果敗故舜不窮其民力造父不窮其馬力是以舜無失臣造父無失馬今臣之乞去亦非敢爲決計長往也但乞數年之間暫停鞭策少休足力倘未卽填溝壑國家或有大事皇上幸而召臣朝閣命而夕就道雖執及荷戈效歿疆場亦所弗避是臣之愛身亦所以愛國也伏惟聖慈矜允臣無任悚懼竢命之至

奉

聖旨連日不見卿出朕心若有所失如何又有此奏今諸大典禮雖已舉行不過禮文之事機務繁重賴卿輔理更切未便是卿閑逸之時古之元老大臣耄耋之年
在朝輔理者不少卿方逾五十豈得便自稱

張大岳文集 卷四十四
衰老忍于言去宜遵前旨卽出來有一德用成始終
大忠着鴻臚寺官往諭朕意吏部知道

謝

聖諭疏

昨該臣再疏乞休未蒙 俞允今日欽奉 龍箋手
勅一道 諭元輔少師張先生 朕面奉 聖母慈
諭云與張先生說各大典禮雖是修舉內外一應政
務爾尚未能裁決邊事尤爲緊要張先生親受 先
帝付託豈忍言去待輔爾到三十歲那時再作商量
先生今後再不必興此念朕恭錄以示先生務仰體

聖母與朕惓惓倚毗至意以終 先帝憑几顧命

全臣節大義先生其欽承之故諭該司禮監太監孫
秀文書房官丘得用恭捧到臣私寓臣叩頭捧讀感
切涕零念臣受 國厚恩未能圖報况身膺 重託
敢遂私圖但自審體力向衰兼之寵祿踰分萬不獲
已仰控 宸嚴茲蒙 聖恩親灑瓊翰恭述 聖母

慈諭責臣以付託之未效勉臣以臣節之當終臣莊
誦之餘感懼兼抱仰惟 慈訓諄切 聖眷優隆誠
所謂義重身輕 威尊命賤臣於此時若復固求私
便是爲自冒 謹誅但臣願忠之心無窮而任事之

力難強仍乞 皇上朝夕於 聖母前達臣微悃
曲賜矜涵庶稅駕之祈雖未遂於今日首丘之願猶
有冀於將來又該鴻臚寺官奉 旨諭臣早出臣卽
宜欽遵赴 閣辦事但臣前以 山陵扈 駕觸冒
風寒近又聞親弟訃音感傷致病伏乞 聖慈垂憫
俯容調理數日少可卽出供職臣不勝惶悚感激之
至

奉

聖旨覽卿奏謝知道了調理數日卽出輔理以慰朕
心禮部知道

請專官纂修疏

先該臣等題奉 欽依重修 大明會典節奉 勅
諭會典一書我 祖宗列聖典章法度綱目具存第
簡編浩穰精覈實難我 皇祖世宗肅皇帝嘗見其
一二舛誤申命儒臣重加較輯比及進覽迄未頒行
似於 聖心猶有未當今特命卿等校訂差訛補輯缺
漏督率各官悉心考究務令諸司一體前後相貫用
成一代畫一經常之典欽此欽遵已經開館纂修去
後近該副總裁等官將所編草稿呈送臣等刪潤止
將舊會典并嘉靖二十九年續修進呈未奉 欽依

引六書彙編 卷四十四
舊稿謄寫一遍稍續以近年事例中間體例尚有未
當紀載頗多缺漏良由副總裁諸臣各有部事相妨
無暇討論講究臣等欲另爲修削苦 閣務浩繁力
有弗給欲因仍舊貫聊取完事則於愚心實有未妥
者竊以會典所載乃 昭代政治之大經大法我
太祖高皇帝稽古定制美善兼該綱目畢舉 列聖
相承間有損益歷世滋久經書愈詳今旣彙爲一書
固當深究本原備詳因革酌古準今以定 一代之
章程垂萬年之典則况欽承 勅諭令臣等校訂差
訛補輯缺漏是於舊本或有未當者亦許以愚瞽之

見上請 聖裁矣今若止將舊本謄寫附以新例則
不過重錄續編而已豈 聖明所以屬託臣等之意
乎顧事必專任乃可責成力不他分乃能就緒往者
纂修 兩朝實錄亦皆專屬副總裁二員臣等又月
有程督歲有稽考乃克有成今會典事理又與 實
錄不同考索講求尤費心力非有專責決難奏功臣
等看得吏部左侍郎兼翰林院侍讀學士余有丁詹
事府詹事兼翰林院侍讀學士許國文學素優年力
方富屬以此事似可責成如蒙 聖明俯允將余有
丁暫解部事以本官仍管詹事府事許國協管府事

俱充副總裁各暫停常轉令其專在史館遵照 勅諭事理將會典新舊原本細加考究另具草稿迭臣等刪潤其原題副總裁官惟於部務有暇相與討論不必限以章程致令兩誤庶幾事有專責而汗青可期也

奉

聖旨是吏部知道

請處治邪佞內臣疏

該文書官立得用口詞 聖諭孫海客用凡事引誘無所不爲着降作小人者發去 孝陵種菜爾等司

禮監并管事牌子既受朝廷爵祿我一時昏迷以致有錯爾等就該力諫方可爾等圖我一時歡喜不言我今奉 聖母聖諭教誨我我今改過奸邪已去今後但有奸邪的小人爾等司禮監并管事牌子一同舉名來奏該衙門知道欽此傳示到閣除欽奉 宣諭臣等另行具題外臣等看得孫海客用奸邪不忠引誘蠱惑以致虧損 聖德舉動差錯上違 聖母慈誨下失臣民仰望之心論 祖宗法度宜正典刑罪在不赦 皇上心雖惱恨猶不忍加刑薄從降斥燭奸之明等於日月 宥罪之仁同於天地矣但臣

等查得舊例 孝陵種菜皆軍人爲之二犯旣發令
着役不宜止降火者須充做淨軍乃爲正法臣等謹
擬票上請 聖裁施行

奉

聖旨乾清宮管事牌子太監孫海客用凡事引誘無
所不爲降黜未盡其辜着充淨軍發去南京 孝陵
種菜該衙門知道

請清汰近習疏

伏蒙 聖諭昨朕有御筆帖子先生看來未曾孫海
客用朕越思越惱這厮亂國壞法朕今又降做小火

者發去南京 孝陵種菜先生等旣爲輔臣輔弼朕
躬 宗廟 社稷所係非輕焉忍坐視不言先生等
旣知此事就該諫朕教朕爲堯舜之君先生等也爲
堯舜之臣朕今奉 聖母聖諭教誨朕悔過迸去奸
邪先生等各要盡心輔朕欽此該文書官丘得用恭
捧到閣臣等恭誦 綸音不勝欽仰不勝惶愧仰惟
皇上天挺聖資 幼而聰穎自 臨御以來 講學
勤政 聖德日新臣等每自慶幸以爲親逢 堯舜
之主庶幾復見唐虞之治矣乃數月之間仰窺 聖
意所向稍不如前微聞 宮中起居頗失常度臣等

心切憂惶但身隔外庭不知內事卽有所聞未敢輕信而朝廷庶政未見有闕故不敢妄有所言然前者恭侍日講亦曾舉孔子益者三樂損者三樂并益者三友損者三友兩章書請皇上加意省覽蓋亦陰寓諷諫之意又數日前曾問文書官云近臣聞皇上夜間遊行左右近習皆持短棍兵器此何爲者乃文書官回說並無此事臣等亦遂以所聞爲妄不敢復言連日因覩御筆帖子處治孫海客用兩人因而詢訪始知此兩人者每日引誘皇上變間遊宴別宮釋去法服身着窄袖小衣長街走馬挾持刀

仗又數進奇巧戲玩之物以蠱惑上心希圖寵幸臣等連日寢食不寧神爽飛越可惜天生聖王被這幾個奸佞小人引誘蠱惑一至於此擬俟日講時面奏諫勸以盡愚忠乃蒙聖母諄諄教戒皇上幡然改悔迭去奸邪引咎自責又宣諭臣等盡心輔導此蓋九廟列聖之靈默啓我聖母之心形之譴責陰佑我皇上之心自悔前非也夫人孰無過惟過而能改則復於無過自茲以往皇上依然爲堯舜之主臣等亦庶幾可勉爲堯舜之臣矣宗社生靈曷勝慶幸但古語云樹德務滋除惡務盡

臣等竊聞近日引誘之人在孫海客用固為尤甚而其中諂佞希寵放肆無忌者尚不止此二人如司禮監太監孫德秀溫泰兵仗局掌印周海者皆不良之人其罪亦不在孫海客用之下今 皇上既將此二人寘之於法以示悔過自新之意則孫德秀等亦不宜姑容在內以為 聖德之累伏望 皇上大奮乾斷將孫德秀等一體降黜以彰日日月月之明其司禮監管事牌子等官平日為忠為佞諒莫逃於 聖鑒合無俱令自陳請自 聖斷老成廉謹者照舊管事諂佞放肆者悉加汰黜且近日 皇穹垂象慧世婦

官者之星亦宜大行掃除以應天變以光盛德此

皇上修德改過之實政也臣等又聞漢臣諸葛亮云

宮中府中俱為一體陟黜臧否不宜異同臣等待罪

輔弼 宮中之事皆宜由 聖躬比之二臣責任尤重今乃徒避內

遺命輔保 聖躬比之二臣責任尤重今乃徒避內

外之嫌不行直言匡救以致 皇上有此過舉孤負

先帝付託之言萬死不足以自贖除痛自省勵以圖

報稱外既蒙 皇上明發德音昭示聖意臣等此後

亦不敢復以外臣自限凡 皇上起居及 宮壺內

事但有所聞即竭忠敷奏及左右近習有邪佞不忠

如孫海客用等者亦不避嫌怨必舉 祖宗之法奏請處治仍望 俯允施行 皇上亦宜仰遵 聖母慈訓痛自改悔戒遊宴以重 起居專精神以廣胤嗣節 賞賚以省浮費卻珍玩以端好尚 親萬幾以明庶政 勤講學以資治理庶今日之悔過不爲虛言將來之 聖德愈爲光顯及臣等無任瀝血哀懇之至伏惟 聖慈鑒宥

奉

御批覽卿所奏具見忠愛依擬行 又奉

聖旨司禮監太監孫德秀溫泰兵仗局掌印周海都降二級着外私家間任永不叙用其司禮監及帶事牌子等都着自陳該衙門知道

請敷陳 謨烈以裨

聖學疏

先該臣等 面奏 皇上春秋鼎盛宜 省覽章奏講究治理于字書小學不必求工以後 日講請暫免 進字容臣等將諸司題奏緊要事情至 御前講解 面請裁決伏奉 俞旨臣等欽遵舉行外但數月以來應奏事件與 日講之期多不相值或係常行細務又不敢煩瀆 聖聰卽恭侍 講讀須臾

而畢拱默而退不得供奉 燕閒從容陳說雖欲竭

悃欵之愚效獻替之益其道無絲非臣等 面請奏

事之物意也頃奉 聖諭責臣等以盡心輔導臣等

夙夜思惟圖所以仰承 德意答沃 聖心者竊以

爲遠稽古訓不若近事之可徵上嘉先王不如家法

之易守昔伊尹周公矢誤作誥撮其大指不過兩言

曰明言烈祖之成德曰甄揚文武之光烈而以唐憲

宗讀貞觀政要竦慕不能釋卷宋仁宗命侍臣讀三

朝寶訓及祖宗聖政錄別史書之皆爲盛事良以美

謦如見自不忘繼志之心耳目旣真又足爲持循之

地守成業而致盛治莫要于此仰惟我 二祖開創

洪業 列聖纂紹丕圖 奎章睿謨則載之 寶訓

神功駿烈則紀之 實錄其意義精深規模弘遠樞

機周慎品式詳明足以邁三五之登閔垂萬億之統

緒此正近事之可徵 家法之易守者也夫 皇上

所踐者 祖宗之寶位所臨者 祖宗之臣民所撫

馭者 祖宗之輿圖所憑藉者 祖宗之威德則

今日之保泰持盈興化致理豈必他有所慕稱上古

久遠之事哉惟在 皇上監于 成憲能自得師而

已矣臣等謹屬儒臣將 累朝 寶訓 實錄副本

逐一檢閱分類編摩總計四十款曰創業艱難曰勵精圖治曰勤學曰敬天曰法祖曰保民曰謹祭祀曰崇孝敬曰端好尚曰慎起居曰戒遊佚曰正宮闈曰教儲貳曰睦宗藩曰親賢臣曰去奸邪曰納諫曰理財曰守法曰警戒曰務實曰正紀綱曰審官曰久任曰重守令曰馭近習曰待外戚曰重農曰興教化曰明賞罰曰信詔令曰謹名分曰却貢獻曰慎賞賚曰敦節儉曰慎刑獄曰褒功德曰屏異端曰飭武備曰御夷狄雖管窺蠡測之見未究高深而修德致治之方亦已略備矣但簡冊浩繁遽難卒業容臣等次第

纂輯陸續

進呈擬俟明歲開講以後每

晨講既

畢臣等恭詣

文華後殿講解

訓錄一二條粗述

大指如

皇上偶有疑難卽望

面賜諮詢或臣等

竊有見聞亦得隨事獻納其諸司章疏有緊要者卽於講後

面奏請

裁多寡有無不拘程限但使工

夫接續時日從容自可以開發

聰明亦因以練習

政事伏望

皇上留神聽覽龜勉力行視

訓錄之

在前如

祖宗之在上念念警惕事事率由且誦法

有常緝熙無間卽

燕息深宮之日猶

出御講幄

之時則

聖德愈進于高明

聖治益躋于光大而

臣等區區芹曝之忠亦庶幾少效萬分之一矣

奉

御批覽卿等所奏具見忠愛朕知道了

請停止工程疏

該文書官田義傳奉

聖諭欲修理武英殿欽此臣

等看得

祖宗宮殿如有損壞自合修理豈宜惜費

但查

本殿自宣德正統以後久不臨御迨世

宗皇帝踐祚之初卽將

文華殿鼎新修建易以黃

瓦元

齋居

經筵及

召見大臣等項俱

臨御

於此今

九五齋

恭默室皆

世宗皇帝親題其

額輪奐巍然堂構具在蓋以東方發生喜神所向故

齋居

聽政

講學

冠讀皆恒處于斯其取義深

矣今

武英殿乃

祖宗久不臨御之所卽加修理

聖駕未必常到而徒費十餘萬之貲經營於不常到

之地似爲無益且臣等亦曾至

本殿觀其藻飾顏

色雖稍有剝落而棟宇規制未常少損似亦無煩於

改作也臣等愚見伏望

皇上繹思

世宗皇帝臨

御東朝之意姑仍舊貫暫停工作以省勞費或待

皇儲誕降之後仍以

文華爲

東宮講讀之所却

請

聖駕臨幸

武英彼時鼎新修理未爲晚也臣

等淺陋無識仰蒙 俯諭不敢不盡其愚伏望
聖明曲垂鑒納臣等不勝懇切願忠之至

奉

聖旨覽卿等所奏朕知道了



國家圖書館, NATIONAL CENTRAL LIBRARY, TAIWAN, R.O.C.

新刻張太嶽先生文集卷四十五

請用翰林官更番侍直疏

臣等伏覩 皇上近日以來留神翰墨一切嬉遊無
益之事悉屏去不御仰惟 聖學該洽 睿志清明
臣等不勝慶忭夫人主一心乃萬化從出之原亦衆
欲交攻之會必使常有所繫弗納于邪然後縱逸之
念不萌而引誘之奸不入故雖筆札小技非君德治
道所關而燕閒游息之時藉以調適性情收斂心志
亦不悖于孔氏游藝博文之指比之珍奇玩好馳騁
放佚之娛則相去遠甚未必非 皇上進德養心之

一助也但臣等竊見前代好文之主皆有文學之臣
載筆操觚奉侍清燕如唐有天策瀛洲之選供奉待
詔之員宋有秘閣待制二館著作或承詔登答或應
制賚酬皆于語言文字之中微寓風勸箴規之益卽
今之翰林官是也 國朝建置翰林於一榜進士中
拔其英雋特異者除授此官固欲儲養德望以備啓
沃任樞機然文史詞翰撰述討論亦其本等職務
皇上卽有任使不必他求如 日講諸臣皆文學優
贍臣等慎選以充見今記注 起居日逐在館供事
外其餘見任翰林各官亦皆需次待用者臣等擬令

分番入直每日輪該四員與同

日講官在館祇候

皇上萬幾之暇如披閱古文欲有所采錄鑒賞名筆
欲有所題詠卽以屬之諸臣令其撰具草藁送臣等
看定然後繕寫進呈 聖覽或不時 召至 御前
而賜質問令其發摠蘊抱各見所長因以觀其才品
之高下他日量能擢才自可斷于 聖衷且諸臣因
此亦將自慶遭逢益圖稱塞爭相淬勵以求見知于
上其于 聖明辨材審官之道亦默寓於中矣臣等
不勝惓惓願忠之誠

奉

聖旨是該衙門知道

議外戚子弟恩蔭疏

昨該文書房官丘得用口傳 聖旨欲將 皇親來
年伯王偉弟男 加恩授職臣等謹欽遵擬 傳帖
將王偉弟王俊男王棟各與做錦衣衛正千戶帶俸
頃又該丘得用傳示 聖意說正德年間皇親夏助
等俱授錦衣衛指揮使等官世襲今何止授千戶又
無世襲字樣以臣等所擬爲薄臣等不勝惶悚仰惟
皇上篤眷 中宮 加恩外戚此乃情禮之至臣等
敢不仰承但查正德二年雖有此例至 世宗皇帝

登極之後悉已釐革凡 皇親授官無論大小皆不
得世襲故恭和伯陳萬言係 元配孝潔皇后之父
伊男陳紹祖原係監生出身亦止授尚寶司丞文官
未嘗世襲也又查得隆慶年間今 仁聖懿安皇太
后之父固安伯陳景行伊男陳昌言初亦止授錦衣
衛千戶至 皇上登極因恭上 兩宮尊號方 降
勅將陳景行長男陳昌言陞錦衣衛指揮僉事次男
陳嘉言授錦衣衛副千戶 慈聖宣文皇太后父李
偉封武清伯長男李文全授錦衣衛指揮僉事次男
李文貴授錦衣衛副千戶俱無世襲字樣臣等恭照

祖宗定制武職非有軍功不得世襲正德年間政體紊亂至世宗皇帝以聰明至聖入繼大統將以前敝政一切改正以復我祖宗之舊正今日所當遵守者當先帝龍飛之日與皇上嗣統之初加恩陳李二家例止於如此今皇上雖欲優厚外戚詎可踰於兩宮皇太后之家乎是臣等所擬乃三朝見行事例非敢擅為裁抑也今奉聖諭令臣等改擬臣等謹欽遵斟酌近例擬將王偉男王棟授錦衣衛指揮僉事弟王俊授錦衣衛正千戶比之兩宮皇太后之家實為相等至於世襲一節則祖

宗定制決不敢違越也臣等又惟皇上與中宮聖壽萬年將來皇儲兆慶繩繩振振推恩戚里固未可量似亦不在此一時也伏望聖明俯鑒臣等愚誠特賜俞允不勝幸甚

奉

聖旨皇親永年伯王偉男王棟與做錦衣衛指揮僉事弟王俊錦衣衛正千戶俱帶俸兵部知道

四月十八日

上御文華殿講讀有頃臣居正等入至後殿講訓錄畢以南科給事中傳作舟疏進覽臣因奏云今

江北淮鳳及江南蘇松等府連被灾傷民多乏食徐
伯之間至以樹皮充饑或相聚為盜大有可憂上
曰淮鳳頻年告灾何也臣對云此地從來多荒少熟即
如訓錄中所載元末之亂亦起于此今當大破常
格急發賑濟以安之臣等擬令戶部議處動支各該
州縣庫銀倉穀不足則南京見貯銀米儘有贏餘可
以協濟民惟邦本願特加聖心上曰依先生每
議處臣言皇上天性至仁愛民如子臣等每奏灾
傷皇上卽惻然明念允請蠲請賑未嘗不慨然
賜允而臣等愚陋亦仰體聖衷無日不以憂民為

心安民為事四乞奏乞蠲貸擬旨允行者無月無
之而在外諸司往往營私背公剝民間上非惟不
體皇上子惠困窮之德意且不知臣等所以仰贊
皇上之愚忠殊可恨也且人臣居官食祿者皆有代
為養民之責故虞舜咨十有二牧牧者養也今有司
坐視民瘼痛癢不相關如作舟疏云報灾則曰不敢
報此何不敢報之有又云請賑則曰不敢請此何不
敢請之有不過推調支吾歸怨君上何嘗有憂民
之心卽如積穀一事屢奉旨申飭竟成虛文彼皆
有自理贖未嘗佐公家之急則將焉往臣等不勝

引大岳文集卷四十五
憤懣竊以爲此輩若遇 聖祖不知當以何法 上
怒形於色曰有司爲民害者當着實重處臣對云今
反有犯者當如 聖諭臣復奏云近年以來正賦不
缺府庫充實皆以考成法行徵解如期之故今大江
南北荒歉如此河南又有風災畿輔之地雨澤愆期
二麥將槁將來議蠲議賑勢不容已賦稅所入必不
能如往年惟 皇上量入爲出加意樽節如 宮中
一切用度及服御之類可減者減之賞賚可裁者裁
之至如施捨一節尤當禁止與其惠緇黃之流以求
福利孰若寬恤百姓全活億兆之命其功德爲尤大
乎 上曰然今宮中用度皆從節省賞賜亦照常例
無所增加臣云 皇上所謂常例者亦近年相沿如
今年暫行明年卽擬爲例非 祖宗舊例也臣不暇
遠引如嘉靖中 世宗皇帝用度最爲浩繁然內庫
銀兩尚有餘積隆慶初年冬餘庫尚餘百餘萬今每
歲金花銀百二十萬每按季預進隨取隨用常稱缺
款有限之財安能當無窮之費乎臣等職在輔導爲
國家長久之慮不敢不盡言惟 皇上留神省察

患病謝

遣醫并乞假調理疏

臣自入夏以來因體弱過勞內傷氣血外冒盛暑以致積熱伏於腸胃流為下部熱症又多服涼藥反令脾胃受傷飲食減少四肢無力立秋以後轉更增劇自以身當重任一向勉強支持又恐驚動 聖心未敢具奏調理乃蒙 宸衷曲軫 特遣御醫診視傳奉 溫綸飲以良劑念臣狗馬微軀不自愛慎以上貽 君父之憂沐此 鴻恩捐糜難報但臣自察病原似非藥餌能療惟澄心息慮謝事靜攝庶或可痊仍乞 聖慈垂憫 特賜旬月假限再解 閣務俾得專意調理倘復 沈痾臣即勉赴供職不敢久曠臣

不勝感激懇祈之至

奉

聖旨覽卿謝朕知道了宜慎加調攝不妨兼理閣務痊可即出副朕眷懷該部知道

謝

賜粥米食品疏

昨蒙 聖恩以臣患病 遣醫診視該臣具奏陳謝

并請暫解閣務 賜假調理奉 聖旨覽卿奏謝朕

知道了宜慎加調攝不妨兼理閣務痊可即出副朕眷懷該部知道欽此今日又蒙 聖恩特遣文書官

太監孫斌到臣私寓臨視臣疾 頒賜鮮猪一口鮮

羊一腔甜醬瓜茄一罈白米二石酒十瓶臣謹力疾

扶掖叩頭祇領訖念臣柳質易摧駑才既竭邁此疾

疾益覺支離方瘳曠之是虞懼 謹訶之莫道乃荷

乾坤覆幬 父母愛憐 綸旨溫存遣上醫而視診

寵頒稠疊塵中使以光臨切感難名沉疴頓釋 九

恩未報敢退託以求安一息尚存矢捐糜而罔惜臣

誠不勝感激圖報之至

奉

聖旨覽卿奏謝朕知道

謝

聖諭存問并 賜銀兩等物疏

頃該臣以患病不能供職具奏請假調理仰戴 天

恩特賜允俞又 遣醫診視 頒賜粥米食品等物

臣方啣感遵奉間今日又蒙 聖諭張少師 朕數

日不見先生聞調理將痊可茲賜銀八十兩蟒衣一

襲用示眷念先生其欽承之月初新涼可進閣矣欽

此外又 頒賜甜食二盒點心二盒該司禮監太

監張鯨恭捧到臣私寓臣謹力疾扶掖叩頭祇領訖

仰惟 天光薦被 宸眷到隆非臣捐軀墮首所能

報答亦非救楮殫毫所能宣謝惟有鏤之肺腑傳之子孫期世爲犬馬圖效驅馳而已臣自奉俞音得從休沐屏居謝事息慮澄心數日以來始覺少減顧患所由來已久今祛之使去甚難茲蒙溫諭示以仲月之初遂爲趨朝之候帝星垂照人間災祟當不禳而自除天語定期涼入秋中必勿藥而有喜矣臣誠不勝感泣頂戴之至

聖旨覽卿奏謝朕知道了禮部知道

謝

遣中使趣召并賜銀八寶等物疏

臣以患病乞假調理屢蒙聖慈軫念賜資駢蕃

今日又蒙欽遣文書官太監丘得用到臣私寓口

傳天語視臣病痊之狀趣其進見之期又特

賜銀八寶四十兩甜食一盒乾點心一盒臣謹叩頭

祇領訖臣養病旅邸倏已再旬雖違遠天顏曠離

官守而犬馬依戀之心無時無刻不在皇上左右

數日以來始覺痊可再假五六日俟氣體漸復卽當

欽遵

聖諭趨赴

闕庭臣仰荷

殊錫頻繁

宸心注念雖父母之於愛子有不能得者臣誠不
感泣圖報之忱

奉

聖旨覽卿奏謝朕知道了禮部知道



國家圖書館, NATIONAL CENTRAL LIBRARY, TAIWAN, R.O.C.

新刻張太嶽先生文集卷四十六

考滿謝

手勅 賜賚疏

臣以一品歷俸十二年考滿欽承

聖恩着臣復職

隨遣司禮監太監張誠恭捧

手勅賜臣銀二百

兩坐蟒蟒衣各一襲歲加祿米二百石欽此又蒙

遣文書官吳忠

頒例賞銀一百兩紵絲四表裡內

大紅坐蟒一表裡蟒衣一表裡原封鈔一萬貫茶飯

卓五卓羊十隻酒五十瓶各賚奉到臣私第臣謹望

闕叩頭祇領訖伏念臣猥以凡庸濫司鼎軸夙荷

先皇之末命遂蒙 聖主之深知矢竭愚忠用圖稱
塞顧涓流徒煩於注海而寸石何望於補 天雖夜
寐而夙興自謂心力之已罄苟日省而月試終爲廩
餼之虛糜碌碌瘵官又踰一紀兢兢在事尚抱百憂
吏職有一之未修皆臣表率之無狀民生有一之弗
遂皆臣調燮之多乖屬茲考課之辰宜正黜幽之典
詎意獲從 寬政因而復冒 殊恩謂臣備職有年
寵褒匡弼察臣秉心不二謬許精忠 雲漢章天枉
貴臣而宣播篚筐載道拜 珍貺之駢蕃撫歲月以
懷慙戴 榮光而增懼敢不堅持晚節益勵初忱苟
利 國家何髮膚之足惜載銘肺腑終啣結以爲期
奉

聖旨覽卿奏謝朕知道了禮部知道

考滿謝

恩命疏

臣以一品十二年考滿該吏禮二部欽奉 聖諭議

擬 恩例奉 聖旨卿等說的是元輔受 先帝遺命

輔朕十年精忠大功冠於先後茲實歷一品已及十
五年恩數委當優異着支伯爵祿加上柱國太傅兼
官照舊給與應得誥命還寫勅獎勵賜宴禮部廕一

子與做尚寶司司丞用見朕崇獎元勳至意欽此臣聞命自天措躬無地竊念臣學術迂踈行能謏劣夙荷先皇顧託之重誤蒙聖主倚任之專待罪首弼于茲十年荏苒歲時絲毫無補今計歷俸一品雖十有二年自知無績可書不敢妄干功令特以三考黜陟乃國家彝典若有幽當黜亦不得避故不得已循例給由以應明典伏荷聖慈優容准令復職尋親灑宸翰降勅褒嘉增祿賜金迥出常數篚筐牢醴絡繹道途臣頂戴鴻恩已不啻踰涯盜分矣乃又特勅吏禮二部將臣守制之年俱作實歷月日穹階勲祿一朝并加隆禮殊獎冠絕前代後臣捫心自愧何功何勞可以堪此夫人道所最忌者非望之福明主所深惜者無功之賞臣以駕下謬當艱鉅日夕兢兢救過之不給雖十年以來四海又安百蠻賓服皆皇上神威廣運聖化旁敷臣安敢貪天之工以爲己力而一旦獲此非望之福冒此無功之賞豈惟自速躋顛之咎抑恐有累日月之明此臣所以踳踳惶悚而不能已於辭也除誥命藉榮先世勅獎風勵臣工謹已祗領其餘非分所安者萬不敢當伏望皇上俯鑒下誠收回成命

俾仍舊次圖報將來庶臣獲少安於陋庸亦幸免於顛越矣

奉

聖旨朕冲齡績服賴卿宏才亮節竭誠匡輔十年之間政理修明蠻夷率服勳績顯著簡在朕心茲九年滿後又經六載方一舉疇庸之典豈得仍執謙遜宜勉遵成命副朕眷懷無復固辭吏部知道

再辭

恩命疏

頃蒙 皇上以臣一品十二年考滿 特加異恩該

臣具疏辭免奉 聖旨朕冲齡績服賴卿宏才亮節竭誠匡輔十年之間政理修明蠻夷率服勳績顯著簡在朕心茲九年滿後又經六載方一舉疇庸之典豈得仍執謙遜宜勉遵成命副朕眷懷無復固辭吏部知道欽此臣恭誦 宸綸愈增惶悚臣聞古卓犖竒偉之士抱經綸匡濟之才者恒以不逢明主無所建立為恨伊尹曰吾豈若使是君為堯舜之君哉吾豈若於吾身親見之哉君不堯舜其心愧耻若撻於市盖感遇合之難也臣閭巷韋布之士耳非有碩德鴻才可以庶幾古人之萬一幸逢 英主在上臣得

以謏劣佐下風效啓沃十年之間志同道合合言聽計
從 主德昭宣 聖化旁洽伊尹之所願見者臣親
見之其所愧耻者臣幸無之卽千萬世而下頌我
皇上聖德神功爲堯舜之主臣亦得以竊附於堯舜
之佐矣此之榮遇雖萬鍾之享百朋之錫豈足以擬
之哉故臣向者每被 恩命輒控辭而不已者良以
所慶幸者大而爵祿非其所計也乃若 詔祿詔爵
雖 朝廷馭臣之典亦宜稍加節制而不至橫溢乃
足爲勸三公穹階五等厚祿上柱崇勲在 先朝名
德咸不敢當乃一朝悉舉而畀之於臣近謂益恩監
賞也至於符卽世賞部宴大烹臣前九年考滿皆已
冒叨茲又豈可重領反覆思惟如墜淵谷故不避煩
瀆再控於 君父之前伏望 聖慈諒臣之衷素無
矯飾矜其愚而俞允焉碎首隕軀不敢忘報

奉

聖旨卿以古人自期致君安國不計爵祿朕所深信
然豐功偉績 社稷利賴朝廷自當有崇報之典卿
乃固執謙遜控辭益切朕心殊有未安重違卿意特
准辭免伯祿上柱國部宴用成卿勞謙之美其餘悉
宜勉承乃見我君臣相體篤誼慎勿又辭吏部知道

奉

諭整肅朝儀疏

伏奉 聖諭朕近來每視朝見百官穿襍色衣服繫
襍色帶都不按品級又行禮之際咳嗽吐痰孰爲敬
也孰爲不敬與先生等說傳與鴻臚寺傳示百官今
後再有這等的着該科并鴻臚寺指名叅奏欽此臣
等當卽傳示該寺訖看得禮莫大於君臣之交分莫
嚴於上下之辨况 朝參之際 天顏咫尺尤臣子
所當致敬而不可忽者孔子曰事君盡禮人以為諂
也論語鄉黨一篇記孔子見君之時自入門以至於
升堂敬謹之心不敢以一時少懈人見其鞠躬踧踖
屏氣歛容議其爲諂而不知事君之禮當如是也近
日以來 朝參之禮委覺少懈百官衣帶多有僭越
入班之時吐唾在地進行走舒徐搖擺謝 恩見
辭致詞不恪禮官不行申明御史不行糾奏臣等亦
屢加戒諭而人情玩狎積習難改安知背非後議不
有以臣等爲諂者乎今蒙 天語申嚴衆心始知所
儆後有犯者着鴻臚寺及侍班御史指名叅奏必罪
不宥庶 朝廷之禮尊而上下之分明也

請蠲積逋以安民生疏

竊聞致理之要惟在於安民安民之道在察其疾苦而已邇年以來仰荷 聖慈軫念元元加意周卹查驛傳減徭編省冗負懲貪墨頃又 特下明詔清查田糧查革冒免海內訢訢如獲更生矣然尚有一事爲民病者帶徵錢糧是也所謂帶徵者將累年拖欠搭配分數與同見年錢糧一併催徵也夫百姓財力有限卽年歲豐收一年之所入僅足以供當年之數不幸遇荒歉之歲父母凍餓妻子流離見年錢糧尚不能辦豈復有餘力完累歲之積逋哉有司規避罪責往往將見年所徵那作帶徵之數名爲完舊欠實

則減新收也今歲之所減卽爲明年之拖欠見在之所欠又是將來之帶徵如此連年誅求無已杼軸空而民不堪命矣况頭緒繁多年分混糶徵票四出呼役沓至愚民竭脂膏以供輸未知結新舊之課里胥指交納以欺瞞適足增谿壑之欲甚至不才官吏因而獵取侵漁者亦往往有之夫與其敲朴窮民賸其膏血以實奸貪之囊橐孰若施曠蕩之恩蠲與小民而使其皆戴上之仁哉昨查戶部自隆慶元年起至萬曆七年止各省直未完帶徵錢糧一百餘萬兵工二部馬價料價等項不與焉而蘇松兩府拖欠至七

十餘萬蓋以彼處稅糧原重故逋負獨多其間固有豪右奸猾恃頑不納者然窮民小戶力不能辦者亦有之而有司之令但能行於小民不能行於豪右故催科之苦小民獨當之昨該應天巡撫孫光祜具奏請蠲戶部以干係 國計未敢擅便議覆臣等竊謂布德施惠當出自 朝廷若令地方官請而得之則恩歸於下怨歸於上矣臣等愚見合無 特諭戶部會同兵工二部查萬曆七年以前節年逋負幾何除金花銀兩係供 上用例不議免外其餘悉行蠲免正將見年正供之數責令盡數完納有仍前拖欠者

將管糧官負比舊例倍加降罰夫以當年之所入完當年之所供在百姓易於辦納在有司易於催徵闔閭免誅求之煩貪吏省侵漁之弊是官民兩利也况今考成法行公私積貯頗有贏餘即蠲此積逋於國賦初無所損而令 膏澤洽乎黎庶頌聲溢於寰宇民心固結邦本輯寧久安長治之道計無便於此者伏乞 聖裁施行

奉

聖諭朕聞各處帶徵未完錢糧苦累小民者戶部查節年所欠幾何即今應否悉行蠲免止將見年正供

之數勒限完納還會同兵工二部一併議處來說

進大閱圖頌卷疏

茲者恭遇 皇上修舉曠儀 躬行大閱益弘 祖烈丕振 皇威誠修內攘外之鴻猷致治保邦之長策也臣濫叨首輔獲奉 屬車快覩之餘不勝慶忭謹撰頌詞一首詩歌一章并繪圖進 獻雖思淺詞蕪未足鋪張 盛美然述真紀實庶以傳示將來伏乞 聖慈俯垂睿覽臣無任鼓舞欣躍之至謹具大閱圖詠一卷隨本恭進以聞

給假治疾疏

臣自去秋患下部熱病仰荷 聖慈垂憫賜假調理雖標疽少減而病根未除纏綿至今醫藥罔効近訪得一醫人自家鄉來自言能療此疾屢經試驗其術頗精但須靜養半月二十日乃得除根臣伏自念年迫衰遲久嬰疾患比者恭侍 講讀 皇上見臣肌體羸瘦詢問左右察臣所苦是犬馬賤軀蓋未嘗不仰塵 聖念也今幸得此醫人專意治療竊冀痊復有日足以仰慰 君父綬念之懷故敢不避煩瀆仰祈 聖慈俯賜寬假二旬一月暫免 朝參侍 講

至於閣中事務票擬題奏等項容臣於私寓辦理免其出入趨走之勞庶幾醫藥靜專奏効可覩痊可之日卽趨赴闕庭供事不敢久曠也臣誠怙恃恩眷仰瀆宸嚴不勝惶悚戰慄之至

請乞優禮者碩以光

聖治疏

臣等伏覩先年恩詔一欵大臣二品以上致仕在家年及八十者有司存問九十以上者遣官存問此舊例也至于輔弼重臣齒德俱尊勞績茂著者又與他官不同如嘉靖年間致仕大學士謝遷王鏊皆七十

十以上毛紀賈詠皆八十俱蒙特恩遣官存問是

先朝優崇輔弼尊禮者舊亦有不拘常例者臣等看得原任少師大學士徐階當世宗時承嚴氏亂政

之後能矯枉以正澄濁爲清懲貪墨以安民生定經制以核邊費扶植公論獎引才賢一時朝政修明官

常振肅海宇稱爲治平皆其力也是時先帝潛居藩邸世廟一日忽有疑於先帝命檢成祖之

於仁宗故事階爲之從容譬解其疑乃釋此一事則惟臣居正一人知之諸臣皆不得聞也及先帝

嗣登大寶階時爲翼戴首臣皇上正位東宮又嘗

預冊立大議先後勞績皆不可泯今致仕家居年已八十其年壽與毛紀等相同而位望勲庸抑又過之所有存問一節似應特從優厚以彰盛典如蒙皇上俯念階爲先朝元輔當代舊人特勅該部查照嘉靖年間事例差行人一員賚勅前前去存問仍量加賞賚用示優崇一以昭皇上尊禮老成褒叙忠賢之美一以見嚴居之下有天壽平格之臣皆太平之盛事也

奉

聖旨卿等說的是徐階輔佐皇祖翼戴先帝

勤端亮茂著勲勞今年及八旬足稱榮壽准卿等奏寫勅差官存問仍賜銀五十兩大紅紵絲蟒衣一襲綵段四表裏以示朕優禮耆碩之意禮部知道欽此皇帝勅諭致仕少師兼太子太師吏部尚書建極殿大學士徐階朕聞古者公孤在朝則坐而論道更老在學則憲而乞言惟尊賢尚齒之儀實褒德勸功之典矐言耆碩著有勳庸世咸仰爲達尊朕豈靳于殊數卿才優王佐學擅儒宗早馳譽于清華歷試功于盤錯簡知皇祖晉陟台司履忠順以事一人持廉靖而先百辟當險壬之旣黜更治化以維新懲貪

墨而仕路蕭清獎忠直而真才彙進申明典制多安
邊裕國之籌默運樞機有尊主庇民之略定邦本于
危疑之際宣上德于彌留之中翼我先皇嗣基圖
而撫方夏保予冲予升儲貳以奉宗祧方倚重于黃
扉遂乞閑于綠野後先多績朝廷資其典刑終始完
名寰寓想其風采自天純佑俾爾壽康屆年八旬欽
時五福匪直先民之楷式實惟盛世之禎祥朕祇適
先猷追惟舊德粵稽功載申錫寵章茲特遣行人塗
時相賚勅存問仍賜銀五十兩大紅紵絲蟒衣一襲
彩幣四表裏以示朕眷於戲衛武雖在耄年歲微不
忘于國晉公已解機務安危猶係其身惟我冢臣不
殊前哲其茂綏蕃祉慎保修齡尚謀黃髮之詢用慰
蒼生之望欽哉

給假謝

恩疏

臣以患病給假調治今日伏蒙 天恩賜銀一百兩
蟒衣一襲甜食二盒乾點心二盒燒割一分 特遣
司禮監太監張鯨臨寓 賜問臣方用藥敷搽患處
不能行動謹伏枕叩頭令男臣翰林院編修張嗣修
修撰張懋修錦衣衛指揮僉事張簡修望闕叩頭代

領訖臣久嬰疾病仰荷 聖慈賜假治療數日以來
試用醫人委覺有效從此專意靜攝庶幾痊可有期
但以狗馬微軀屢動 聖懷注念 慰問繾綣錫予
駢蕃感極涕零不知所報

恭謝

賜問疏

今日伏蒙 聖恩特遣文書官吳忠 頒賜銀八寶
四十兩銀葉二十兩甜食二盒乾點心二盒燒割一
分臨臣私寓俯賜存問臣以病尚不能起謹伏枕望
闕叩頭祇領訖緣臣宿患雖除而血氣大損數日以
來脾胃虛弱不思飲食四肢無力寸步難移須再假
二十餘日息靜休攝庶可望痊蓋文書官所親見非
敢託故也

乞骸歸里疏

臣自患病以來靜攝調治日望平復乃今三月元氣
愈覺虛弱臥起皆賴人扶肌體羸疲僅存皮骨傍人
見之亦皆爲臣悲悼及今若不早求休退必然不得
生還且古有災異則策免三公今廷臣之中無居三
公之位者獨臣叨竊此官頃者蒼筤出於西方日食
午陽之旦 思厥咎惟在於臣正宜罷免以應天變

引一ノ上ノ身ノ卷四十一ノ十三
伏望 慈聖垂憫諒臣素無矯飾知臣情非獲已早
賜骸骨生還鄉里倘不卽填溝壑猶可效用於將來
臣不勝哀鳴懇切戰慄隕越之至

奉

聖旨朕久不見卿朝夕殊念方計日待出如何遽有
此奏朕覽之惕然不寧仍准給假調理卿宜安心靜
攝痊可卽出輔理用慰朕懷吏部知道

恭謝

手勅疏

今日伏蒙

聖恩特降手勅

諭太師張太嶽朕自

冲齡登極賴先生啓沃佐理心無所不盡迄今十載
四海昇平朕垂拱受成先生真足以光 先帝顧命
朕方切倚賴先生乃屢以疾辭忍離朕耶朕知先生
竭力國事致此勞瘁然不妨在京調理閣務且總大
綱着次輔等辨理先生專養精神省思慮自然康復
庶慰朕朝夕惓惓之意 欽賜元輔銀八寶四十四兩
甜食二盒乾點心二盒燒割一分該司禮監太監魏
朝賞捧到臣私寓臣謹伏枕叩頭祇領訖臣病困之
餘不能措辭感謝之悰言不能悉

再懇生還疏

昨該臣具疏乞休奉 聖旨朕久不見卿朝夕殊念方計日待出如何遽有此奏朕覽之惕然不寧准仍給假調理卿宜安心靜攝痊可卽出輔理用慰朕懷吏部知道欽此縷縷之衷未回 天聽憂愁抑鬱病勢轉增竊謂人之欲有爲於世全賴精神鼓舞今日精力已竭強留於此不過行尸走肉耳將焉用之有如一旦溘先朝露將使臣有客死之痛而 皇上亦虧保終之仁此臣之所以跼蹐哀鳴而不能已於言也伏望 皇上憐臣十年拮据盡瘁之苦 早賜骸骨生還鄉里如不卽死將來效用尚有日也

奉

聖旨卿受

皇考顧命夙夜勤勞躬成治理朕方虛已仰承眷倚甚切卿何忍遽欲捨朕而去又有此奏覽之動心宜遵前旨專心靜攝以俟痊日輔理慎勿再有所陳吏部知道

太師張文忠公行實卷四十七

先太師諱居正字叔大別號太嶽其先廬州合肥人也始祖福以壯士從高皇帝起濠渡江克采石從大將軍定吳越闡廣累功授歸州長寧所世襲千戶其後四世孫自秭歸徙家江陵遂爲江陵人高祖旺曾祖懷葛公誠祖東湖公鎮皆負隱德不仕至考觀瀾公文明而經明行修爲時望所屬然數竒數上有司不第遂棄去語在太保桂林呂公今少傳蒲坂張公大司空承天曾公所爲碑碣若狀中由懷葛公而下俱贈如太師官曾祖妣聶祖妣李俱贈一品夫人



母趙封一品夫人。始趙夫人嘗夜見室中有火光。光上照天。頃之一青衣童子約五六歲。冉冉自天而下。遶床左右。遂娠有身。凡在身十有二月。以嘉靖四年乙酉五月二日生太師。生之夕。曾大父東湖公夢有大水驟至。流溢庭下。大父大驚。問奴屬所從來。奴屬口對狀言。水自張少保純地中流出者。是夜會懷葛公亦夢有月墮水甕中。流光發色。化爲白龜浮水上。曳有頃。太師生。因名太師白圭。應月精之瑞。嘉靖五年丙戌。先生二歲能言。有殊異狀。卽見者亡不人人色動。一日從世父龍湫公讀孟子。龍湫公戲謂太師

曰。兒母自負。兒能識。余所指。王曰二字。則誠竒耳。他日龍湫公方坐讀書。而會乳媪抱太師至。龍湫公抱至膝上。戲以前所指。王曰字。驗問太師。太師識如前。若素所誦習。國中以此皆稱太師神童。而長老先生有識者。皆以公輔期太師矣。五歲始授句讀。輒授輒記。十歲通六經大義。以能屬書。攤辭聞郡中。嘉靖十五年丙申。就試有司。時大司徒李公士翱爲郡太守。先一夕夢上帝剖符封識玉璽。令授一童子。明日進所取士庭下。太師名在第一。李公揖太師升階。目攝童子何如人。果夢中所見者。乃大喜。更太師初名。

曰白圭不足名子。子他日當爲。帝者師。余得聞命。天皇上帝矣。願自愛。會督學使者田公頊行部至郡。李公具言郡中有童子能文大音。田公立召之。至試南郡竒童賦。拔筆立就。無所點竄。田公目視李公曰。太守試以爲孺子何如。賈生。李公再拜賀曰。賈生殆不及也。田公謝曰。雖頊亦以爲不及也。遂補太師博士弟子高等。適募得唐北海太守李邕南嶽碑。田公讀未竟。讀卽以與太師曰。子之才。他日無論北海矣。明年就省試。時大司寇顧公璘開府楚中。顧公者故海內所稱矯然名世臣也。一見知太師王佐才語直。

指使者馮公曰。張孺子天授卽令蚤在。朝廷宜亦無不可。然余以爲莫若老其才。他日所就當益不可知耳。此使君事也。使君其啻之。於是太師棘中所射筈業。爲觀察使陳君東所稱。陳君以爲請。而馮公竟用顧公言。置勿第。至庚子乃第。會顧公以大司空有事于。獻皇帝陵園。太師過謁顧公。顧公曰。張生幸過我。大器晚成。此自中材。僕誠不當以中人薄視吾子。遲吾子三年作相。然僕親見解承旨竒才。高皇帝遣歸受學。德念甚厚。卽令謹待十年未晚。而承旨曾不少下。卒以此爲世所悲歎。我所爲語馮侍御者。

願吾子志伊學顏。毋徒以秀才獨喜自負也。久之別去。顧公親屬文贈之。又解所繫束帶爲賀曰。此非子所就。聊以明呂虔意耳。二十六年丁未。太師舉進士。選庶吉士。讀中秘書。二十八年己酉。授翰林院編修。時少師華亭徐公在政府。見太師沉毅淵重。所爲文雖旁列子史百家者言。而其學一本之躬行。根極理道。以此獨深相期許。曰。張君他日卽蓋臣重國矣。然大師體故孱弱。又倦遊。三十三年甲寅。遂上疏請告。旣得。請歸。則卜築小湖山中。課家僮。錘土編茅。築一室。僅三五椽。種竹半畝。養一癯鶴。終日閉關不

啓。人無所得望見。唯令童子數人。事洒掃。煮茶洗盥。有時讀書。或棲神胎息。內視返觀。久之旣。神氣日益壯。遂下帷。益博極載籍。貫穿百氏。究心當世之務。蓋徒以爲儒者當如是。其心固謂與泉石益宜。儵然無當世意矣。大父見太師居山中。且三年。而堅卧不起。常邑邑不樂。前問大人所爲。焦勞狀云。何。大父輒起行。若不顧。而又時時以其意語所親者。以此恐傷大父心。遂出。二十九年庚申。以右春坊右中允管國子監司業事。太師至。則勸學興禮。建首善爲天下先。諸生弟子卽有秀才異等。咸爲選首。天下士願得若丘

文莊在成均十年令學士靡然向風而會 世宗

皇帝 詔文學侍從纂述 興都肇基事爲 承天

大誌再閱歲猶弗就四十一年壬戌少師徐公上言

太師有良史材遂用中允充副總裁領其事蓋異數

也既受 命甫八閱月而手自脫藁爲十二紀以獻

書既上 世宗心知太師他日能以經術輔朕 皇

太子興理太平之業遂令以右春坊右諭德侍 皇

考講讀太師儀容峻整每進講必引經執義廣譬曲

論詞極剴切以故 皇考往往目屬太師加禮焉四

十五年丙寅進翰林院侍讀學士掌院事隆慶元年

丁卯 皇考錄用舊學進太師禮部右侍郎兼翰林

院學士未幾進吏部左侍郎兼東閣大學士叅贊機

務永樂大典成進禮部尚書兼武英殿大學士二年

戊辰加少保太子太保賜衣一襲時太師條上六事省

議論振紀綱重詔令覈名實固邦本飭武備皆 朝

廷大政又以嘉靖之季虜數犯塞請舉 祖宗大閱

禮以飭戎事而振士氣 皇考嘉納遂以明年秋九

月大閱于北郊是日 天子躬擐甲冑太師戎服扈

從選卒十二萬戈鋌連雲旌旗耀日 天子坐武帳

中觀諸將士爲偃月五花之陣已乃閱騎射簡車徒

禮畢三軍之士皆呼萬歲。驪聲如雷。都城遠近觀者如堵。軍容之盛近代罕有。四年庚午用考績。恩加太子太傅。吏部尚書。官一子中書舍人。先是元孽小王子裔孫阿着故崛疆。而俺荅者又最疆大。有控弦之衆十餘萬。馬四十萬。橐駝牛羊百萬。駐雲中上谷。伯兄吉囊蚤死。有男子四。有衆數萬。而俺荅弟昆都力哈部落亦復三萬。與吉能埒。肅皇帝時歲入邊。殺略人民畜產甚多。雲中遼東最甚。其後我叛人趙全與其黨李自馨。劉四趙龍等。亡抵俺荅。居板升。而最後中國無賴亡命。若趙宗山。穆教清之屬。又悉往從。

虜此屬。熟知險隘。阨塞爲虜鄉導。日夜教虜候利害。處以故。二十九年俺荅大舉逼京師。四十年犯薊。隆慶元年陷石州。當石州失守時。趙全謂俺荅曰。那顏春秋高矣。那顏莫若以此時。據有雲中上谷。東封居庸南塞。鴈門。獨以一面西制晉代。此五霸之伐也。謀未定。會俺荅奪其孫把漢那吉所聘婦。予襖兒都司那吉怒。以爲俺荅善淫。無卑尊禮。乃與其妻比吉。妳公阿力哥等十人。馬十三匹。息山西平虜城外。扣關而入。督府少司馬蒲阪王公。御史中丞嘉魚方公。上狀。朝議紛紛。皆以爲不宜納叛人。徒啓釁。或云殺之。

太師獨勸。上納。那吉降。授以官職。厚給賜。飲食衣服器具。置大同城中。俺荅聞。那吉亡。大驚。發萬人。臨平虜城來索。廷臣惟懼。咸謂宜與之。太師獨不諫。令諸將堅壁清野。勿與戰。故令那吉衣其所賜緋衣。金帶。誇示虜使。而使諜者以好語款虜曰。爾能縛我叛人趙全等。獻盟誓於天。約以數年一騎。毋穿我塞。乃得歸而孫耳。時有謂虜久不去。老師費財。欲乘老酋得孫急。而因與爲市者。王公以爲不可。太師報書王公曰。公言良是。和戎自有體。彼卽欲得孫。謂宜先縛致全等。境上盡屏往來游騎。請命幕府。我乃然後禮

那吉而歸之耳。乃今擁萬騎平虜城外。欲坐索而孫。何可謂誠款乎。設有吐蕃劫盟之事。謂朝廷何。夫全等至狡獪矣。彼豈能坐而待縛。若鷄犬乎。假令語泄。彼得以爲謀。或聊以脅從數人。欺誤朝廷。而我乃輕棄重質。非細故矣。此不可不慮也。且那吉歸而老酋幸奉約束。無他腸。吾卽假爵封王。通貢市。無不可矣。有如虜諸所言。特空給幕府。殊無意稱臣。又或多所請乞。明年又復寇邊。損國家威重。則雖得全等數十百輩。何爲乎。願公熟計之。於是王公遣鮑崇德一再詣虜營。曉以利害。俺荅仰天笑曰。吾何愛數

十人頭不以易吾孫乃夜襲板升得趙全等九人縛致境上。上用太師計厚禮那吉遣歸俺答感泣遂奉表請稱臣內屬通貢市。歲歲勿絕。時大司寇案全等反狀悉具。上令禮官爲文祠告郊廟。戮之東市。支解以徇。傳其首於邊。旣厭快衆憤矣。上嘉太師殊勲加少傅兼建極殿大學士官一子尚寶司丞而詔集朝臣詰闕下議封貢可否。一時衆議籍籍有謂便者有謂不便者。太師復以書抵王公曰。今之議者皆謂和戎示弱開市啓釁。此殆不然。僕獨以爲有五利焉。邊鄙不聳。稽人成功。一也。我得以其間修職守之具。蓄士卒。養馬。歲無援兵。可省行糧數十百萬。二也。俺答旣臣屬。土蠻吉能不敢輕動。三也。趙全等旣禽。卽板升十萬之衆。可馴而致也。四也。胡驕天亡其兆已見。老酋死其族必分。卽不死必有冒頓呼韓之變。我得乘其敗而坐困之。五也。王公得書嘆息曰。張公可謂知社稷大計矣。然論者發言盈庭。猶欲伺釁而動。太師不得已乃請文華殿舉成祖封和寧太平賢義三王故事。告上。上意遂決。許通貢市。隆慶五年辛未。俺答遣使奉表稱臣。貢名馬三十匹。上御建極殿受之。使太史奉金冊封俺答。

為順義王。其弟子若孫部落六十五人。各授官。賜金帛有差。俺荅大喜。告中國使者曰。全等雖誅。趙宗山猶在。此屬不滅。亡終敗和約。王公以聞。詔捕讞獄。如趙全等刑。已而套虜亦願修貢。天皇帝請得市易中國財物。如宣大例。上報可。賜吉能都督同知餘受秩者凡四十有九人。並賜衣帛。於是中國以段布皮物。市易虜馬。虜亦利漢財物。貿易不絕。東自四海。西盡甘州。延袤五千餘里。無烽火警。行人不持弓矢。近疆水陸屯田。悉墾。治如內地。墩臺哨望之卒。漸已撤去。所省餉。歲不下數十萬石。北地精銳。所易馬

至數十萬匹。蓋居庸以西。天子無所復事事。得以一意備東虜矣。是年春。當會試天下士。上命太師典試。太師崇雅黜浮。思得真才。以裨實用。故所舉士皆才行高秀。號稱得人。六年壬申。上念太師運籌制虜。茂著忠猷。加少師兼太子太師。予錦衣正千戶。令世其官。一日。先帝視朝。忽起走。語且囁。太師偕司禮監太監馮公扶持還宮。坐稍定。先帝召太師榻前。執太師手。屬託甚。甚至太師飲泣不能止。既出。遂觸地號天。幾不可生。今上既嗣。皇帝位。念山陵大事。詔太師卜視。大行皇帝陵寢。太師當煩暑。

以身暴烈日中。歷險乘危。上下山谷。與二三堪輿。選
矚玄註。得大峪嶺吉識者。以爲乾坤奠隅。風雨呵
靈。足綿皇家萬年無疆之緒矣。途歸觸暑。且病。將
請休沐。而上亟欲訪落。太師亟召見。平臺慰勞。
懇至。曰。先生爲父皇陵寢辛苦。受熱已追述。
先帝憑几未命。稱先生忠臣。太師感激悲咽。不能仰
視。倉皇數語。皆保王躬。補王缺要道。上悉嘉納。賜
大官酒饌。白金綵幣。先是。上在東宮。嘗晝寢。夢
一美髯大臣在側。若將有所陳見。上寤異之。以問
內侍。內侍對曰。殿下他日當有太平宰相。如其人。

乃見太師平臺。長身玉立。髭髯脩美。上記憶夢中
事。語內侍曰。此卽朕夢中所見者乎。因賜太師玉帶。
太師以爲上神靈明聖。必得虞九官十二牧。周四
友。多士在廷。乃可以稱任使。以故疏請。大誥文武
羣臣示。上意所嚮。又念國有大故。或啓戎心。
天子設銳意滅胡。念非以此時。令匈奴有所震疊。不
可故請。勅本兵令邊吏毋得解甲。謹備胡。是時薄
海內外知。上意指。旣瞿然改意。太師乃按劉文靖
故事。請御日講。三日一出視朝。毋得以寒暄小故
廢罷會。皇考將掩。玄宮。太師奉。上命奔詣。

昭陵恭題 穆宗莊皇帝神主。山陵禮成用翊贊
功。進左柱國兼中極殿大學士官一子尚寶司丞累
疏辭免。上不許。益降勅獎諭曰。卿受遺輔政。有安
定社稷之功。勲廕未足以酬。太師辭益力。上不
得已許之。已復親灑宸翰。賜大字凡五。曰。元輔曰良
臣。曰爾惟鹽梅。曰汝作舟楫。曰宅揆保衡。太師頓首
曰。上幸嚮意文字。卽操觚洙翰。非帝王要務。亦無
不究極精微。動以古人爲法。臣知所以事上矣。乃屬
講官略采古昔帝王善可爲法者八十一事。惡可爲
戒者三十六事。衍爲 帝鑑圖說以獻。上敬起受。

隆 溫旨獎勞。令宣付史館。昭示君臣交修之義。時
錦衣衛逮沐黔國朝弼至京師。廷鞫之。榜笞備至。太
師爲請寬其罪。得減死。安置于南京。萬曆元年癸酉
正月。時有大辟主傳上刑。其罪人業有所指。一時人
情洶洶。皆以爲禍。且不測。設非廉得其狀。從中持之。
且連染無辜數千百人。大獄矣。太師心知其事。大繆
不然。爲解說於 上。請以百口保其無他。上意始
解。竟以罪當其人。他無所波及。外庭未有知者。益彰
天王明聖矣。二月。嶺東平。嶺東有巢曰洋烏潭。馬公
等寨。其地在惠州叢山深箐。延袤八百餘里。一夫當

關萬夫莫開。故伍端黃世喬等得嘯聚其中。蚕食東路數十年。人望之如回紇。冒頓。殆天厚其毒耳。皇考時。監一清。賴元爵至。爲魁傑。而曾廷鳳。江漢王。栗葉。景清。馬祖昌。諸賊亦據有堅巢。爲寇暴所從來遠矣。太師乃計移督府。殷公言嶺東故多盜。往歲當事。雖舉兵首事。然徒嘗寇。略取所獲一二報。上虛往。虛返。卽名殺賊耳。僕以爲非大舉。將爲東南憂。且此屬皆閩越人。非若強胡。不可化誨。旣稱聽撫。而猶擁堅巢如故。此何爲者也。僕以爲自非望風解散。已列爲編氓者。不得言撫。公獨不見曾廷鳳之事乎。於

是殷公用太師言。大誓文武將吏。進搗其巢。俘斬藍一清等一萬二千二百八十有奇。諸走匿墮巖谷。焚溺死者不可悉數。上謂太師等贊謀廟堂。算無遺策。將首論太師功。太師謝不受。上以太師功在社稷。乃勞謙不有。足立臣極。特賜金綺酬之。七月上言。臣當先帝時。所上便宜六事。其一願。上幸綜覈名實。乃當事者。翫歲愒月。卒不能以實應。卽所敷奏。徒文具耳。請令自今天下吏民所上封事。有事下四方郡國者。請令諸曹皆置記籍。與爲約期。而月令科臣按之。設所在撫按奉行。詔書不以時奏報。或已

奏報而諸曹故慢令不與可否者臣等當條列其事請 詔下所司詰問責令對狀 上報可十一月以六年考績進中樞殿大學士不獲辭萬曆二年甲戌正月西南夷都蠻平都蠻古瀘戎也自漢遣唐蒙通巴徠開犍爲郡治道置吏其後諸葛武侯僅能討平之然亦弗靖至數千年而至 純皇帝時程尚書李襄城至煩十八萬之師費金錢鉅萬越四年僅克霸蓋九絲凌霄等寨皆天險故夔人屯聚其中人莫能摧其堅而彼得以時出沒爲寇鈔比年以來所殺掠我人民以萬數至陸梁矣方隆慶改元蜀當事者以

都蠻上變時趙文肅嘆曰都蠻不滅吾敘瀘赤子曰無噍類安得畀一巡撫往任之太師曰吾楚一士足辦此第名未著耳公問曰何太師以曾公對已乃卒請於 上 詔曾公往討之曾公故有偉略約滅此後朝食而太師又數移書曾公其大指謂宜徵兵積餉爲坐困之形而募死士從間道搗其虛先年破香爐取岷洮皆用此道耳蓋先是言官有以閩事論劉總戎顯者罪且不貸太師曰臨敵易將兵家所忌倘蜀事不效當并閩事逮治之於是言者意始解而顯以此懼且感竟奮不顧身受曾公方略以平蠻自效

凡越六月而凌霄都都九絲等寨悉平。所擒斬俘獲四千六百有奇。得酋王三十六人。掘地四百里。得武侯所遺銅鼓九十三而還。七月。皇考實錄成。詔太師兼俸尚書官。一子中書舍人。太師累辭謝不受。十一月初。東虜見俺答已得卦而獨已土蠻。速把亥請封不許。故驕踞耻言修貢事。隆慶五年四月。寇連山驛。五月寇盤山。六年二月。寇長勝堡。萬曆元年。犯鎮西堡邊外。秋七月。寇鐵嶺。冬十二月。寇鎮寧。太師患虜悖慢。令大築亭障。修烽火。前後所以授當事者。機宜甚備。而虜曾不悔禍。轉益鈔暴。然每入犯。輒大創而去。虜以此太恨。計邀建州屬夷。以二年冬十月。入犯清河。逆酋王杲。遂誘殺我裨將裴承祖等。時督府張公大將軍李公聞狀。用太師策。鼓行而前。乘勝直搗紅力寨。斬首虜一千一百有奇。馬牛羊無算。

上聞謂遼東大捷。皆太師等運籌功。乃手詔太師勅諭云。朕以幼冲嗣位。賴先生匡弼。四方治安。九邊寧靜。我祖宗列聖亦鑒知先生之功。就加顯爵。亦不爲過。乃屢辭恩命。惟一誠輔國。自古忠臣如先生者罕。朕今知先生實心不復強。特賜坐蟒衣一襲。銀五十兩。以示優眷。用成美德。其欽承之。十二月。太師

以 上方精核吏治。乃與太宰張公、大司馬譚公、約置爲御屏中。繪天下疆域。旁列上公而下郡太守。而上文武羣臣姓氏屏中。上之。上令設於 文華後殿省覽。萬曆三年乙亥二月。太師請修復 祖宗故事。令日講官記注。起居兼錄。詔諭制勅。凡郊祀 耕籍 幸學 大閱。皆令侍從。又選擇史官供奉文字已久者六人。日居館局中。編摩諸司章奏。其大臣使殿獨對。有密勿謀議。得聞史臣者。令入對。大臣紀述。送史局銓次。五月。請勅吏部。凡所在督學使者。非方正博聞之士。宜勿遣。督學使者所使。修起

教化。毋得日坐都城中。虛談賈譽。計日待轉。使人得干以私。宜以時徧歷所部郡邑。所至興廉舉孝。謹察學官博士弟子。每三年四方郡國既大舉士。卽令主爵御史大夫察舉其能否。御史中丞部使者。又非時得以論列其事。其能明布諭下。綱紀人倫。不涉流俗者。詔進其官。設有羣聚徒黨。虛論高議。若受事請謁。及以突梯脂韋事人。輒罪之。而請諸不稱者。罪博士弟子。務崇孝弟廉讓。敦本尚實。毋得勦襲異端。游大人成名。其有譏時好訐。不務成事。市語道謗。敢行稱亂者。令有司論如法。 上俱報可。萬曆四年丙子六

凡請重修大明會典備一代典刑五月太師以聖齡日長宜躬御萬機省覽章奏乃取中書所藏皇祖御書聖諭御製御批凡二百四十有二以進是時歲比不登又多水旱上詔書數下賜民田租乃郡國守相奉上詔書不勤督賦益急閭閻愁嘆盜賊多有太師乃與執政呂公張公上疏請詔有司加意牧養令主計議佐百姓民有窮餓或歲大侵若歲久賦重度終不能輸將者其悉除之又言太倉所儲足支八年獨大帑無羨金而民間復苦輸粟終歲勤動不得休暇蓋國與民皆受其病矣請令今歲賜民改折十分之三上以實帑藏下以寬恤民力此兩利之道計無便於此者上從之十月以一品九年考績加特進左柱國進太傅支伯爵俸賜璽書獎勞賜宴禮部官一子尚寶司丞已遣中貴賜太師手勅諭元輔先生親受先帝遺囑輔朕冲年今四海昇平四夷賓服實賴先生匡弼精忠大勲朕言不能述官不能酬惟我祖宗列聖必垂鑒知陰佑先生子孫世世與國咸休也茲九年考績于常典外賜銀二百兩坐蟒蟒衣各一襲歲加祿米一百石薄示褒眷先生其欽承之勿辭太師累疏辭謝上重違其

意 詔許辭太傅伯祿。其他宜悉勉承以見君臣相信之義。太師遂不敢辭。萬曆五年丁丑五月有詔修慈慶 慈寧宮。太師上言 兩宮規制甚備。又至壯麗。足以娛 太后萬壽。不宜時謫舉。羸令羣臣嘖有煩言。此徒以彰 朝廷過舉耳。上心知太師等忠言卽入言 聖母得罷之。六月嶺西羅旁平羅旁據東南山海間。東西二山相距。驚江急峽。飛巖斷壑。不知其幾百里。諸徭窟穴其中。自天地剖判以來。未有闖其藩者。國初鄧申國用創業兵。僅能定之。其後馬恭襄葉文莊韓襄毅雖彈壓其間。亦不能蕩平。張

璉吳平事無論已。至 世宗朝諸徭召陽春山民耕。而與浪賊黃德祥等四千餘人。雄據兩山。轉相寇掠。遂至今日不可復撲滅。蓋其處萬山蔽虧之中。嘗負固自喜。以爲天兵無足憂。非可單車片言指計而糜也。前督府殷公旣討平惠潮。上疏言賊當誅。一時議者謂粵軍旅數興。不無事矣。自古征蠻未有。大得意者。劉安諫伐閩。越書可念也。太師曰不然。會殷公入爲大司農。乃推轂少司馬凌公請賜 璽書屬凌去。審定計畫討賊。許留歲入帑金十一萬爲助。瀕行太師語凌公曰。雖鞭之長不及馬腹。卽今五指北三。

寨諸獍雖乘間竊發。然要當審所緩急耳。凌公既至。乃部署十道師。號三十萬。分道並進。一切方略悉如太師指。刊木夷山。摧破諸巖峒。五百六十有四。俘斬四萬二千有奇。拓地數百里。以其地置郡縣。事聞。上賜太師金錢。謂廣東大捷。實賴先生。每運籌云。是時臺官卜。上大婚期。得冬十有二月吉。太師度。上春秋未可。卽上書。聖母言。皇上爲天地神明主。發動興事。百神皆將受職。非陰陽小數所能括。且累朝列聖。無以十五齡納。后者。臣愚以爲明年便。聖母許之。八月。太師以所撰加恩張英國等

勅上進。上遣中謁者諭太師謂。皇祖四十五年。實錄字字句句。都是先生費心看改。幾次趣令擬勅。加異恩。太師上書。極言君臣分義。欲必得請。乃上爲感動。特允其請。令宣付史館。昭垂萬世云。九月。大父以疾卒於江陵。先是念大父趙夫人春秋高。私心願得。陛下賜臣一月之便。一日馳二百里。歸爲二人壽。又念。皇考顧托臣至重。非所宜言。故居平常。緬然長思。寢席多有涕泣處。上察太師貌日癯。顧問左右曰。張先生連日貌若有大憂。固憂勤。國家者。得亡有二人念乎。左右叩頭對曰。良然。於是

聖母 上出內帑綺幣金錢馳賜大父趙夫人而
手書諭太師其爲朕致先生父母大父驚蹠感泣再
拜曰臣文明死無以報願藉手臣子以報 陛下當
是時太師念 上恩禮隆異益不敢言省覲事然心
不能一日置也乃書移叔父居王居謙謀迎養大父
闕下大父不許輒報書太師疊疊數百言其詞嚴正
剴切大要謂肩鉅任者不可以圭撮計功受大恩者
不可以尋常論報老人幸未卽衰兒無多設不然之
慮爲老人過計徒令奉國不專耳然大父心知太師
內顧則故令家僮日昇一輿携一卮酒與二三老叟

游行山水間有時躡蹻登崇岡絕巘無異壯夫蓋大
父故健而又欲故爲趨捷以示無恙故往往有人自
江陵來輒言大父善飯不謂一日晨出登玉漿樓嘗
犯霜露寢疾十有一日遂卒大父計旣聞中使奉
聖母 上所賜內饌出問勞太師者歸言元輔毀甚
幾絕 上大震悼卽 手諭太師曰 天降先生非
尋常者比親承 先帝付託輔朕沖幼社稷奠安天
下太平莫大之忠自古罕有先生父靈必是權安今
宜以朕爲念勉抑哀情以成大孝朕幸甚天下幸甚
是時朝野相念者皆言太師親承 皇考顧託義不

得復顧其私恐。上遂納太師請，皆歛歎息而會計。聞之，夕卽彗出斗牛間，其尾指婺女，長數十丈。臺官微言，按天官書，斗丞相之位，彗出斗女牛，主大臣移徙，天子愁，兵起，天下受怨。於是上益惴惴。有詔，詔吏部諭上意，勉留太師。太師聞命，計未知所出，卽哀號上，疏言：臣幸未死報國之日長，且國家非有金革之事，而令臣墨經在闕廷，非盛世所當有。上泫然流涕，曰：卿篤孝至情，朕非不感動，但念朕當十齡，皇考見背，丁寧以朕囑卿，卿盡心輔導，今海內又安，蠻貊率服，朕垂拱仰成，頓刻離卿，不得

安能遠待二年，且卿身繫社稷安危，又豈金革之事可也。其他遵前旨，以副我皇考委託之重。太師聞詔，水漿不入口者三日，又叩心雪涕，上疏曰：先帝不知臣不肖，臨終屬臣以大事，臣何敢中道棄去。但念臣生離臣父，十有九年，卽死不及殯，攀號莫及，願賜死生惟陛下所用之。臣死且不朽矣。臣誠窮苦心，鬱結而難舒，惟陛下哀憐。上覽奏，焦然不寧，復手諭太師，卿言終是常理，今朕沖年，國家事重，豈常時可同。連日不面，朕心如有所失。七七之期，猶以爲

遠。卿平日所言。朕無一不從。今日此事。却望卿從。又諭執政曰。元輔必不可離。朕卽百跪不允。於是呂公張公以。上意聞太師。太師遂躡踊痛哭。號天曰。臣聞鹿死不擇音。臣誠不勝烏鳥私情。臣不知死所矣。遂上章極言曰。臣旣不孝。背棄死者。臣有老母。今年七十有二。人命危淺。朝不慮夕。設令知臣被留。恐不復相見。長思勞望。鬱悒難聊。有不可知者矣。陛下方以孝養。兩官。奈何不推心置腹中。顧念臣母乎。且臣上顧君父。下念父母。欲留不可。欲去未能。臣之進退。實爲狼狽矣。假設令臣終不得所請。負痛

在。則無論精神沮喪。不能復爲國家發慮。出謀。臣聞憂苦傷人。卽臣犬馬軀。有不可知者矣。陛下如今愛臣。何不生活臣。責他口後。效臣誠過激。願跽伏苦。由。候伺誅死。上曰。朕爲天下留卿。豈不軫卿迫切。至情。忍相違拒。乃再遣中使賜太師。手諭。朕以冲幼。賴先生爲師。况朕學尚未成。志尚未定。萬機尚未。諳理。若先生一旦遠去。則數年啓沃之功。盡棄之矣。先生何忍已。特差司禮監官同先生子前去造葬事。完。便接先生老母來京侍養。以慰先生孝思。務要勉。遵前旨。仰體。聖母。朕惓惓至意。母又有所陳。于時

太子太保新昌潘公等與吏科都給事中陳君三謨等山東道監察御史曾君士楚等南京戶科給事申王君蔚等先後交章懇留諸侯卿相大小百執事皆詣太師所備極寬譬責以君臣大義曰上固謂父喪當守君命尤重夫人臣既以髮膚屬上惟上所生死勢安得自便已乎且相君何能去卽章百上無當於事徒傷君父心在禮奔喪記奔喪之禮凡一而不得奔喪之禮凡四此言何謂也於是太師泣交揮謝言者曰臣父至陳賤今其卽世而聖母上賜臣賻千金他楮幣稱是旣詔儀部往諭祭尚書工部郎往營

葬事爲加祭五壇已又令宮禁貴臣經紀其喪卽令以臣母來蓋天恩加隆千載令臣益道盡途窮殆顛連無告矣夫上所以隆施臣父之謂何度臣父地下且以已所不能報塞責望臣臣何可旣負吾君重違臣父矧上大婚期且近而臣殊死求去非先帝意臣不若以此時墨線贖上機務侍講讀有如上察臣所爲哀痛狀上終當幸聽臣去耳不然臣請益力而上有如震怒卽嘉禮成而臣父春秋奄奄之事臣不敢以請矣於是上疏言狀且請後歸葬事上大慰悅許太師得謝常祿令大官日

給酒饌在廷諸臣月致芻米既逾月上遣中使召見平臺上悲感涕泣慰勞太師曰朕爲社稷屈留先生先生想父皇付託的意思成全終始纔是大忠大孝太師叩頭謝遂出視事萬曆六年戊寅正月禮官請舉大婚詔太師充納采問名使是月慈聖皇太后將還慈寧申諭太師朝夕納誨終先帝付託重義太師頓首上書聖母言臣在外延所不能及伏惟聖母調護聖躬開導聖學幸甚已又上書請上服膺慈訓上拱手謝曰當爲卿等戒之二月上方行嘉禮賴天地宗廟

會督府張公奏土蠻擁衆萬竄犯遼河劈山我兵出邊二百餘里斬首捕虜四百三十五級聖母大喜以爲此勉留張先生明效上恭述示太師賜以金幣蓋先是黃台吉握重兵養家奴寨強委禽王台王台涕泣以女女黃台吉子一時言者遂謂王台陰陽中國情僞不可知太師獨令邊將善遇王台萬曆二年王台卒將致王杲獻闕下大將軍斬馘虜千人故天威益震蕩平虜之役斬首虜二百虜日以益弱矣三月大婚禮成上既恭上兩宮聖母徽號將論太師元功太師以持服故謝不受卽再疏請乞

歸葬。上不得已。勅尚寶司卿鄭君欽錦衣衛指揮同知史君繼書奉太師歸襄大事。約既葬。卽令所遣司禮監太監魏公朝與楚當者趣令上道。期以夏五月還朝。又特頒帝賚忠良銀記一。凡軍國大事。或有關失。令其實以聞。瀕行。召入辭。便殿。上曰。先生前。乃趣而前蒲伏。上曰。聖母朕不能一日去先生。重違先生意耳。然微先生。朕奚賴焉。朕今日暮望先生矣。太師再拜頓首曰。臣卽行。今陛下新納。后出入起居。臣不能一日忘。願陛下善自愛。上曰。諾。先生行矣。其務彊飯。勉抑哀情。以稱朕意。

伏地悲泣不能起。上爲嗚咽流涕。入言。聖母。

聖母亦感痛。遣中使賜以金錢。明日。聖母。上又

遣中使祖道國門外。曰。先生旣念。上幸趣來。母勤

天子召也。旣行。乃要經素冠。乘布車。日行百里。見星

而行。見星而舍。旣至。則披髮徒跣。悲號趨入門。而左

馮殞而哭。盡哀。遠近送者。素車白馬。同盟畢至。見太

師焦毀過禮。皆大悅。遂以四月十六日葬大父青陽

山之原。是時會大司馬梁公新至。遼戮力安攘。三軍

踊躍養善。木屯之戰。我兵斬首虜八百八十二級。

上念太師推轂梁公知人。詔本兵以督府所上功。

張大正行實 卷四十一
馳報太師令太師議所以論功狀來聞太師既報
上因上疏言趙夫人病請乞假臣數月得扶持臣母
蓋太師意在行服墓次特以此規 上卽上不許
而得屬茨倚廬不卽去固雖加一日愈於已意也乃
上得書大驚而會太宰王公等與太常寺卿王公友
賢等吏科都給事中陳君三謨等福建道監察御史
方君希孟等又皆先後上書請趣召元輔 上是諸
公言卽趣令錦衣衛指揮僉事翟君汝敬亟乘傳造
太師廬賜璽書令促裝就道太師聞命猶趨起涕淚
恐不能決使者曰 當宁倚重相君凡軍國重務悉

待處裁設不卽往臣朝臣汝敬且得罪太師乃叩太
父墓下慘愴悲號使者促而登車遂行梁楚守臣奉
詔飛騎聞 上 上聞先生來卽入言 聖母

上遣中常侍具天廚禁齋郊勞明日召見 文華殿
太師頓首謝具以歲豐民安邊境寧謐狀上對
上大慰悅亟稱先生忠孝賜休沐十日乃叩頭趨出
九月趙夫人至京師 聖母 上郊勞賞賚趙夫人
備至恨趙夫人老又善病不能趣入宮負 聖母
上寵命耳十二月前少師新鄭高公卒公夫人張請
寬卹恩闕下 上怒太師與張公申公念高公無他

大罪。徒以伉直得過君父，爲婉言于上，得復其官。予祭葬，先是。肅皇帝時，公族繁盛，國用困竭，以故禮官所裁宗藩條例多刻意抑損，甚或自相乖亂，不可誦。太師與張公申公念諸侯王皆骨肉至親，而令至是不足以稱天子親親至意，乃略舉事例未及者十一事。上言請勅禮官集羣臣議，著爲憲令，昭示諸侯王。今大宗伯潘公所定宗藩事例，徐公所定宗藩要例，諸侯王旣感泣益親，上而薄厚親疎有體，又不至重困民財，足稱不刊矣。萬曆七年己卯二月河工成，先是淮安故有水患，然或所及僅一

二縣道邑，揚固無恙也。至嘉靖中河決，崔鎮呂泗沖龍窩周營等處，往往奪淮流入海，淮勢不敵，則或決高家堰，或決黃浦，或決八淺，淮楊諸郡悉爲巨浸，河高出民屋上，敗壞城郭，田廬冢墓以萬數。瀕河十郡治隄歲費且萬萬，及其大決，所殘無算。又其從小河口白洋河挾永固諸水，越歸仁集，直逼泗州，則其患不獨在民，且憂在陵寢矣。異日者漕臣吳公請開草灣，夫水以海爲壑，開草灣誠是矣。然金城等處不足以分殺水怒，以數千里巨津而獨令雲梯關當水衝，此勢所不得爲者也。當是時有請漕海者，有請開

引文各不實 卷四十一
膠萊河者有請開加河者或請開衛河者有謂新集
故道當棄者有謂朱家口等處決口當勿塞者有請
鑿范堤者有請開新興場牛圍浦導射陽諸水入海
者紛紛 籍籍迄無定論六要以爲 天子日有事
河而河且不可爲矣 上一日以問執政太師與張
公申公因進言故河道都御史潘季馴可使 上乃
降 璽書卽其家拜御史大夫使持節行治河一切
假以便宜久任責成出帑藏及留所折科漕粟八十
餘萬金不問潘公出入又令諸臣得條上所見治其
諸方命不及事事者下詔獄鞫治之于是當事者人

人惴恐建官舍河上胼胝沾塗日夜焦勞蓋踰年而
告成事爲土堤若干石堤若干塞決口若干建減水
閘若干計費不過五十餘萬省羨金二十四萬以歸
水衡今徐淮之間延袤八百餘里兩堤相望蜿蟺綿
亘殆如長山夾峙而河流其中且黃河以歸仁堤勢
不得南決其勢旣不能及 陵寢又高家堰旣塞淮
不能奔黃浦皆盡趨清口會黃河由安東雲梯閘入
海田廬皆盡已出數十年棄地轉爲耕桑而河上萬
艘得捷於灌輸入大司農矣二月烏思藏僧鎖南堅
請奉書太師詞甚哀懇獻四臂觀世音一瓊龜二金

剛結子一。堅錯者卽闡化王答賴刺麻也。故號稱活佛。以傳經說法戒淫殺爲虜所尊禮。稱輪迴轉法功德。世界佛大國師。萬曆五年套酋切盡黃台吉約俺荅迎堅錯西海上。飲長生水。俺荅所從部落數十萬人。徒以奉堅錯教。無肯淫誤者。其教化可知矣。太師曰。德澤不加。君子不饗其贄。且吾天子股肱臣。義不得與外夷私交。遂歸之於上。上謂太師勲猷宣播遐邇。令納之。三月太師念宮中賞賚無算。度不可得已。一日因戶部進御覽揭帖。遂上言。臣等伏見萬曆五年歲入四百三十五萬。乃六年所入。僅三

百五十五萬。五年歲出二百四十九萬。而六年所出。乃至三百八十八萬。夫歲出則浮於前歲。入則損於舊。此不可不知也。願陛下以主計所上疏。張便坐時。上方詔主計鑄大錢爲賞賚資。太師持不可。曰。愚細小人。譁於道路。方患苦所積嘉靖緡錢無所用。而。上又取外府以益左藏。令新鑄大錢。是使民訛言而奔也。上詔罷之。蓋先是宮中自大婚以來。故事當得賞賜者。皆籍記以待。又當供奉。慈寧歲幣益不足。盡仰給東南織造。上不得已。乃從中出五千金。畀孫太監隆令得次第更請。外庭莫得知也。

至是大司空請罷蘇松應天織造。上不可。太師與張公申公。堅持工部疏入見。上便殿。言近者松蘇大水。民救死扶傷不暇。且陛下嘗有詔。詔孫隆還。今既兩年矣。而隆織造東南如故。非所以信也。詔今也。臣等以爲部議良是。上曰。近降去花樣。皆出自內帑。不以煩民間。此須奉詔。其他未織者。悉罷不取。則惟卿等言耳。時承運庫以歲用不足。給屬夷繒絮。請於歲造外。加織數萬。太師念東南民力已困。度所費非得四五十萬金不可辦。復入言。上得減織造之半。令出大帑水衡錢爲之。捌年庚辰正月。太師服

除。詔加大傅。歲加祿米一百石。進前所予錦衣正千戶。世指揮僉事。太師辭太傅。時王爵言太師當以九年考績加恩。太師言臣當墨經時。旣謝常祿。卽名有父喪。臣服官之日淺耳。不宜以九年考績。上曰。卿之所處。實爲恩義兩盡。足以垂範萬世。遂許之。三月。太師以鴻典畢成。聖德日茂。乃拜手稽首。疏屢上。將告歸。上大驚愕。曰。卿豈得一日離朕。如何。遽以乞休爲請。朕惻然不寧。卿宜仰思先帝顧托之意。以社稷爲重。永圖贊襄。用慰朕懷。慎勿再辭。是時交章懇留者滿朝廷。蓋九卿則太宰王公國光

等列卿則太常寺卿陰公武卿等臺省則吏科都給事中秦君燿等山西道監察御史帥君祥等皆上言元輔不可一日去上上賜太師龍箋手勅曰自今以往三十年願先生無復出口矣太師遂不得辭十一月上有詔度民田先是高皇帝時天下土田八百五十萬頃歲久偽滋編戶末民無所得衣食其勢必易常產令豪民得以爲姦以故田賦之弊孔百出而其大者曰飛詭曰影射曰養號曰掛虛曰過都曰受獻久久相沿引爲故業於是豪民有田無糧而窮民特以力薄莫可如何始受其病矣及縣官責

役什一貧民鬻子妻不能輸納則其勢不得不行攤派蓋自浮糧所在多有而天下盡受其病矣然民愁無聊下逃山林轉爲盜賊則其勢又不得不請減額今讀一大明會典所載弘治十五年天下土田視高皇帝時已減二十七萬蓋自所減額日以益多而國家又受其病矣太師日夜憂勞念欲爲君國子民計非清丈不可然其意懷未發也會御史中丞勞公奉詔荒度閩田閩人以為便太師遂與張公申公大司徒張公議請以其意詔行諸路所在強宗豪民敢有撓法若潞城饒陽公族等者皆請下明詔

切責。以故天下奉行惟謹。凡莊田屯田民田職田養廉田蕩地牧地皆就疆理。無有隱姦。蓋既不減額亦不益賦。貧民不至獨困。豪民不能併兼。又民間新所墾治。皆賦其貢稅。以新賦均舊額中。則國初故額得以減科。民賦幸益以輕。而天下吏民皆冀幸有田以爲世業。足利賴萬世矣。十二月太師以
上春秋鼎盛。宜省覽章奏。裁決萬幾。又以祖宗奎章睿謨神功駿烈。具載實訓。實錄意義精深。規模宏遠。足垂億萬統緒。卽上欲潤色鴻業。不必慕稱上古久遠之事。其道惟在鑒祖宗成憲耳。乃屬儒臣出

累朝

實訓

實錄取其大者分類編摩爲

謨訓

類編以進。每文華進講。太師必粗述大指。隨事獻納。上皆默識之。九年辛巳正月。太師請令翰林院

官分番入直。應和文章。或令侍上清燕。質問經義。

陳說治理。如唐宋故事。上從之。四月。上御便殿。

太師與張公申公持南科給事中傅君作舟所。上封

事入見。上言。大江南北大饑。羣盜大起。元末稱亂。

首事者皆潁川蕭縣人。可念也。請乞大發帑金十四

萬往賑之。上旣許諾。則太師又言。今天下至困竭

矣。卽上幸履路節儉。臣愚過計。猶以爲大司農所

入不足佐緩急。乃近者宮中賜賚動至鉅萬。夫今所謂常例豈盡出祖宗舊例哉。不過代相沿及。如今年偶一爲之。明年卽稱引以爲故事。陳乞耳。臣不暇遠引如世宗朝。土木煩興。服御無度。可謂多事矣。然其後晚年私府所積尚百有餘萬。今大司農旣歲輸金花銀百二十萬奉。上而陛下又欲取外府益之。且陛下與其施及緇流以求福利。孰與愛養百姓。蠲常賦與民用。以全活億兆元元之命乎。上爲感動。九月太師在告。上數遣醫問病。蓋太師病未踰月而。上心如有所失。遣中貴奉手勅趣

召者數四矣。太師遂力疾彊起。十月以一品十二年秩滿。上念先生精忠大功冠於先後。命支伯爵祿。加上柱國太傅。降勅獎勞。賜宴禮部。予一子尚寶司丞。太師累辭不得所請。乃勉受太傅。上亦知太師以古人自期。致君安國。不計爵祿。不復強之云。二月太師疾。上勤念不置。時時下手詔問先生安否。及疾久不起。上益憂之。爲涕泣不食。常賜內廚饅饌。食太師。黃門使者相望道路。都人有感嘆泣下者。六月丁亥朔日有食之。朔三日彗出五車口。柱星以南。太師念病在不襄。遂上書請賜骸骨。上覽之

感痛益使人覩太師願慎加輔助醫藥厚自愛十二
日。上諭遼東禽準魁速把亥功加太師。今官進前
所予錦衣衛指揮僉事同知。世世不絕。時太師病已
益革。不知所歸。惟涕泣數行。言萬死不敢拜命。已
而。天子聞太師不粥。遣中使問太師天下大計。太
師迷惑昏曠。且數語報。上使者既去。明日太師欲
遷正寢。未起沐浴。而溘然長逝矣。卒之日。爲萬曆壬
午六月二十日。距其生嘉靖乙酉五月初三日。享年
五十八歲。計聞。上大震悼。輟朝數日。兩宮聖母
上。潞王賜賻千餘金。他楮幣等無算。贈上柱國。謚

文。子尚寶司丞。遣官諭祭治葬如例。仍加

祭五壇。已。樾車將發。上從張公申公余公請。詔

太僕少卿于君鯨錦衣衛指揮僉事曹君應奎護太

師而遣司禮監太監陳君政將趙夫人。嗟乎。大父趙

夫人。太師所蒙於。兩朝。若白金坐蟒。蟒斗牛五毒

五絲艾葉纏身。蟒衣紵絲綵幣。金寶珠。長春花飾寶

珠。環玉花墜。金艾葉符。金篆字。金簪銀錢。銀八寶豆

葉。羊豕酒饌。多不可悉數。又。上念太師純忠有捧

日之功。取以名其所。恭建堂。御書大字對句其上。

賜內帑千金佐之。此皆非近代所有。孤等不敢稱述。

孤等獨謂見 上平臺 上至召先生近 御座看
朕容色。執太師手相問勞。上朝夕居起飲食狀悉
以示太師。一日昧旦侍經帷。日中尚未食。偶病腹
上卽手調所進。御羹饌。令近侍捧至。太師拜手食
之。上始解顏。嗚呼。無論孤等。卽百世後未死者讀
之。猶令人慨然失漑。主恩未報。太師誠未可死。太
師何遽以死爲哉。太師處性淡泊。遇事有執持。外壯
而內平。無所矯飾。事求當諸理。不拘文牽俗。居常慕
子房。藪侯之爲人。貴在實造。不爲文言虛辭。自登仕
籍。伉厲守高。不植黨與。暨入政府。調劑宇內。遂杜絕

私門。戒閹者無敢通一刺。爲人造請。已諸公咸亮其
特介。不爲私謁。門外寢不見長者車。及 上在亮陰
太師湛靜沉默。聲色不露。以身繫天下輕重者。若而
年。雖操心堅正。風節稜稜。似汲長孺。不可招麾去來。
然道固委蛇。中無滯礙。已創一法。人稱不便。輒罷之。
百司庶府。至於吏議者。卽不撓法。回芘。終能自效。尋
復振之。襟度汪夷。不意苛察。不以一青掩大節。有人
指摘細過。置而不問。獨於人勞勩。記存不忘。推獎恐
後。諸司建白。惟良是採。若窾言無當。雖文弗錄。士一
見其姓名。卽得其材。指高下。他日遇事握銓者。或難

其人必指某某優為之。卒能其官。如所鑒不謬。常言策士謂水亟魚鱗。令滋民擾。國家自有制度。何紛更之為。以故獨申飭。累朝令用。無所創造。第恐沿習久則玩。玩則弗震。頹靡久則壅。壅則弗行。不得不稍稍改絃。輒而淬厲之。大約以正紀綱。審命令。厚風俗。興吏治。阜民財。充國計。振武功。訖文教。為指苟利公家。專行一意。不以遠嫌自累。不欲沾沾令人喜。為眾譁沮。紕憂勞天下。若振濡若沃焦。皇皇如不及。聞一方歲飢。至深念廢寢食。必計安之。乃已。居官歷數。三朝光輔。二帝俱以精誠結于明主。先帝今上咸虛懷延納。官

中府中事無纖鉅悉次而行。已位上公。持國。秉重矣。於人臣無兩。而心常慄慄如負譴。懷驚。生平竭誠體國。至挾精弊神。晝喜忘劬。人或勸其省思慮。進醫藥。輒謝曰。吾欲畢吾分。安得恤吾身。且也疆宇未寧。羣生寡遂。即吾髮膚幸苟完。何益。故其趨朝常中夜振衣。即金門未啓。或先往以待。日總統庶務。斷錯解焚。出自秘閣。則留公署。延見諸公。揚推政理。四方以其職事來者。接之。人人各厭其意。未嘗以憊為解。竟用勞瘁。病脾。自辛巳六月以來。業已委弊。猶力疾蚤作。夜思不怠於勤。比病困篤。尚伏枕。摩畫天

下大事絕口不屬身後事一言此中外所共聞知惟
瞻顧宗社繫心帝室屬續之時既瞑復張目視大言
主恩未報未能辭大師吾死且不沒遂卒嗚呼若太
師庶幾哉所謂死生以之者矣後生未進不知國
家大務然伏見先皇帝時專務資格人莫得竟其
才官職至耗亂也今上詔行久一簡衆職尊禮公
卿大臣郡國守相有治行異等者皆進于廷陞

上親慰勞之賜璽書金綺羊酒六曹尚書郎積有
功能得拜卿寺不得更相除調外臣有所調選悉就
近其地察繁簡通塞並用三途督府部使者論薦所

部吏與簡臺諫皆以四分之一待孝廉明經茂才有
舉不及格者罰小吏如楊果趙騰蛟等得爲令長行
太僕寺苑馬寺得行觀察使事與都轉運公卿子弟
有行能者待以高爵不以左遷困人尤寓意遠方人
林不以衰老往遠方有缺員不復虛其宮如曩時京
朝官不得通人餽遺有以事請謁人其所見託者與
其子弟能發其罪以聞有厚賞暴官墨吏下所司論
罪悉盡本法然禁誹謗理註誤許所繫治吏得執奏
設舉刺失實或有異同必令推詳其一有賞罰疑誤
者許覲吏得廷辨之以故凡在有位感激懷奮皆抱

功修職不肯謁告。不以趨走逢上。其已得除書入。以
使事修。覲入。賀行者不宿於家。各務教養實政。
不肯取辦簿書期會。衆賢輻輳。仕路廓清。卽虞廷師
師。周士濟濟。不啻過矣。往者將權不重。功罪賞罰不
覈。又或苛細使人不得展布。凡有罪當結問。輒以武
弁當之。人視將士易與。將士亦以此自輕。不復振耳。
今上審定。廟謨假督府一切便宜。不數易置。時
時出。璽書金綺相勞。有壯猷宿望。已數破虜者。卽
賜召還。不欲盡竭其力。每三年遣重臣出行邊計。成
功大將軍進退予奪。皆取自上意。下至偏裨。亦皆

假重事權。爲之罷監軍使者。令文吏毋得摧沮。又賜
將士養廉田。出帑金數十萬。勞軍。謂建議者與受事
者多意見不侔。往往詔建議者卽經略其事。大將
軍有衝陷折關。能多立奇功者。不愛通侯之賞。每
勅邊吏乘時修戰守。持重安謐。示虜閑暇。毋得張皇
調遣。徒罷勞士卒。又親理管兵罷班軍輸作。令所在
有老幼當赴代者。悉罷勿遣。其所審畫。禁兵入衛兵
薊兵南兵浙兵福兵忠順軍山東民兵狼兵苗兵所
在。標兵水兵動悉機宜。以故將士感泣。皆引弓備胡
無不願居前。得一當匈奴。先死。且往者。禁網踈濶。吏

民無所請事。多填委簿。領書不肯奏報。天子今詢事考言。以言覈事。以事覈功。非歲久不可卒舉者。皆校量繁簡難易。多寡新故。久近程督。府諸司令。以時報成事。毋得故緩其大者難者。以遺後人。徒以米鹽瑣屑之務。苟塞明詔。以故人皆見素。無敢匿端。咸廩廩奉約束。士大夫非奉尺一。雖歷郡國。無敢馳一軺傳。縣次不得續食。勞所在候望。省賦車籍。馬之費歲若干。日久官屬既盛。則出令者多。任事者勦。今汰冗員什二三。用一事權。絕人觀望之私。歲省稍食若干。計郡國吏以賦入多寡爲殿最。不煩加賦。得民宿

遺歲若干。郡縣負邑入。皆鈎校其數。姦人無所逃罪。得吏胥所乾沒若干。其較著者。則決策款虜。減客兵。清糧糗。有宿飽之士。無脫巾之憂。歲所省凡得數十百萬。卽如薊昌。每歲所犒虜。不過二萬七千六百。而所省保定。忠順軍。及固原入衛兵馬。與山東保河。灤薊寧夏兵餉。已至數十餘萬。卽大較可知。以故嘉靖之季。太倉所儲。無一年之畜。今公府庾廩。委粟紅貫。朽足支九年。猶得以其贏餘數十百鉅萬。征伐四夷。治漕。可謂至饒給矣。社者罪殊死以下。歲久不決。圜墻爲滿。殘入得以幾幸。訟獄滋多。今上詔理官修

大明律例令有司毋賣獄毋深文巧詆傳致人罪無輕入人死刑無以獄案結竟無辜無逸囚無縱逋逃其覆讞具獄當戮死者卽以縣諸藁街以故叛逆妖妄如呂老十猛谷王馬西川周元張彥文張永寶張天福張崇庫王進李一真王志學喬濟時龔志向黃崙劉守業賈邦川楊時貢等皆駢首就戮赤眉綠林黃巾白蓮之屬不足憂國家且人重犯法不敢徼幸三尺矣異時宵人越貨事爲故常有司罔不以聞今上重弭盜之任申保甲之約設斬捕之格嚴沈命之條厲窩盜之禁厚協捕之賞寬未得之期薄旣獲之

罰則吏務詰奸人懷逸賊以故幅幘萬里皆重垣密樹如長蛇委蛇覆蔭中路警夜捕晝巡徼江海比山川路槩水行載舟者皆萬里不持寸兵有道不拾遺之風矣初 上新嗣位之時 國用大誦 上不得已念 國家惠澤唯施及困窮不以惠養豪猾雖有旨督賦然萬曆丙子業 陽民回租輯寧邦本未可謂刻急也且 上曠蕩之恩寬大之 詔狐等靡得而志志其大者則是年太師偕呂公張公請蠲賦二百三十四萬有奇今年太師偕張公申公請蠲賦一百三萬有奇本色米六十五萬五千二百有奇絹布

引之... 卷四十一
一百四十二萬七千二百有奇。顏料蠟茶三十三萬七千一百有奇。其他如已卯所減泗州寶應鹽城等郡邑賦錢一十三萬二千七百有奇。河南賦錢一十三萬一百有奇。所在有之多甚不記。且上在位十年而賑貸蘇松等郡凡七。減漕七十餘萬。賑貸淮揚等郡凡十三。減漕九十三萬。不可謂非省憂鰥寡孤獨窮困矣。況外繇如馬船料價糧料馬價班糧工價名糧均徭公費驛遞稅契等皆歲有寬政。上又明詔有司積貯以備凶年。罷江南織造。令所在守臣直指監司歲時巡行郡邑。同勞疾苦。察舉冤獄。毋得輒

自議法擾民與黎民休息。上德念深矣。豈無丞民不識不知。卽從古已然乎。夫俺荅至崛疆矣。自先帝甲冑臨戎。匈奴喙息。謂將復有。成祖率庭之舉。故明年俺荅吉能遂請內屬。夫疆者先臣弱者焉。徒以故名王解辦。元戎獻馘。芟薙南荒。習悛東越。在閩粵則朱良寶林道乾林鳳。在粵則惠潮藍一清賴元爵文昌李茂鄭大漢龍川鮑時秀。東山石牛青水。覃公慎覃世活。合浦黃章弟古田韋銀豹。懷遠韋朝義。右江韋明甫。昭平黎福莊。荔浦韋公海。北三韋千里河池韋宋武鬱林黃邦緣。木頭峒覃扶玉。在蜀則

九絲阿大凌霄阿苟建昌阿怒都都方三傀屢奏明
明在陝則借文孟登河州且戎十同官李宗鸚在滇
則臨安記來王魯寨易克鐵索箐羅革金齒藍昌黑
在貴竹則安順者念繼王黎平汪約石應斗貴陽呵
利普安光見王播州楊貴在楚則五開胡國瑞及羅
旁府江北五晰咳龍哈十寨宜山都亮淥烏免多浪
里松里嬰田來賓松潘威茂風村白草諸賊或僞上
帝號或代襲王稱莫不頓顙伏辜獻圖請吏獨東虜
者太師謂外寧必有內憂故釋土蠻不誅以爲外懼
然速把亥既禽哈反帖阿都赤明安之事虜已累氣

脅息設一上欲滅胡第令使一梟騎縛之耳何足煩
大將軍十萬之師乎烏思藏奔噶喇皆近古不賓之
國苗平天漂亞寨河斗皆上世難馴之民今皆吮沫
承流奉琛納贄豈非千載泰寧之一會哉夫天下有
一世之計有萬世之計今西自嘉峪東至山海關延
袤萬里崇墉密雉如天險不可升虜無能躡入又南
自高郵北至太行堤延袤四千餘里兩堤崢嶸屹爲
鉅防必不至引水病漕且其所費皆取諸贖銀不索
水衡少府金錢此皆萬世之計非太師所能辦蓋
主上聖明獨運甄陶下有二三元老共熙帝載諸所

建設修舉廢墜皆諸蓋臣石畫賴天地宗廟社稷以故玄化滂流浸淫衍溢功侔往初兼並神明先太師何幸身親見之哉且太師道雖直友中實惻怛少讀春秋傳慨然曰古稱政之所予在順民心有以拂爲順者子產也吾殆類是乎其論治欲儆官邪齊民萌不專姑息有救世之思蓋獨見謂罔少密則莫能扞格法可懸而不可用特以初引綱維不得不固握其柄而信用之意俟天下遵制揚功風成俗定然後恢闊禁罔削除煩苛示民長厚之道耳其後臺省皆言諸象指者競趨武健刑多失衷非聖世事

太師深然之遂請詔有司以非罪榜掠人至死三人以上者編爲卒伍著爲令嗟乎深故之罰其意斷可識矣比年猶崇惇大惜其未究刑措之施遽以天年下世可勝嘆哉昔子產爲政鄭人厥有惡言居有頃鄭人復歌之曰我有子弟子產誨之我有田疇子產殖之子產而死誰其嗣之夫民不可與慮始而可與樂成所從來遠矣乃太師生時俺荅安國亨等卽爲太師置像旦暮尸祝公今其無祿卽世鴻生鉅儒多稱引記功宗以功作元祀一篇之中三致意焉下至武夫健卒田畯紅女聞有垂涕者其所遭遇豈不

逾於子產哉。太師少讀書破萬卷，無所不窺，然獨觀大義，惟務宗旨，不求蔓引泛溢，爲文不屑屑，程度不喜譎怪，第取境與神會，言與志足，而柔澹春融，得天然之致，每屬草輒棄去，不欲垂空文，自見筐篋中雖多所存，行世者奏對稿而已。至呈離肅大寶丹扈諸箴解，若講讀諸書，無非闡理翼經，學士大夫類能道之，資由天授，警敏䟽徹，博聞強識，尤明習累朝故實，事至輒口誦，某時著爲律，某歲挈爲令，不煩討核繙閱，日數行下，案無留牘，洞晰機宜，遠至南垂篁竹之夷，北徼氊裘之虜，譚險阨要害，出沒向背，較若列眉。若懸寓用能以樽俎折衝，機務紛拏，人或憂其叢

聒。太師殊閒適，自公退，則游情藝圃，旁通稗官小記，及諸省賢書，督學試義，悉手自品隲，示諸子弟，其暇豫如此。家居馴行孝謹，以處君父骨肉之間，交直其難，不得歸持大父喪，以此常邑邑何已。上凡所賜鮮新，不上大父靈几，不敢食，侍大母趙夫人於邸，備極色養，每昕必適寢所，問侍者，太夫人眠食狀，乃行甫歸，卽之親舍，從容宴語，怡乎猶孺慕也。于兄弟友愛，愛叔父居易尤篤，悼仲父居敬蚤世，媿媿于其孤姪，嗣敏拊而長之，尋以已所授廕與之，所教與孤

等埽為庚辰春季父居謙訃至。哭泣哀思。再上疏請告。疏入不報。可。然後出。逾年不水霧穀。朝士咸見之。蓋天植云。教子獨用嚴毅。慕萬石君之風。每丙夜肅襟危坐。諸子無論壯少。皆不敢入侍。居恒所面命。自砥節礪行。文藝兩端之外。無一語及垣屋田宅。及諸子稍長。業登仕籍。向用其告。以居官仕宦任職。惟比擬已行事。天下事有未發者。密不使聞。僉同乃可決爾。吾安能知。設或乘問問某事。後當如何。卽艷然大怒曰。此非乃所當聞。輒引曹相國之事相戒。曰。昔漢惠使者曹窋洗沐私從。容問其父。以不請事。何以憂

天下。相國怒窋答之。二百。曰。趣入侍。天下事非若所當言也。夫窋為中大夫。而亦旣長矣。又奉帝命。乃相國怒答之。二百。見曹獨不畏曹窋事乎。于是諸子重足一息。毋敢出聲。每過庭。非有所問。輒良久侍立。不敢出一語而退。匪郵報。卽除一令丞茂由知。蓋不言垣屋田宅。不屑以治產導其後。此無足論其于國家事。又惟謹不以言者。太師為國家之心。與其訓諸子之意深遠矣。治家窮約如寒素。性好施與。大官之脯所入。以充歲時存問。里中所知。交不求以羨姻。孀諸僮指廩而食者。若而人。總族中僅年。守不敵

糧七十石戒子弟輸納無敢後時其外繇非分所當復者孤等不敢脫一踐更卒有豪猾賄里胥竄名太師籍中歲歲復無有所與孤等發其姦守臣以聞大司農請以其意布告天下雖有長爵復復母得過制今罷民得寬力作容推太師意也此卒發陳篋僅得上所賜帑金文綺亦大都煩費矣上聞而悼之賜錢布薪米各有數乃得襄事如禮太師先配顧氏贈一品夫人繼配王氏封一品夫人子男六長敬修禮部儀制清吏司主事娶癸卯舉人高公嵩女次嗣修丁丑進士及第第二人翰林院編修娶四川左叅將

賀公麟見女次懋修庚辰進士及第第一人翰林院修撰娶江西布政使司左叅議高公尚志女次簡修錦衣衛指揮同知娶刑部尚書王公之誥女次允修府諸生娶刑部四川清吏司主事李公幼淑女次靜修尚幼聘工部尚書李公幼滋女女一適刑部左侍郎劉公一儒子太學生戡之孫男六重光嗣修出重輝敬修出重登重元懋修出重潤重胤簡修出皆幼女三敬修所出許聘吏部左侍郎王公篆子懋修二女未聘皆幼唯是本月二十八日孤等將扶太師還楚卜吉而藏泣血拊心以先人幽光其命是

懼私心願得長老先生揭石墓門以託不木非長老先生狀之則事且無徵恭惟明公道高管鮑文蔽班楊單言迥邁崇褒半詞允爲信史用是藐焉諸孤敢微福先靈縑經叩闈人以請夫奉職守官人臣常分先太師謀猷入告事在密勿非世所宜知孤等又故自木強不問外事蹟蹟靡所睹記特按䟽草憲令聊擔拾什一於千百事有缺漏言無增飾謹布之司籍者伏乞哀而存之賜一言以爲太師重實嘉惠九原流精誠於窳窳貽休百世耀華袞於縑緗豈惟孤等實世世子孫非生死所能報塞矣敬修等無任泣血

哀懇之至

張文忠公行實卷四十七終